

Verulamio  
de Ventis

1662










1184/A N ix. u  
17




Another copy 42550 is  
shelved under SWIETEN (Leyden)  
Maladies des Armées... 1761

















7009710

Fr. Baconi  
DE VERVLAMIO  
*Historia Naturalis*  
& *Experimentalis*  
DE  
VENTIS,  
&c.



AMSTELODAMI,  
Ex Officina Elzeviriana Anno 1662.









*Illustrissimo, & Excellentissimo*

PRINCIPI,

C A R O L O,

*Serenissimi Regis*

J A C O B I

Filio, & Hæredi.

*Illustrissime, & Excellentissime*

PRINCEPS,

**P**rimicias *Historiæ* nostræ *Naturalis* Celsitudini tuæ humillime offero. Rem mole perpusillam, veluti *Granum Sinapis*: Sed tamen pignus eorum, quæ Deo volente sequentur. Obstrinximus enim nos ipsos tanquam voto, singulis nos mensibus, ad quos Dei bonitas

\*

2

(cu-

(cujus agitur Gloria tanquam  
in Cantico novo ) vitam no-  
stram produxerit, unam, aut  
plures ejus partes, prout fue-  
rint magis aut minus arduæ,  
aut copiosæ, confecturos, &  
edituros. Moti etiam fortasse  
erunt alii, nostro exemplo, ad  
similem industriam: præsertim  
postquam penitus perspexe-  
rint, quid agatur. Nam in *Hi-*  
*storia Naturali* bona, & bene  
instituta, claves sunt & Scien-  
tiarum, & Operum. Deus  
Celsitudinem tuam diu servet  
incolumem.

*Celsitudinis tuæ Servus hu-*  
*milis & devotus*

FR. St. ALBAN.



TITULI  
HISTORIARUM  
& Inquisitionum in primos  
sex menses destinatarum.

**H**istoria Ventorum.

• Historia Densi & Rari, nec non Coi-  
tionis, & Expansionis Materia per  
spatia.

Historia Gravis & Levis.

Historia Sympathia, & Antipathia  
Rerum.

Historia Sulphuris, Mercurii, & Salis.

Historia Vita & Mortis.

*Hoc libello continentur :*

HISTORIA NATURALIS ET EXPERI-  
MENTALIS DE VENTIS.

HISTORIA NATURALIS ET EXPERI-  
MENTALIS DE FORMA CALIDI.

DE MOTUS SIVE VIRTUTIS ACTIVÆ  
VARIIS SPECIEBUS.

RATIO INVENIENDI CAUSAS FLUXUS  
ET REFLUXUS MARIS.

HISTO-





HISTORIA  
NATURALIS  
ET  
EXPERIMENTALIS,

*Ad condendam Philosophiam :*

SIVE,

Phænomena Universi : quæ est In-  
stitutionis Magnæ pars tertia.

**M**onendi utique sunt Homines , &  
per Fortunas suas rogandi , atque  
obsecrandi , ut animos submittant ,  
& scientias in Mundo Majore querant : quin-  
etiam de Philosophia vel cogitationem abji-  
ciant , vel modicos saltem , & tenues fructus  
ex illa sperent , usque dum Historia Natura-  
lis , & Experimentalis , diligens & probata ,  
comparata sit , & confecta . Quid enim sibi  
volunt ista Cerebella Hominum , & poten-  
tes Nugæ ? Fuerunt apud antiquos , placita  
Philosophorum valde numerosa ; Pythago-  
ræ , Philolai , Xenophanis , Heracliti , Em-  
pedoclis , Parmenidis , Anaxagoræ , Leu-  
cippi , Democriti , Platonis , Aristotelis ,  
Theophrasti , Zenonis , aliorum . Hi omnes  
Munderum argumenta , tanquam Fabula-  
rum ,

rum, pro arbitrio confinxerunt, easque Fabulas suas recitarunt, publicarunt: alias magis concinnas certe, & probabiles, alias duriores. At nostris saculis, propter instituta Scholarum, & Collegiorum, cohibentur ingenia magis. Neque propterea omnino cessatum est: Patricius, Telesius, Brunus, Severinus Danus, Gilbertus Anglicus, Campanella, scenam tentarunt, & novas Fabulas egerunt, nec plausu celebres, nec argumento elegantes. Num hac miramur? Quasi vero non possint infinita oriri huiusmodi placita & Secta, omnibus saculis? Neque enim est, aut erit, huiusce rei finis aliquis, aut modus. Alius aliud arripit, aliis alia placent; nihil est luminis sicci, & aperti; quisque ex Phantasia sua cellulis, tanquam ex specu Platonis philosophatur; Ingenia sublimiora, acutius, felicius; tardiora, minore successu, sed aqua pertinacia. Quin non ita pridem, ex quorundam Virorum doctorum, & prout nunc sunt res, excellentium disciplina, scientia (credo propter Varietatis, & Licentia tadia) intra certos, & descriptos Authores coërcentur, atque ita cohibita, senioribus imponuntur, adolescentibus instillantur; ut jam (quod cavillatus est Cicero in Caesaris annum) Stella Lyrae ex edicto oriatur; & Authoritas pro Veritate, non Veritas pro Authoritate sit. Quod  
genus

genus Institutionis, & Disciplina, ad usum  
presentem egregie valet; sed idem meliorum  
indicit exilium. Nimirum primorum Pa-  
rentum Peccatum, & luimus, & imita-  
mur. Illi Dei similes esse voluerunt, Poster-  
eorum adhuc magis. Etenim Mundos crea-  
mus, Natura praeimus, & dominamur;  
omnia ita se habere volumus, prout nostra  
Fatuitati consentaneum fore videtur, non  
prout Divina Sapientia, nec qualia inve-  
niuntur in rebus ipsis: nec scio an Res, aut  
Ingenia magis torqueamus: sed plane Si-  
gilla Imaginis nostra, Creaturis, & Operi-  
bus Dei imprimimus, non Creatoris Sigilla  
cum cura inspicimus, & agnoscimus. Itaque  
non immerito iterum de Imperio in Creatu-  
ras decidimus: & cum post lapsum Hominis,  
nihilominus dominatio nonnulla in Crea-  
turas reluctantes relicta fuerit, ut per ve-  
ras, & solidas artes, subigi & flecti possint,  
id ipsum ex insolentia nostra, & quia Dei  
similes esse volumus, & propria Rationis  
dictamina sequi, maxima ex parte amitti-  
mus. Quamobrem, si qua est erga Crea-  
torem Humilitas, si qua Operum ejus Reve-  
rentia & Magnificatio, si qua Charitas in  
Homines, & erga necessitates, & arumnas  
humanas relevandas Studium, si quis amor  
Veritatis in Naturalibus, & Odium Tene-  
brarum, & Intellectus purificandi Deside-  
rium:




rium: orandi sunt Homines iterum atque iterum, ut missis paulisper, aut saltem sepositis Philosophiis istis volaticis, & prapasteris, quæ Theses Hypothesibus anteposuerunt, & Experientiam captivam duxerunt, atque de Operibus Dei triumpharunt: summis, & cum veneratione quadam, ad Volumen Creaturarum evolvendum accedunt: utque in eo moram faciant, meditentur, & ab opinionibus abluti, & mundi, caste, & integre versentur. Hic est ille Sermo, & Lingua, qui exiit in omnes fines terræ: nec confusionem Babylonicam passus est: Hunc perdiscant Homines, & repuerascentes, atque iterum Infantes facti, Abecedaria ejusdem in manibus habere dignentur. In Interpretatione autem ejus eruenda, atque enucleanda, nulli opera parcant, sed strenue procedant, persistant, immoriantur. Cum igitur in Instauratione nostra, Historiam Naturalem, qualis sit in ordine ad finem nostrum, in tertia Operis parte collocaverimus; hanc rem prævertere, & statim aggredi visum est. Et si enim haud pauca, eaque ex præcipuis, supersint in Organo nostro absolvenda, tamen consilium est, universum Opus Instaurationis, potius promoveri in multis, quam perficere in paucis, hoc perpetuo, maximo cum ardore, (qualem Deus Mentibus, ut plane confidimus,



fidimus, addere solet) appetentes, ut quod  
adhuc nunquam tentatum sit, id ne jam  
frustratentetur. Simul subiit animum illa  
cogitatio: Spargi proculdubio per Europam,  
complura Ingenia, capacia, libera, excelsa,  
subtilia, solida, constantia. Quid si quis, tali  
ingenio preditus, rationem, & usum Or-  
gani nostri capiat, probeat? Tamen non ha-  
bet, quid agat, nec quomodo se ad Philoso-  
phiam comparet, aut accingat. Si esset res,  
qua lectione Librorum Philosophicorum, aut  
disputatione, aut meditatione perfici posset,  
sufficeret fortasse ille, qui quis sit, & abun-  
de illud praeſtaret. Quod si ad Historiam  
Naturalem, & Experimenta artium, illum  
remittimus, (id quod facimus) haeret, non  
est Instituti ejus, non Otii, non Inpensa.  
Atqui non est postulandum nobis, ut quis  
vera dimittat, antequam in possessionem  
Meliorum inducatur. Postquam autem Na-  
tura, & Artium Historia, fidelis & copiosa,  
collecta, & digesta fuerit, atque veluti  
ante oculos Hominum posita & explicata:  
non tenuis est spes, ingenia, de quibus dixi-  
mus, grandia (qualia & in antiquis Philo-  
sophis vigerunt, & adhuc non raro repe-  
riuntur) cum tanta antehac fuerint effi-  
cacia, ut veluti ex Scalmo, aut Concha,  
(rara scilicet Experientia, & frivola) Na-  
viculas quasdam Philosophia admirabili  
stru-

structura, quoad opificium, adiscaverint: multo magis postquam Sylvam, & Materiem nacta sint, solidiores structuras excitatura; idque licet via veteri pergere malint, nec via nostri Organi (qua, ut nobis videtur, aut unica est, aut optima) uti. Itaque huc res redit, ut Organum nostrum, etiamsi fuerit absolutum, absque Historia Naturali, non multum; Historia Naturalis absque Organo, non parum, Instaurationem Scientiarum sit pro vectura. Quare omnino, & ante omnia, in hoc incumbere, satius, & consultius visum est. Deus Univerſi Conditor, Conservator, Instaurator, hoc Opus, & in ascensione ad Gloriam suam, & in descensione ad Bonum humanum, pro sua erga Homines Benevolentia, & Misericordia, protegat & regat, per Filium suum unicum, Nobiscum Deum.

N O R M A  
H I S T O R I Æ  
P R Æ S E N T I S.

 uamvis sub finem ejus partis *Organi* nostri, quæ edita est, præcepta de *Historia Naturali & Experimental* conscripimus; visum est tamen, hujus, quam nunc aggredimur, *Historia Normam*, & *Figuram*, & accuratius describere, & succinctius. *Titulis* in *Catalogo* comprehensis, qui pertinent ad *Concreta*, *Titulos* de *Naturis Abstractis*, (quarum ibidem, ut *Historia Reservata*, mentionem fecimus,) superaddimus. Hi sunt, *Materia Schematismi* diversi, sive *Forma prima Classis*, *Motus simplices*. *Summa Motuum*, *Mensura Motuum*, alia quædam. De his *Abecedarium Novum* confecimus, & sub finem hujus voluminis collocavimus.

*Titulos* (cum ad omnes nullo modo sufficiamus) non ex ordine, sed ex delectu sumpsimus; quorum scilicet *Inquisitio*, aut propter usum erat gravissima, aut propter copiam *Experimentorum* maxime commoda, aut propter obscuritatem rei, maxime difficilis, & nobilis, aut propter discrepantiam *Titulorum* inter se, latissime patens ad *Exempla*.

In *Titulis* singulis, post *Aditum* quendam, aut præfationem, statim *Topica particularia*, sive *Articulos Inquisitionis* proponimus, tum ad *Lumen Inquisitionis* præsentis, tum ad *Provocationem futuræ*. Domini enim *Quæstionum* sumus,

*Norma Historia Præsentis.*

mus, Rerum non item. Neque tamen Quæstionum Ordinem, in *Historia* ipsa præcise observamus, ne impedimento sit, quod pro auxilio adhibetur.

*Historia & Experimenta* omnino primas partes tenent. Ea si Enumerationem, & seriem Rerum particularium exhibeant, in *Tabulas* conficiuntur; aliter seorsum excipiuntur.

Cum *Historia & Experimenta* sæpissime nos deferant, præsertim *Lucifera* illa, & *Instantia Crucis*, per quas, de veris Rerum causis, Intellectui constare possit; *Mandata* damus de Experimentis novis, quantum prospicere animo possumus, aptis, ad id quod quæritur. Hæc *Mandata* tanquam *Historia designata* sunt. Quid enim aliud nobis, primo viam ingredientibus, relinquitur?

*Experimenti* alicujus subtilioris *Modum*, quo usi sumus, explicamus, ne Error subsit; utque alios ad meliores, & magis exactos modos excogitandos, excitemus.

*Monita*, & *Cautiones*, de Rerum Fallaciis, & qui in inquirendo, & inveniando possint occurrere, Erroribus, & scrupulis, aspergimus; ut Phantasmata omnia, quantum fieri potest, tanquam Exorcismo fugemus.

*Observationes* nostras, super *Historiam & Experimenta*, subteximus, ut Interpretatio Naturæ, magis sit in procinctu.

*Commentationes*, & tanquam Rudimenta quædam Interpretationis de *Causis*, parce, & magis suggerendo, quid esse possit, quam definiendo, quid sit, interponimus.

*Canones*, sed tamen *Mobiles*, sive Axiomata inchoata, quæ nobis inquirentibus, non pronunciantibus se offerunt, præscribimus, & constitui-



*Norma Historia Præsentis.*

stitimus. Viles enim sunt, si non prorsus veri.

Utilitatis humanæ nunquam obliti ( licet Lux ipsa dignior sit iis , quæ à Luce monstrantur ) *Vellicationes de Præctica* , attentioni & memoriæ Hominum subicimus ; cum nobis constet , talem , & tam infœlicem esse Hominum Stuporem , ut quandoque , res ante pedes positas , nisi moniti , non videant , sed prætereant.

*Opera* , & *res impossibiles* , aut saltem adhuc non inventas , quæ sub singulis *Titulis* cadunt , proponimus ; atque una ea , quæ jam inventa sunt , & in Hominum potestate , atque *Impossibilibus* illis , & in Inventis , sunt *proxima* , & maxime cognata , subjungimus ; ut simul & *Industria* humana excitetur , atque animi ad-  
dantur.

Patet ex antedictis , *Historiam* præsentem , non tantum *Tertiæ Partis Instaurationis* vices supplere , sed præparationem esse non contemnendam ad *Quartam* , propter *Titulos ex Abecedario* , & *Topica* , & ad *Sextam* , propter *Observationes Majores* , *Commentationes* , & *Canones*.



# HISTORIA VENTORUM.

ADITUS,

SIVE

PRÆFATIO.

**V**enti humana Genti alas addiderunt. Eorum enim dono, feruntur Homines, & volant; non per Aërem certe, sed per Maria; atque ingens patet janua Commercii, & fit mundus parvus. Terra autem (quæ Gentis Humana Sedes est, & Domicilium) Scopæ sunt: Eamque, atque simul Aërem ipsum, everrunt & mundant. Attamen & Mare infamant, alioqui tranquillum, & innoxium; neque alias sine maleficio sunt. Motum, absque opera humana, cient magnum, & vehementem; unde & ad Navigandum, & ad Molendum, veluti Operarii conducti sunt; & ad multo plura adhiberi possunt, si Humana non cesset Diligentia. Natura ipsorum inter secreta, & abdita reponi solet; Nec mirum, cum neo Aëris Natura, & Potestas, cognita quoque modo sit; cui famulantur, & parasitantur Venti, ut (apud Poetas) Æolus Iunoni. Primaria Creatura non sunt, nec ex Operibus sex Dierum: quemadmodum nec reliqua Meteora quoad Actum; sed Post-nati, ex Ordine Creationis.

Topica



## Topica Particularia;

S I V E,

### *Articuli Inquisitionis de Ventis.*

#### NOMINA VENTORUM.

- I. **D**escribito Ventos, ex diligentia Nautica, & imposito nomina ipsis, sive vetera, sive nova, modo constantia.

*Venti vel Generales sunt, vel Stati, vel Affecla, vel Liberi. Generales voco, qui semper flant; Statos, qui certis temporibus; Affeclas, qui frequentius; Liberos, qui indifferenter.*

#### VENTI GENERALES.

2. An sint *Venti* aliqui *Generales*, atque ipsissimi Motus Aëris; & si sint, in qua consecutione Morus, & in quibus locis spirent?

#### VENTI STATI.

3. Qui *Venti Anniversarii* sint, aut redeuntes per vices, & in quibus Regionibus? An inveniatur *Ventus* aliquis ita præcise *Status*, ut redeat regulariter ad dies certos, & horas, instar *Æstus Maris*?

A

VEN-

## HISTORIA VENTI ASSECLÆ.

4. Qui *Venti* sint *Affecta*, & familiares *Regionum*; qui *Temporum*, in iisdem *Regionibus*; qui *Verni*; qui *Æstivales*; qui *Autumnales*; qui *Brumales*; qui *Æquinoctiales*; qui *Solstitiales*; qui *Matutini*, *Meridiani*, *Vespertini*, *Nocturni*?

5. Quales sint *Venti Marini*, quales qui spirant à *Continente*? *Differentias* autem *Marinorum*, & *Terrestrium* diligenter excipito, tam eorum qui in *Terra*, & *Mari*; quam eorum, qui à *Terra*, & *Mari*.

## VENTI LIBERI.

6. An non spirent *Venti* ex omni *Plaga Cœli*.

*Venti non multo plus Plagis Cœli, quam Qualitatibus variant. Alii Vehementes, alii Lenes; alii Constantes, alii Mutabiles; alii Calidi, alii Frigidi, alii humectant magis, & solvunt, alii desiccant, & constipant; alii congregant nubes, & sunt pluviosi, vel etiam procellosi, alii dissipant, & sunt sereni.*

## QUALITATES VENTORUM DIVERSÆ.

7. Inquirito & narrato, qui sint *Venti* uniuscuiusque speciei ex prædictis, & quomodo variant, secundum *Regiones*, & *Loca*?

*Origines locales Ventorum triplices: aut  
deji-*



## VENTORUM. 3

*dejiciuntur ex alto ; aut emanant à terra ; aut conflantur in ipso Corpore Aëris.*

### ORIGINES LOCALES VENTORUM.

8. Secundum has tres *Origines*, de *Ventis* inquireto. Qui scilicet ex ipsis dejiciantur de *media* ( quam vocant ) *Regione Aëris* ; Qui vero expirent è *Cavis Terra* ; sive illi erumpant confertim , sive essent insensibiliter , & sparsim ; & postea glomerent , ut rivuli in fluvium ; Qui denique generentur passim ex tumoribus , sive expansionibus *Aëris proximi* ?

*Neque generationes Ventorum Originales tantum : Sunt & Accidentales , ex compressionibus Aëris scilicet , & percussionibus , & repercussionibus ejus.*

### GENERATIONES ACCIDENTALES

#### VENTORUM.

9. De hujusmodi *Ventorum Generationibus Accidentilibus* inquireto. *Generationes Ventorum* proprie non sunt ; etenim augent , & fortificant Ventos potius , quam producunt & excitant.

*De communitate Ventorum hætenus. Reperiuntur autem Ventus Rarus , & Prodigiosus , quales sunt Præster , Turbo , Ecnephias. Hi super terram : At sunt & subterranei , quorum alii sunt Vaporosi , & Mercuriales , ii percipiuntur in Mineris ; Alii Sulphurei ; illi emit-*

*tuntur, nacti exitum in Terra Motibus, aut etiam effervescunt ex Montibus ardentibus.*

VENTI EXTRAORDINARII ET  
FLATUS REPENTINI.

10. De hujusmodi *Ventis*, *Raris* & *Prodigiosis*, atque adeo de omnibus *Ventorum Miraculis*, inquireto.

*A speciebus Ventorum transeat Inquisitio ad Confacientia ad Ventos, (ita enim loqui volumus, quia vocabulum Efficientis plus significat, Vocabulum Concomitantis minus quam intelligimus) atque ad ea, qua Ventos putantur excitare, aut sedare.*

CONFACIENTIA AD VENTOS,  
ET EXCITANTIA, ET  
SEDANTIA IPSOS.

11. Circa *Astrologica* de *Ventis* inquireto parce, nec de accuratis *Schematibus Cæli* curato; tantummodo observationes manifestiores, de *Ventis* ingruentibus circa exortus aliquorum *Astrorum*; aut circa *Eclipses Luminarium*; aut *Conjunctiones Planetarum*, ne negligito; nec minus, quatenus pendent ex viis *Solis*, aut *Lunæ*.

12. Quid confaciant *Meteora* diversorum generum ad *Ventos*? quid *Terra Motus*, quid *Imbres*, quid *Concursus Ventorum* ad invicem? *Concatenata* enim sunt ista, & alterum alterum trahit.

13. Quid

13. Quid confaciant ad *Ventos*, *Vaporum* & *Exhalationum* diversitas? & quæ ex ipsis sint magis generativa *Ventorum*; & quatenus *Natura Ventorum* sequatur hujusmodi *Materias* suas?

14. Quid confaciant ea quæ hic in *Terra* sunt, aut fiunt, ad *Ventos*; Quid Montes, & solutiones Nivium in ipsis; Quid Moles glaciales, quæ in Mari innatant, & deferuntur alicubi; Quid differentia Soli, aut Terræ, (modo hoc fuerit per Tractus Majores) veluti Paludes, Arenæ, Sylvæ, Campetria; Quid ea, quæ hic apud Homines aguntur, veluti Incensiones Ericæ, & similibus, ad culturam agrorum; Incensiones Seggetum, aut villarum in Bellis; Desiccationes Paludum; Dispositiones continuæ Bombardarum; Sonitus Campanarum simul in magnis Urbibus; & similia? Festuæ certe sunt res nostræ, sed tamen aliquid possunt.

15. De omnimodis *Excitationibus*, aut *Sedationibus Ventorum* inquirito; sed parce de Fabulosis, aut Superstitiosis.

*A Confacientibus ad Ventos, transeat Inquisitio, ad inquirendos Limites Ventorum: de Altitudine; Extensione; Duratione eorum.*



## LIMITES VENTORUM.

16. Inquirito diligenter de *Altitudine*, five *Elevatione Ventorum*; atque si sint *Fastigia Montium*, ad quæ *Venti* non aspirant; aut si conspiciantur *Nubes* quandoque stare, & non movere, flantibus eodem tempore *Ventis* fortiter hic in *Terra*.

17. Inquirito diligenter de *spatiis*, quæ *Venti* deprehensi sunt simul occupare, & ad quos terminos? Exempli gratia, si *Auster* flaverit tali loco, an constet, quod eodem tempore, *Aquilo* flaverit ab illinc milliaribus decem? Contra, in quantas angustias *Venti* redigi possint, ita ut fluant *Venti* (id quod fieri videtur in *Turbinibus* nonnullis) tanquam per canales.

18. Inquirito, ad quod tempus, vel maximum, vel medium, vel minimum, continuari soleant *Venti*, & deinde flaccescere, & tanquam expirare: qualis etiam esse soleat *Ortus*, & inceptio *Ventorum*, qualis languor & cessatio; subito, gradatim, quoquo modo?

*A limitibus Ventorum transeat Inquisitio ad successiones Ventorum, vel inter se, vel respectu Pluvie, & Imbrium. Cum enim choreas ducant, ordinem Saltationis nosse iucundum fuerit.*

## SUCCESSIONES VENTORUM.

19. An sit aliqua Regula, aut observatio paulo certior, de *successionibus Ventorum* ad invicem, sive ea sit in ordine ad Motum Solis, sive alias; & si sit, qualis sit illa?

20. Circa *Successionem & Alternationem Ventorum*, & *Pluvia* inquirito; cum illud familiare, & frequens sit, ut *pluvia* sedet *Ventos*, *Venti* compefcant & dissipent *Pluviam*.

21. An post certam *Periodum* Annorum, redintegretur *Successio Ventorum*, & si ita sit, quæ sit ea *Periodus*?

*A Successionibus Ventorum, transeat Inquisitio ad Motus ipsorum. Motus Ventorum, septem Inquisitionibus absolvuntur: Quorum tres, superioribus Arithmetis continentur, quatuor adhuc manent intacta. Nam de Motu Ventorum dispersio per Plagas Coeli, inquisitum est. Etiam de Motu trium Linearum sursum, deorsum, latera-liter. Etiam de Accidentali Motu Compressionum. Restant Motus quartus Progressivus; quintus Undulationis; Sextus Conflictus; Septimus in Organis, & Machinis humanis.*

## MOTUS DIVERSI VENTORUM.

22. Cum *Progressus* sit semper à termi-

no; de loco primi Ortus, & tanquam Fontibus alicujus *Venti*, quantum fieri potest, diligenter inquirito. Siquidem videntur *Venti Fama* similes. Nam licet tumultuentur, & percurrant, tamen *caput inter nubila condunt*. Item de *Progressu* ipso. Exempli gratia: Si *Boreas* vehemens, qui flaverit *Eboraci* ad talem diem, aut horam, flaverit *Londini* biduo post?

23. De *Vndulatione Ventorum* Inquisitionem ne omittito. *Vndulationem* vocamus cum motum, quo *Ventus* ad parva intervalla intenditur, & remittitur, tanquam undæ Aquarum: quarum vices optime percipiuntur ex auditu in ædibus. Eo autem magis notato diligenter differentias *Vndulationis*, sive *Sulcationis* inter Aërem & Aquam, quia in *Aëre* & *Ventis* deest Motus gravitatis, qui pars magna est *Vndulationis* in Aquis.

24. De *Conflictu*, & *Concursu Ventorum*, flantium ad idem tempus, diligenter inquirito. Primo utrum flent simul plures *Venti Originales*, non dicimus Reverberantes? Et, si hoc ita sit, quales *Euripos* in Motu, quales rursus *Condensationes*, & *Alterationes* in Corpore Aëris, gignant?

25. An *Venti* alii eodem tempore flent superius, alii hic apud nos in imo? quandoqui-



doquidem observatum est à nonnullis, interdum nubes ferri in contrarium versio-  
nis Pinnaculi : Etiam nubes ferri forti Au-  
ra, cum hic apud nos fuerit summa Tran-  
quillitas.

26. Fiat descriptio diligens admodum,  
& particulatis *Motus Ventorum*, in impulsu  
*Navium* per vela.

27. Fiat Descriptio *Motus ventorum* in  
velis *Molendinorum*, ad *Ventum*; in volatu  
Accipitrum & Avium, etiam in vulgaribus,  
& ludicris, veluti Signorum explicatorum,  
Draconum volantium, Duellorum ad ven-  
tum, &c.

*A Motibus Ventorum transeat Inquisitio  
ad vim, & Potestates ipsorum.*

#### POTESTATES VENTORUM.

28. Quid possint, & agant *Venti*, circa  
*Currentes*, & *Æstus* Aquarum, & circa  
Detentiones, Immissiones & Inundationes  
ipsarum?

29. Quid circa *Plantas*, & *Insecta*, indu-  
cendo Locustas, Erucas, malos Rores?

30. Quid circa *Purgationem*, & *Infectio-  
nem* Aëris, & circa *Pesilentias*, morbos,  
& affectus Animalium?

31. Quid circa *delationem specierum* (quas  
vocant) *spiritualium*, ut *Sonorum*, *Radio-  
rum*, & similium?

*A Potestatibus Ventorum, transeat Inquisitio ad Prognostica Ventorum, non solum propter usum Prædictionum, sed quia manu ducunt ad Causas: Prognostica enim, aut præparationes rerum monstrant, antequam perducantur ad Actum; aut Inchoationes, antequam perducantur ad sensum.*

#### PROGNOSTICÆ VENTORUM.

32. Colligantur, cum diligentia bona, *Prognostica Ventorum omnigena* ( præter *Astrologica*, de quibus superius diximus, quatenus sint inquirenda ) sive petantur ex *Meteoricis*, sive ex *Aquis*, sive ex *Instinctu Animalium*, aut quovis alio modo.

Postremo *Inquisitionem claudito*, inquirendo de *Imitamentis Ventorum*, sive in *Naturalibus*, sive in *Artificialibus*.

#### IMITAMENTA VENTORUM.

33. Inquirito de *Imitamentis Ventorum*, in *Naturalibus*: qualia sunt *Flatus in Corporibus Animalium*, *Flatus in receptaculis Distillationum*.

Inquirito de *Auris factis*, & *Ventis Artificialibus*, ut *Follibus*, *Refrigeratoriis in cœnaculis*, &c.

Articuli tales sint. Neque nobis dubium est, quin ad nonnullos horum responderi non possit, secundum copiam *Experientiæ*, quam habemus. Verum quem-

quemadmodum in Causis Civilibus; quid causa postulet, ut interrogetur, noverit Jureconsultus bonus; quid Testes respondere possint, non norit: Idem nobis circa *Historiam Naturæ* accidit. Posterius cætera viderint.

## HISTORIA.

*Nomina*

### VENTORUM.

*Ad Artic. I.*



omina *Ventis*, potius ex ordine, & gradibus, numerata, quam ex Antiquitate propria, imponimus: hoc perspicuitatis, & memoriæ gratia. Sed Vocabula antiqua adjicimus quoque, propter suffragia Authorum veterum, ex quibus cum haud pauca (licet anxio quodam judicio) exceperimus, non agnoscantur fere illa, nisi sub nominibus, quibus illi usi sunt. Partitio autem generalis ea esto: ut sint *Venti Cardinales*, qui spirant à Cardinibus Mundi; *Semicardinales* qui in dimidiis; *Mediani* qui in intermediis: Etiam ex Intermediis *Mediani Majores* vocen-



vocentur, qui in quadris, *Minores* reliqui. Particularis autem divisio ea est, quæ sequitur.

- Cardin. *Boreas.*  
*Bor. 1. ad Eurum.*  
 Med. Maj. *Bor. 2. ad Eurum, sive Aquilo.*  
*Bor. 3. ad Eurum, sive Meses.*  
 Semicar. *Euroboreas.*  
*Eurus 1. à Borea.*  
 Med. Maj. *Eurus 2. à Borea, sive Cacias.*  
*Eur. 3. à Borea.*
- 

- Cardin. *Eurus, sive Subsolanus.*  
*Eur. 1. ad Austrum.*  
 Med. Maj. *Eur. 2. ad Aust. sive Vulturnus.*  
*Eur. 3. ad Aust.*  
 Semicar. *Euro-Auster.*  
*Auster 1. ab Euro.*  
 Med. Maj. *Aust. 2. ab Euro, sive Phœncias.*  
*Aust. 3. ab Euro.*  
 Cardin. *Auster, sive Notus.*  
*Aust. 1. ad Zephyrum.*  
 Med. Maj. *Aust. 2. ad Zeph. sive Libonatus.*  
*Aust. 3. ad Zephyrum.*  
 Semicar. *Zephyro-aust. sive Libs.*

## VENTORUM.

13

*Zephyr. 1. ab Austro.*

Med. Maj. *Zeph. 2. ab Aust. sive Africus.*

*Zeph. 3. ab Austro.*

---

Cardin. *Zephyrus, sive Favonius.*

*Zeph. 1. ad Boream.*

Med. Maj. *Zeph. 2. ad Bor. sive Corus.*

*Zeph. 3. ad Boream.*

Memicar. *Zephyro-boreas.*

*Boreas 1. à Zephyro ; sive  
Thrafcias.*

Med. Maj. *Bor. 2. à Zeph. sive Circius.*

*Boreas 3. à Zephyro.*

Sunt & alia Ventorum nomina, *Apeliotes, Argestes, Olympias, Scyron, Hellefpontius, Iapix.* Ea nil moramur. Satis fit Nomina Ventorum ex ordine, & distributione plagarum cœli, fixa imposuisse. In Interpretatione Authorum non multum ponimus, cum in ipsis Authoribus parum sit.

## VENTI LIBERI.

*Ad Artic. 6.*

1. **N**on est plaga cœli, unde *Ventus* non spiret : Quin si plagas cœli in tot partes dividas, quot sunt gradus in  
*Hori-*

*Horizonte*, invenias *Ventos* aliquando alicubi à singulis flantes.

2. Sunt *Regiones* totæ, in quibus non pluit, aut raro admodum: At non sunt *Regiones*, ubi non flent *Venti*, & sæpius.

## VENTI GENERALES.

### *Ad Art. 2.*

**D**e *Ventis Generalibus* Phænomena rata. Nil mirum, cum intra *Tropicos* præcipue perspiciantur loca damnata, apud Antiquos.

Constat navigantibus inter *Tropicos*, libero æquore flare *Ventum* constantem, & jugem (*Brizam* vocant Nautæ) ab Oriente in Occidentem. Is non ita segnis est, quin partim flatu proprio, partim regendo *Currentem Maris*, id efficiat, ut nequeant Navigantes versus *Peruviam*, eadem redire, qua proficiscuntur, via.

2. In nostris Maribus *Europa*, percipitur cœlo sereno, & sudo, & cessantibus *Ventis* particularibus, Aura quædam lenis ab Oriente, solisequa.

3. Recipit observatio vulgaris, nubes sublimiores ferri plerunque ab Oriente in Occidentem, idque cum iisdem temporibus



bus circa terram aut tranquillitas sit, aut *Ventus* diversus. Id si non semper faciant, poterit in causa esse, quod *Venti* particulares quandoque fiant in sublimi, qui *Ventum* istum Generalem obruunt.

MONITUM. Si quis sit talis *Ventus* Generalis, ex ordine *Motus* cœli, is non adeo firmus est, quin *Ventis* Particularibus cedat. Manifestior autem est intra *Tropicos*, propter *Circulos*, quos conficit, majores; Etiam in sublimi, propter eandem causam, & propter cursum liberum. Quamobrem, si hic extra *Tropicos*, & juxta terram, (ubi mollis admodum, & segnis est) eum deprehendere voles, fiat Experimentum in *Aëre* libero, & in summa tranquillitate, & in locis altis; & in corpore valde mobili, & tempore pomeridiano, quia per id Tempus, *Ventus* Orientalis particularis, parcius fiat.

MANDATUM. Fiat diligens observatio, circa *Pinnacula*, & ejusmodi *stabella*, in fastigiis *turrium* & *templorum*, An non in maximâ tranquillitatibus, sient perpetuo versus Occidentem?

## PHENOMENON OBLIQUUM.

4. Constat *Eurum*, in *Europa* nostra, esse *Ventum* desiccantem & acrem, *Zephyrum* contra humectantem & alnum. An-

not.

non hoc sit, quia (posito quod aër moveat ab Oriente in Occidentem) necesse est, ut Eururus qui moveat in eadem Consecutione, Aërem dissipet, & attenuet, unde fit Aër mordax, & si quis, Zephyrus, autem, qui in contraria, Aërem in se vertat, & condenset, unde fit obtusior, & demum humidus.

PHÆNOMEMON OBLIQUUM.

5. Consulito Inquisitionem de Motu, & fluxu Aquarum, utrum illæ moveant ab Oriente ad Occidentem. Nam si extrema hoc motu gaudeant, Cælum & Aqua, parum abest, quin Aër, qui intermedius est, ex eodem participet.

MONITUM. Phænomena duo, proxime posita, Obliqua appellamus, quia rem designatam non recta monstrant, sed per consequens; id quod (cum deest copia Phænomenorum Rectorum) etiam arvide recipimus.

MANDATUM. Quod Briza illa, inter Tropicos luculenter spiret, res certa, Causa ambigua. Possit ea esse, quia Aër, more cæli, movetur; Sed extra Tropicos, quasi imperceptibiliter, propter circulos minores; intra, manifestò, propter Circulos majores, quos conficit. Possit alia esse, quia calor omnem Aerem dilatat, nec se priore loco contineri patitur. Ex dilatatione autem aëris,

*ris, necessario fit impulsio aëris contigui, quæ Brizam istam pariat prout progreditur Sol. Sed illa intra Tropicos, ubi Sol est ardentior, insignior est; extra, fere latet. Videtur esse Instantia Crucis, ad ambiguitatem istam tollendam, si inquiratur, utrum Briza noctu flet, an non? Rotatio enim Aëris etiam noctu manet, at calor Solis non item.*

6. At cerrum est illam noctu non flare, sed mane, aut etiam aurora adulta. Nihilominus non determinat illa *Instantia* quæstionem. Nam condensatio Aëris nocturna, præsertim in illis regionibus, ubi nox & dies non magis pares sunt spatiis, quam differentes calore & frigore, possit Motum illum naturalem Aëris (qui lenis est) hebetare, & confundere.

7. Si Aër participet ex Motu cœli, sequitur non tantum, quod *Eurus* cum motu Aëris concurrat, *Zephyrus* concertet; verum etiam, quod *Boreas* tanquam ab alto spiret, *Auster* tanquam ab imo, in hemisphærio nostro, ubi *Polus Antarcticus* sub terra est, *Arcticus* elevatur; idque etiam ab antiquis notatum est, sed titubanter & obscure; optime autem convenit cum experientia moderna, quia *Briza* (quæ possit esse Motus Aëris) non est *Eurus* integer, sed *Euroaquilo*.



## VENTI STATI.

*Ad Artic. 3.*

## CONNEXIO.

**U**t in Inquisitione , de Ventis Generalibus , homines Scototomiam passi sunt ; Ita in illa , de Ventis Statis , vertiginem. De illa silent , de hac sursum , & deorsum , sermones faciunt inconditos. Ignoscendum hoc magis , quod varia res est ; quia Stati Venti cum locis permutantur , ut non iidem in Ægypto , Græcia , Italia , spirant.

1. Essealicubi *Statos Ventos* , etiam Nomen impositum declarat ; ut & Nomen alterum *Etesiarum* , quod *Anniversarios* sonat.

2. Apud Antiquos , inter causas Inundationis *Nili* , ascripta est , quod eo Anni tempore , *Venti Etesia* ( *Aquilones* scilicet ) flarent , qui cursum fluvii in Mare inhibebant , & retrorsumolvebant.

3. Inveniuntur in Mari *Currentes* , qui nec naturali motui Oceani , nec decursui ex locis magis elevatis , nec Angustiiis ex litoribus adversis , aut Promontoriis excurrentibus attribui possint ; sed plane reguntur à *ventis Statis*.

4. Co-

4. *Columbum* qui nolunt à relatione *Nacleri Hispani*, & levius putant, ab obscuris Antiquitatis vestigiis, & auris, tam certam, & fixam, de *Indiis Occidentilibus*, opinionem concepisse, huc se convertunt, quod à *Statis Ventis*, ad litora *Lusitania*, conjecerit, *Continentem* esse à parte Occidentis : Res dubia, nec admodum probabilis, cum *Ventorum* Itinerarium, ad tam longos tractus vix attingat : Magnus interim honos huic Inquisitioni, si uni Axiomati, aut Observationi, ex iis quas multas complectitur, Inventio Novi orbis debetur.

5. Ubicunque siti sunt Montes alti & nivales, ab ea parte flant *Venti Stati*, ad tempus, quo nives solvuntur.

6. Arbitror & à paludibus magnis, quæ aquis cooperiuntur hyeme, spirare *Ventos Statos*, sub tempora ; quibus à calore Solis siccati cœperint ; sed de hoc mihi compertum non est.

7. Ubicunque generationes vaporum fiunt in abundantia, idque certis temporibus ; ibi scias *Ventos Statos* iisdem temporibus orituros.

8. Si *Venti Stati* flent alicubi, nec causa eorum reperiatur in propinquo ; scias *Ventos* hujusmodi *Statos* peregrinos esse, & à longe venire.

9. No-

9. Notatum est, *Ventos Statos* noctu non flare, sed tertia, ab ortu Solis, hora insurgere: sunt certe hujusmodi *Venti*, veluti ex longo itinere defessi, ut condensationem aeris nocturnam vix perfringant, at post exortum Solis excitati, paulisper procedant.

10. Omnes *Stati Venti* (præterquam ex locis propinquis) imbecilli sunt, & *Ventis* subitis se submittunt.

11. Sunt complures *Venti Stati*, quos nos non percipimus, aut observamus, propter infirmitatem ipsorum, unde à ventis liberis obruuntur; Ideo vix notantur hyeme cum *Venti* liberi vagantur magis; sed potius versus æstatem, cum *Venti* illi Erratici magis deficiunt.

12. In partibus *Europa*, ex *Ventis Statis*, hi potissimi sunt. *Aquilones* à Solstitio: suntque exortus *Canicula*, tum prodromi, tum sequaces: *Zephyri*, ab Æquinoctio Autumnali, *Euri* à verno: Nam de Brumali Solstitio minus curandum, propter hyemis varietates.

13. *Venti Ornithii*, sive *Aviarii*, qui nomen traxerunt, quod Aves à regionibus gelidis transmarinis, regionibus apricis immittant, nihil pertinent ad *Ventos Statos*, quia illi tempore sæpius fallunt:  
Aves



Aves autem eorum commoditatem, sive citius, sive tardius fient, expectant; etiam non raro postquam flare paululum incœperint, & se subinde verterint, destituuntur Aves, & merguntur in pelago, aliquando in naves decidunt.

14. Placisus reditus *Ventorum* ad diem & horam, instar *Æstus Maris*, non invenitur. Designant quandoque Authores nonnulli diem; sed potius ex conjectura, quam ex observatione constante.

## VENTI ASSECLÆ.

*Ad Artic. 4. & 5.*

### CONNEXIO.

**V**entorum *Assēclatum* vocabulum nostrum est; quod imponere visum est, ne aut pereat observatio circa ipsos, aut confundatur. Sensus talis est. Divide, si placet, annum in tres, quatuor, quinque partes, in aliqua Regione. Quod si Ventus aliquis ibi flet, duas, tres, quatuor portiones ex ipsis; Ventus contrarius, unam; illum Ventum, qui frequentius flat, ejus regionis *asseclam* nominamus. Sic de temporibus.

1. *Auster & Boreas Assēcla* Mundi sunt; Frequentius enim per universum spirant illi,

illi, cum suis Sectionibus, quam *Eurus*, & *Zephyrus* cum suis.

2. Omnes *Venti Liberi* ( non *Stati* ) magis Affeclæ hyemis sunt, quam *Æstatis*, maxime autem *Autumni* & *Veris*.

3. Omnes *Venti Liberi*, potius Affeclæ sunt regionum extra *Tropicos*, atque etiam *Circulos polares*, quam intra; In regionibus enim torridis, & congelatis, plerumque parcius spirant, in mediis frequentius.

4. Etiam omnes *Venti Liberi*, præsertim fortiores ex ipsis, flant sæpius, & intensius, Mane & *Vesperis*, quam meridie & noctu.

5. *Venti Liberi* in regionibus fistulosis & cavernosis, frequentius spirant, quam in firmis, & solidis.

MANDATUM. Cessavit fere humana diligentia in observatione Ventorum Affeclarum, in regionibus particularibus, quod tamen fieri debuit, & ad multa utilis foret. Memini me à Mercatore quodam, prudenti viro, qui ad Terram Piscationis, coloniam duxerat, ibique hyemarat, causam quasivisse, cur regio illa tam impense frigida haberetur, cum clima satis benignum esset. Respondit, rem esse fama aliquanto minorem; causam autem duplicem: Vnam, quod  
moles

moles glaciales, à Currenti maris Scythici, juxta ea litora deveherentur. Alteram (quam longo potiore duxit) quod longe pluribus Anni partibus spiraret apud eos Zephyrus, quam Euris; quod etiam facit apud nos (inquit;) sed apud illos à Continenti, & gelidus; apud nos à Mari, & tepidus. Quod si (addidit) tam frequenter & diu spiraret in Anglia Euris, quam apud eos Zephyrus, longe forent intensiora frigora apud nos, & paria illis, quæ ibi fiunt.

6. Zephyri sunt Affecla horarum pomeridianarum: Declinante enim Sole frequentius spirant *Venti* ab Occidente, ab Oriente rarius.

7. *Auster* noctis Affecla est; nam nocturnus & sæpius oritur, & flat vehementius. *Boreas* autem interdiu.

8. *Affeclarum* vero Maris, & Continentis, multæ & magnæ sunt differentia. Ea præcipue, quæ *Columbo* ansam præbuit inveniendi Novi Orbis: Quod *Venti* marini *Stati* non sunt, terrestres autem maxime. Cum enim abundet vaporibus mare, qui ubique fere indifferenter adsunt, ubique etiam generantur *Venti*, & magna inconstantia huc illuc feruntur, cum certas origines, & fontes non habeant. At terra, ad Materiam *Ventorum*, valde inæqua-



qualiter se habet; alia loca ad *Ventos* pariendos, & augendos, magis efficacia sint; alia magis destituta. Itaque flant fere à parte fomitum suorum, & inde directionem fortiuntur.

9. Non satis constat sibi *Acosta*. Ait ad *Peruviam*, & maritima *Maris Australis*, fere per totum Annum, spirare *Austros*. Idem alibi ait, ad eas oras, spirare potissimum *Ventos Marinos*. At *Auster* illis terrestris est, ut & *Boreas*, & *Eurus*, tantumque *Zephyrus* est illis marinus. Sumendum quod certius ponit, hoc est, *Austrum* esse *Ventum Asseclam*, & familiarem earum regionum; nisi forte ex nomine *Maris Australis*, vel phantasiam, vel modum loquendi corrumpit, intelligens *Zephyrum* per *Austrum*, quod à Mari Australi spiret. At Mare, quod vocant *Australe*, proprie *Australe* non est, sed tanquam Oceanus secundus Occidentalis; quando simili, cum *Atlantico*, situ exporrigatur.

10. Marini *Venti* sunt proculdubio terrestribus humidiores, sed tamen puriores, quique facilius, & æqualius, cum Aëre puro incorporentur. Terrestris enim male coagmentati, & fumei. Neque opponat quispiam, eos debere esse, propter sal-  
fugi-

fuginem Maris, crassiores. Natura enim terrestris salis, non surgit in vaporibus.

11. Tepidi, vel gelidi sunt *Ventimari*, pro ratione qualitatū duarum prædictarum, humiditatis, & puritatis. Humiditate enim frigora mitigant, (siccitas siquidem utrumque, & calorem, & frigus, intendit:) at puritate refrigerant. Itaque extra Tropicos, tepidi, intra, gelidi.

12. Arbitror ubique *ventos* marinos, Affeclas esse regionum (præsertim maritimarum) singularum; frequentius scilicet spirare *ventos*, à parte, ubi collocatur mare; propter copiam longe uberiorem Materiæ, ad *ventos* in mari, quam in Terra: nisi forte sit aliquis *ventus* status, spirans à terra, ex causa peculiari. Nemo autem confundat *ventos* statos, cum *ventis* Affeclis, cum Affeclæ semper frequentiores sint; statī, sæpius rariores. Id tamen utrisque commune est, quod *venti* spirant à parte fomitum suorum.

13. Vehementiores plerunque sunt *venti* marini, quam terrestres, ita tamen, ut cum cessent, major sit Malacia in medio Mari, quam ad littora; adeo ut Nautæ quandoque ament, potius litorum obliquitates premere, quam urgere altum; ad evitandas Malacias.

B

14. Spi-

14. Spirant à Mari ad litora *Venti Tropici*, sive versarii, qui scilicet, postquam paulisper progressi sunt, subito vertuntur. Omnino est quædam refraction inter Auras maris, & Auras terræ, & inæqualitas. omnis autem inæqualitas Aëris, est inchoatio quædam *Venti*. Maxime autem fiunt *Tropici & Euripi Ventorum*, ubi mare sinuat.

15. Spirant quædam Auræ plerunque circa omnes Aquas majores; potissimum autem sentiuntur mane; at magis circa fluvios, quam in mari, propter differentiam auræ Terræ, & auræ Aquæ.

16. In locis proximis juxta mare, flectunt fere se arbores, & incurvant, quasi averſantes auras maris. Neque tamen malicia est; sed *Venti* maritimi, ob humiditatem, & densitatem, sunt tanquam ponderosiores.

### Qualitates & Potestates Ventorum.

*Ad Artic. 7. 28. 29. 30. 31.*

#### CONNEXIO.

**C**irca Qualitates & Potestates Ventorum, observatum est ab hominibus, non diligenter, & varie: Nos certiora excerpimus.



*cerpimus; reliqua, ut levia, ipsis Ventis per-*  
*mittemus.*

1. *Auster* Pluviosus, *Boreas* Serenus apud nos sunt: Alter nubes congregat, & fovet, Alter dissipat, & discutit. Itaque *Poëta*, cum narrant de *Diluvio*, fingunt, eo tempore, *Boream* in carcere conclusum; *Austrum* cum Amplissimis mandatis emissum.

2. *Zephyrus* apud nos pro *Aurea Ætatis Vento* habitus est, qui comes esset perpetui veris, & mulceret flores.

3. *Paracelsi* Schola, cum tribus suis principiis, etiam in *Templo Iunonis* (Aëre scilicet) locum quærerent, tres collocarunt; *Euro* locum non reppererunt.

*Tincturis liquidum qui Mercurialibus*  
*Austrum,*

*Divitis & Zephyri vorantes Sulphure*  
*venas,*

*Et Boream tristi rigidum sale.*

At nobis, in *Britannia*, *Eurus* pro Malefico habetur, ut in proverbio sit, *Eurum*, neque homini, neque bestię, propitium esse.

5. *Auster* à præsentia Solis, *Boreas* ab absentia spirat, in hemisphærio nostro: *Eurus* in Consecutione Motus Aëris, *Zephyrus* à Mari, *Eurus* à Continente: ple-

runque in *Europa*, & *Asia* Occidentali. Hæ sunt differentię *Ventorum*, maxime radicales, unde plurimæ ex qualitatibus, & potestatibus *ventorum*, revera pendent.

6. *Auster* minus Anniversarius est, & status, quam *Boreas*, sed magis vagus, & liber; & quando est status, tam lenis est, ut vix percipiatur.

7. *Auster* magis humilis est, & lateralis, *Boreas* celsior, & spirans ex alto; neque hoc de Elevatione, & depressione polari dicimus, de qua supra, sed quod origines suas habeat plerunque magis in vicino *Auster*, magis in sublimi *Boreas*.

8. *Auster* nobis pluviosus (ut jam dictum est) *Africa* vero serenus, sed magnos immittens fervores, non frigidus, ut alii dixerunt. Est tamen *Africa* satis salubris; At nobis, si flaverit paulo diutius in sudo, absque pluvia *Auster*, valde pestilens est.

9. *Auster* & *Zephyrus* non generant vapores, sed spirant à partibus, ubi maxima est copia ipsorum, propter auctum calorem Solis, qui vapores elicit, ideoque sunt pluviosi. Quod si spiraverint à locis siccioribus, & jejunis à vaporibus, sunt sereni; sed tamen aliquando puri, aliquando æstuosi.

10. Videntur hic apud nos *Auster* & *Zephyrus* fœderati, suntque tepidi & humidi; at ex altera parte Affines sunt *Boreas* & *Eurus*, suntque frigidi, & sicci.

11. *Auster* & *Boreas* (quod & antea attigimus) frequentius spirant, quam *Eurus*, & *Zephyrus*; quia magna est inæqualitas vaporum, ex illis partibus, propter absentiam, & præsentiam Solis; At Orienti, & Occidenti, Sol tanquam adia-phorus est.

12. *Auster* saluberrimus marinus, à continente magis morbidus; contra *Boreas* à mari suspectus, à terra sanus; Etiam frugibus & stirpibus *Auster* marinus valde benignus, fugans rubigines, & alias pernicies.

13. *Auster* lenior non admodum cogit nubes, sed sæpe serenus est, præsertim si sit brevior; Sed flans commotius, aut diutius, facit cœlum nubilum, & inducit pluviam: sed potius cum desinat, aut flaccessere incipiat, quam à principio, aut in ipso vigore.

14. Cum *Auster* aut oritur, aut desistit, fiunt fere Mutationes tempestatum, à sereno ad nubilum, aut à calido ad frigidum, & è contra; *Boreas* sæpe, & oritur, & desinit, priore tempestate manente, & continuata.



15. Post pruinas, atque etiam Nives paulo diuturniores, non alius fere *Ventus*, quam *Auster* spirat, tanquam facta concoctione frigorum, quæ tum demum solvuntur, neque propterea semper sequitur pluvia, sed fit hoc etiam in relegationibus serenis.

16. *Auster*, & frequentius oritur, & fortius spirat, noctu, quam interdiu, præsertim noctibus hybernis. At *Boreas*, si noctu oriatur (quod contra suam consuetudinem est) non ultra triduum fere durat.

17. *Austro* flante, majores volvuntur fluctus, quam *Borea*, etiam quando pari, aut minore impetu, spirat.

18. Spirante *Austro*, fit Mare cœruleum, & magis lucidum, *Borea* contra, atrius, & obscurius.

19. Cum Aër subito fit tepidior, denotat interdum pluviam: rursus alias, cum Aura subito fit gelidior, pluviam præmonstrat. Sequitur vero hoc naturam *Ventorum*: nam si flante *Austro* aut *Euro* intepescit Aër, pluvia in propinquo est, itidemque cum flante *Septentrione* aut *Zephyro*, refrigerat.

20. *Auster* flat plerumque integer, & solitarius. At *Borea*, & præcipue *Cacia*,

& *Coro* flantibus, sæpe contrarii, & alii diversi *Venti*, simul spirant; unde refringuntur, & turbantur.

21. *Boreas* sementi faciendæ, *Auster* Infectionibus, & Inoculationibus, cavendus.

22. A parte *Austri*, folia ex arboribus citius decidunt. At palmites vitium, ab ea parte erumpunt, & eò fere spectant.

23. In latis pascuis, videndum est pastoribus (ut ait *Plinius*) ut greges ovium, ad *Septentrionale* latus adducant, ut contra *Austrum* pascant. Nam si contra *Boream*, claudicant, & lippiunt, & alvo moventur: Quin etiam *Boreas* coitum illis debilitat adeo, ut si in hunc *Ventum* spectantes coëant oves, fœmellæ ut plurimum gignantur: Sed in hoc *Plinius* (utpote transcriptor) sibi non constat.

24. *Venti* tribus temporibus, frumento & segetibus nocent: in flore aperiente, & deflorescente, & sub maturitatem: tum enim exinaniunt aristas dejectis granis, at prioribus duobus temporibus, florem, aut in calamo constringunt, aut decutiunt.

25. Flante *Austro* anhelitus hominum magis fœtet, Appetitus animalium dejicitur magis, morbi pestilentes grassantur, gravedines incumbunt, homines magis pigri sunt, & hebetes: At flante *Borea*,

magis alacres, sani, avidiores cibi. Phthificis tamen nocet *Boreas*, & tussiculosis, & podagricis, & omni fluxui acuto.

26. *Eurus* ficcus, mordax, mortificans; *Zephyrus* humidus, clemens, almus.

27. *Eurus* spirans vere adulto, calamitas fructuum, inducendo erucas & vermes, ut vix foliis parcat; nec æquus admodum segetibus: *Zephyrus* contra, herbis, floribus, & omni vegetabili, maxime propitius, & amicus. At *Eurus* quoque, circa æquinoctium autumnale, satis gratosus.

28. *Venti* ab Occidente spirantes, sunt vehementiores, quam illi ab Oriente, & magis curvant, & contorquent arbores.

29. Tempestas pluviosa quæ incipit spirante *Euro*, longius durat, quam quæ spirante *Zephyro*, & fere ad diem integrum extenditur.

30. *Eurus* ipse, & *Boreas*, postquam inceperint flare, constantius flant: *Auster*, & *Zephyrus*, magis mutabiles.

31. Flante *Euro* visibilia omnia majora apparent. At flante *Zephyro* Audibilia. Etiam longius deferuntur Soni.

32. *Cœciam nubes ad se trahere*, apud *Græcos* in proverbium transiit, comparando ei *Fœneratores*, qui pecunias erogando, sorbent: vehemens est *Ventus*, & la-

us,



tus, ut non possit summovere nubes tam cito, quam illæ renitantur, & se vertant; quod fit etiam in majoribus incendiis, quæ contra *Ventum* invalescunt.

33. *Venti Cardinales*, aut etiam *Semicardinales*, non sunt tam procellosi, quam *Mediani*.

34. *Mediani*, à *Borea* ad *Euro-boream*, magis sereni: ab *Euro-borea* ad *Eurum*, magis procellosi. Similiter ab *Euro* ad *Euro-astrum*, magis sereni, ab *Euro-austro* ad *Astrum*, magis procellosi. Similiter, ab *Austro*, ad *Zephyro-astrum*, magis sereni, à *Zephyro-austro* ad *Zephyrum*, magis procellosi. Similiter, à *Zephyro* ad *Zephyro-boream*, magis sereni, à *Zephyro-borea* ad *Boream*, magis procellosi: Ita ut progrediendo secundum ordinem cœli, semper *Mediani* prioris Semicardinis, disponantur ad Serenitatem; posterioris, ad Tempestates.

35. Tonitrua, & fulgura, & Ecnephiae sunt, spirantibus *Ventis* frigidis, quique participant ex *Borea*, quales sunt *Corus*, *Thraescias*, *Circius*, *Meses*, *Cæcias*: Ideoque fulgura sæpius comitatur grando.

36. Etiam *Nivales Venti* à *Septentrione* veniunt, sed ab iis *Medianis*, qui non sunt procellosi, veluti *Corus*, & *Meses*.

37. Omnino *Venti* quinque modis naturas suas & proprietates nanciscuntur. Vel ab absentia aut præsentia Solis: vel à consensu & dissensu cum naturali motu Aëris: vel à diversitate Materię fomitum suorum à quibus generantur; Maris, Nivis, Paludum, &c. vel à tinctura regionum per quas pertranseunt: vel ab originibus localibus suis, in alto, sub terra, in medio: quæ omnia sequentes articuli melius explanabunt.

38. *Venti* omnes habent potestatem deficcandi, etiam magis quam ipse Sol; quia Sol vapores elicit; sed nisi admodum fervens fuerit, non dissipat; at *ventus* eos & elicit, & abducit: Attamen *Auster* minime omnium hoc facit, quin etiam saxa, & trabes sudant, magis flante nonnihil *Austro*, quam in tranquillo.

39. Martii magis longe deficcant, quam æstivi: adeo ut Artifices Instrumentorum Musicorum Martios expectent, ad Materiam Instrumentorum suorum deficcandam, eamque reddendam porosam, & sonoram.

40. *Venti* omnis generis purgant Aërem, eumque à putredine vindicant, ut Anni in quibus *venti* frequentius spirent, sint maxime salubres.

41. Sol Principum fortunam subit; quibuscum ita sæpe agitur, ut præfides in Provinciis remotis, magis obnoxios habeant subditos, & quibus obsequia præstentur magis, quam Principi ipsi. Certe *Venti* qui potestatem, & originem habent à Sole, æque, aut plus gubernant temperaturas regionum, & affectus Aëris, quam ipse Sol, in tantum, ut *Peruvia* (quæ propter propinquitatem Oceani, vastitatem Amnium, & altissimos, & maximos montes nivales, maximam habet copiam *Ventorum*, & aurarum spirantium) cum *Europa*, de temperamento, & clementia Aëris ceter.

42. Nil mirum si *Ventorum* tantus sit impetus, quantus invenitur, quandoquidem *Venti* vehementes, sint tanquam Inundationes, atque Torrentes, & Fluctus magni Aëris. Neque tamen, si attentius advertas, magnum quiddam est eorum potentia. Possunt deicere arbores, quæ cacuminum onere, tanquam velis expansis iisdem commoditatem præbent, & se ipsæ onerant; possunt etiam Ædificia infirmiora; sed structuras solidiores, nisi fiant cum terræ motibus, non subvertunt. Nives quandoque tanquam integras dejiciunt ex Montibus, ut planitiem subjacentem fere sepeliant, quod accidit *Solymanno* in campis



pis *Sultania*: Etiam magnas quandoque immittunt Inundationes aquarum.

43. Amnes quandoque tanquam in sicco ponunt *venti*, & fundos ipsorum discooperiunt: Si enim post magnam siccitatem, *Ventus* robustus in consecutione filii aquæ, pluribus diebus spirarit, ita ut aquas amnis, tanquam everrendo, devexerit in mare, Aquas marinas prohibuerit, fit Siccatio Amnis in multis locis insolitis.

MONITUM. *Verte* Polos, & *verte* simul *Observationes*, quatenus ad Austrum & Boream. Cum enim *Absentia*, & *Præsentia* Solis in causa sit, variat pro ratione polorum. At illud, constans res esse possit, quod plus sit Maris versus Austrum, plus sit Terra versus Boream, quod etiam ad Ventos non parum facit.

MONITUM. Mille modis sunt Ventii, ut ex Inquisitione sequenti patebit: Itaque in re tam varia, figere observationes, haud facile est. Attamen quæ à nobis posita sunt, pro certo plerumque obtinent.

## Origines locales Ventorum.

*Ad Artic. 8.*

### CONNEXIO.

Ventorum Origines locales nosse, ardua est Inquisitionis, cum illud Unde, & Quo Ventorum, ut res abdita, etiam in Scripturis notata sit. Neque loquimur jam de Fontibus Ventorum particularium, (de quibus postea) sed de Matricibus Ventorum in genere. Alii ex alto eas petunt, Alii in profundo rimantur; in medio autem, ubi ut plurimum generantur, vix eas quarunt; ut est mos hominum, quæ ante pedes posita sunt, præterire, & obscuriora malle. Illud liquet, Ventos aut Indigenas, aut Advenas esse; sunt enim Venti tanquam Mercatores Vaporum, eosque in nubes collectos, & important in regiones, & exportant, unde iterum Venti, tanquam per permutationem. Sed inquiremus jam de Nativis. Qui enim aliunde Advena, alibi Nativi. Tres igitur Origines locales: Aut expirant & scaturiunt è terra; aut dejiciuntur ex sublimi; aut conflantur hic in Corpore Aeris. Qui autem dejiciuntur ex alto, duplicis generationis:

*tionis: Aut enim dejiciuntur, antequam formantur in nubes, aut postea ex nubibus re-  
refactis, & dissipatis. Videamus qua sit ha-  
rum rerum historia.*

1. Finxerunt Poëta, Regnum Æoli, in Antris & Cavernis, sub terram fuisse collocatum, ubi Carcer esset Ventorum, qui subinde emittebantur.

2. Etiam Theologos quosdam, eosdemque Philosophos, movent Scriptura verba: *Qui producit Ventos de thesauris suis*; tanquam Venti prodirent ex locis thesaurariis, subterraneis scilicet, ubi sunt Mineræ: sed hoc nihil est. Nam loquitur etiam Scriptura, de Thesauris Nivis, & grandinis, quas in sublimi generari, nemo dubitat.

3. In subterraneis proculdubio magna existit Aëris Copia, camque & expire sensim verisimile, & emitti confertim aliquando, urgentibus causis, necesse est.

#### PHAENOMENON OBLIQUUM.

*In magnis siccitatibus, & media æstate, cum magis rimosa sit terra, solet erumpere in locis aridis, & arenosis, magna vis aquarum. Quod si faciant Aqua (Corpus Crassum) raro; Aërem (Corpus tenue, & subtile) hoc frequenter facere, probabile est.*

4. Si expirat Aër è terra, sensim & sparsim; parum percipitur primo; sed postquam



quam Aëris illius emanationes multæ minutæ confluerint , tum fit *Ventus* ; ut ex scaturiginibus Aquarum Rivus : Hoc vero ita fieri videtur ; quoniam notatum est ab Antiquis , *Ventos* complures in ortu suo , & in locis à quibus oriuntur , primo spirare exiguos , deinde in progressu invalescere prorsus , more Fluviorum.

5. Inveniuntur quædam loca in Mari , ac etiam lacus , qui nullis flantibus ventis , majorem in modum tumescunt , ut hoc à subterraneo flatu fieri appareat.

6. Magna vis requiritur spiritus subterranei , ut Terra concutiatur , aut scindatur : levior , ut Aqua sublevetur. Itaque tremores terræ rari ; tumores & sublevationes Aquarum , frequentiores.

7. Etiam ubique notatum est , nonnihil attolli , & tumescere Aquas , ante tempestates.

8. Spiritus subterraneus exilis qui sparsim efflatur , non percipitur super terram , donec coierit in *Ventum* , ob porositatem terræ ; sed exiens subter aquas , ob continuitatem aquæ , statim percipitur ex tumore nonnullo.

9. *Asseclas* esse *Ventos* terrarum cavernosarum , antea posuimus ; ut prorsus videantur Venti illi habere *origines suas locales* è terra.

10. In

10. In montibus magnis & saxeis, inveniuntur *Venti*, & citius spirare; (antequam scilicet percipiantur in vallibus,) & frequentius, (cum scilicet valles sint in tranquillo:) At omnes Montes, & Rupes cavernosi sunt.

11. In Comitatu *Denbigh* in *Britannia*, montosa regione & lapidosa, ex cavernis quibusdam, tam vehementes (ait *Gilbertus*) sunt *Ventorum* eruptiones, ut injecta vestimenta, pannique, rursus magna vi efflentur, & altius in Aërem efferantur.

12. In *Aber Barry* juxta *Sabrinam* in *Wallia*, in quodam clivo saxoso, in quo sunt foramina, si quis aurem opposuerit, Sonitus varios, & murmur flatuum sub terra exaudiet.

#### PHÆNOMENON OBLIQUUM.

Notavit *Acosta*, oppida *Platae* & *Potosæ*, in *Peruvia*, non longe esse distantia, & utrumque situm esse, in terra elevata, aut montana, ut in hoc differant; & nihilominus habere *Potosam* temperaturam aëris frigidam, & hyemalem, *Platam* elementem, & vernam: id quod videtur *Argentifodinis*, juxta *Potosam*, attribui posse; quod demonstrat esse spiracula terra, quatenus ad calidum, & frigidum.

13. Si terra sit primum frigidum, ut voluit

luit *Parmenides*, (non contemnenda usus sententia, cum frigus, & densitas, arcto copulentur vinculo) non minus probabile est, ejici halitus calidiores, à frigore centrali terræ, quam dejici à frigore Aëris sublimioris.

14. Sunt quidam putei in *Dalmatia*, & Regione *Cyrenaica*, ut quidam ex Antiquis memorant, in quibus si dejiciatur lapis, excitantur paulo post tempestates, ac si lapis perfringeret operculum aliquod, in loco, ubi vis *Ventorum* erat incarcerata.

## PHÆNOMENON OBLIQUUM.

*Flammas evomunt Ætna, & complures Montes; similiter & Aërem erumpere posse consentaneum est, præsertim calore in subterraneis dilatatum, & in motu positum.*

15. In terræ motibus, *Ventos* quosdam noxios, & peregrinos, & ante eruptionem, & postea flare, observatum est: ut fumi quidam minores solent emitti, ante, & post *Incendia* magna.

MONITUM. *Aër in terra conclusus, erumpere ob varias causas compellitur. Quandoque Massa terra male coagmentata in Cavum terra decidit: quandoque Aqua se ingurgitant: quandoque expanditur Aër per ignes subterraneos, ut ampliorem locum quarat: quandoque Terra, quæ antea solida erat,*



erat, & concamerata, per ignes, in cineres versa, se amplius sustinere non potest, sed decidit: & complura id genus.

Atque de prima Origine locali Ventorum, videlicet è subterraneis, hæc inquisita sunt; Sequitur origo secunda, ex sublimi; nempe media, quam appellant, regione Aëris.

MONITUM. At nemo tam male, quia dicta sunt, intelligat, quasi negemus, & reliquos Ventos, è terra, & mari, per vapores educi; Sed hoc prius genus erat Ventorum, qui exeunt è terra jam Venti formati.

16. Increbrescere murmur silvarum, antequam manifesto percipiantur *Venti*, notatum est; ex quo conjicitur *Ventum* à superiore loco descendere; quod etiam observatur in Montibus (ut dictum est) sed causa magis ambigua, propter cava montium.

17. Stellas sagittantes, (ut loquimur,) & vibratas; sequitur *Ventus*; atque etiam ex ea parte, ex quo fit jaculatio; ex quo patet, aërem in alto commotum esse, antequam ille motus perveniat ad nos.

18. Apertio cœli, & disgregatio nubium, præmonstrat *Ventos*, antequam flect in terra; quod itidem ostendit *Ventos* inchoari in alto.

19. Stel-

19. Stellæ exiguæ, antequam oriatur *Ventus*, non cernuntur, licet nocte serena; cum scilicet (ut videtur) densetur, & fit minus diaphanus Aër, propter materiam, quæ postea solvitur in *Ventos*.

20. Circuli apparent circa corpus Lunæ; Sol quandoque Occidens conspicitur sanguineus; Luna rubicundior est in ortu quarto; & complura alia inveniuntur prognostica Ventorum in sublimi: (de quibus suo loco dicemus) quæ indicant materiam *Ventorum* ibi inchoari, & præparari.

21. In istis Phænomenis, notabis illam, de qua diximus, differentiam, de duplici generatione *Ventorum*, in sublimi; nimirum ante congregationem vaporum in Nubem, & post. Nam prognostica Halorum, & colorum Solis, & Lunæ, habent aliquid ex nube: at Iaculatio illa, & Occultatio stellarum exiguarum, fiunt in sereno.

22. Cum *Ventus* prodit à nube formata, aut totaliter dissipatur nubes, & vertitur in *Ventum*; aut scinditur, & erumpit *Ventus*, ut in procella.

23. Plurima sunt *Phænomena obliqua*, ubique in natura rerum, de repercussione per frigidum; Itaque cum constet esse in media regione Aëris, frigora valde intensa,

sa, planum fit, vapores maxima ex parte, ea loca perfringere non posse, quin aut coagulentur, aut vibrentur; secundum opinionem veterum, in hac parte sanam.

*Tertia Origo localis ventorum* est eorum, qui hic in inferiore Aëre generantur, quos etiam tumores sive Super-onesationes Aëris appellamus. Res maxime familiaris; & tamen silentio transmissa.

**COMMENTATIO.** *Horum Ventorum, qui conflantur in aëre infimo, Generatio, abstrusior aliqua res non est; quam hac ipsa. Quod scilicet Aër noviter factus ex aqua, & vaporibus attenuatis, & resolutis, conjunctus cum aëre priore, non potest contineri iisdem, quibus antea, spatiis: sed excrescit, & volvitur, & ulteriora loca occupat. Hujus tamen rei duo sunt Assumpta. Vnum, quod gutta Aqua in aërem versa (quicquid de decima proportionem Elementorum fabulentur) centuplo ad minus plus spatii desiderat, quam prius; Alterum, quod parum Aëris novi, & moti, superadditum Aëri veteri, totum concutit, & in Motu ponit: ut videre est ex pusillo Vento, qui ex follibus, aut rima fenestra efflat, qui tamen totum Aërem in cubiculo in motu ponere possit: ut ex flammis lucernarum facile apparet.*



24. Quemadmodum rores, & nebulæ, hic in aëre infimo generantur, nunquam factæ nubes, nec ad mediam regionem penetrantes; eodem modo, & complures *Venti*.

25. Aura continua spirat circa maria, & aquas, quæ est *Ventus* pusillus, noviter factus.

26. Iris, quæ est ex Meteoris quasi humillima, & generatur in proximo: quando non conspicitur integra, sed curata, & quasi frustra ejus tantum in cornibus, solvitur in *Ventos*: æque ac in pluviam, & magis.

27. Notatum est, esse quosdam *Ventos* in regionibus, quæ determinantur, & separantur per Montes intermedios: qui ex altera parte Montium spirant familiares, ad alteram non perveniunt. Ex quo manifestum, eos generari, infra altitudinem ipsorum Montium.

28. Infiniti sunt *Venti*, qui spirant diebus serenis, atque etiam in Regionibus, ubi nunquam pluit: qui generantur ubi flant, nec unquam erant nubes, aut in mediam regionem ascenderunt.

## PHÆNOMENA OBLIQUA.

Quicumq; norit, quam facile vapor solvatur in Aërem: & quam ingens sit copia vaporum:

porum: & quantum spatium occupet gutta Aqua versa in Aërem, præ eo quod antea occupabat (ut dictum est) & quam modicum sustineat se comprimi Aër; non dubitabit quin necesse sit, etiam à superficie terra, usque ad sublimia aëris, ubique generari Ventos. Neque enim fieri potest, ut magna copia vaporum, cum cœperint expandi, ad mediam Aëris regionem attollantur, absque Super-onatione Aëris, & tumultu in via.

## Accidentales generationes Ventorum.

### Ad Art. 9.

#### CONNEXIO.

**A**ccidentales Generationes Ventorum eas vocamus, quæ non efficiunt, aut gignunt Motum impulsivum Ventorum, sed eum compressione acuunt, percussione vertunt, sinuatione agitant, & volvunt: quod fit per causas extrinsecas, & posituram Corporum adjunctorum.

1. In locis, ubi sunt colles minus elevati, & circa hos subsidunt valles, & ultra ipsos, rursus colles altiores, major est agitatio Aëris, & sensus Ventorum, quam aut in montanis, aut in planis.

2. In

2. In urbibus, si sit aliquis locus paulo latior, & exitus angustiores, aut Angiportus, & Plateæ se invicem secantes; percipiuntur ibi Flatus, & Auræ.

3. In Ædibus refrigeratoria per *Ventos* fiunt, aut occurrunt; ubi Aër est perflatilis, & ex una parte introit Aër, ex adverso exit; Sed multo magis, si Aër intrat ex diversis partibus, & facit concursum auræ ad Angulos, & habet exitum illi Angulo communem: Etiam Concameratio cœnaculorum, & rotunditas, plurimum facit ad Auras; quia repercutitur Aër commotus ad omnes lineas; Etiam Sinuatio porticuum magis juvat, quam si exporrigantur in recto; Flatus enim in recto, licet non concludatur, sed liberum habeat exitum, tamen non reddit Aërem, tam inæqualem, & voluminosum, & undantem, quam confluxus ad Angulos, & anfractus, & glomerationes in rotundo, & huiusmodi.

4. Post magnas tempestates in Mari, continuatur *Ventus Accidentalis* ad tempus, postquam *Originalis* resederit; factus ex collisione, & percussione Aëris, per undulationem fluctuum.

5. Reperitur vulgo in hortis, repercussio *Venti*, à parietibus, & aggeribus; ita  
ut



ut putaret quis, *Ventum* in contrariam partem spirare ejus, à qua revera spirat.

6. Si Montes regionem, aliqua ex parte, cingant, & *Ventus*, paulo diutius, ex plano contra montem spiraverit, fit, ut ipsa repercussione montis, aut contrahatur *Ventus* in pluviam, si fuerit humidior; aut vertatur in *Ventum* contrarium, sed qui brevi tempore duret.

7. In flexionibus Promontotiorum experiuntur Nautæ sæpius mutationes *Ventorum*.

## Venti extraordinarii & Flatus repentini.

*Ad Artic. 10.*

CONNEXIO.

**D**e Ventis extraordinariis *sermocinantur* quidam, & *causantur*; Ecnephia sive procella, Vortice, Typhone, Prestere: Sed rem non narrant, quæ certe ex chronicis, & historia sparsa, peti debet.

1. *Repentini flatus* nunquam cælo sereno fiunt, sed semper nubilo, & cum imbre: ut eruptionem quandam fieri, & flatum excuti, aquas concuti, recte putetur.

2. *Pro-*

2. *Procella*, quæ fiunt cum nebula, aut caligine, quas Belluas vocant, quæque se sustinent, instar Columnæ, vehementes admodum sunt, & diræ navigantibus.

3. *Typhones* majores, qui per latitudinem aliquam notabilem corripunt, & correpta sorbent in sursum, raro fiunt; at *Vortices*, sive *Turbines* exigui, & quasi ludicri, frequenter.

4. Omnes *Procella*, & *Typhones*, & *Turbines* majores, habent manifestum motum præcipitii, aut vibrationis deorsum, magis quam alii Venti; ut torrentum modo rucere videantur, & quasi per canales defluere, & postea à terra reverberari.

5. Fit in pratis, ut cumuli fœni, quandoque in altum ferantur, & tum instar Conopæi spargantur; etiam in agris, ut caules pisarum involutæ, & aristæ segetum demessæ, quin etiam lintea ad exsiccandum exposita, attollantur à *Turbini-  
bus*, usque ad altitudinem Arborum, aut supra fastigia Ædium; hæcque fiunt, absque aliquo majore *Venti* impetu, aut vehementia.

6. At quandoque fiunt *Turbines* leves, & admodum angusti, etiam in sereno; ita ut Equitans, videat pulveres, vel paleas

C

corri-

corripi, & verti prope se, neque tamen ipse magnopere *Ventum* sentiat; quæ proculdubio fiunt hic prope, ex auris contrariis se mutuo repellentibus, & circulationem aëris ex concussione facientibus.

7. Certum est, esse quosdam, qui manifesta vestigia relinquunt Aduſtionis, & Torrefactionis in plantis. At *Presterem*, qui est tanquam fulgur cæcū, atque Aër fervens, sed sine flamma, ad Inquisitionem de Fulgure rejicimus.

Confacientia ad Ventos; Originales scilicet; nam de Accidentalibus supra inquisitum est.

*Ad Artic. II. 12. 13. 14. 15.*

CONNEXIO.

**Q**ua à veteribus, de Ventis, eorumque causis, dicta sunt, confusa plane sunt, & incerta, nec, maxima ex parte, vera. Neque mirum si non cernant clare, qui non spectant prope. Loquuntur, ac si Ventus aliud quippiam esset, separatum ab Aëre Moto; atque ac si exhalationes generarent, & conficerent corpus integrum Ventorum; atque ac si Materia Ventorum



## VENTORUM.

SI

rum esset *Exhalatio tantum calida, & sicca*; atque ac si origo *Motus Ventorum* esset tantummodo *dejectio, & percussio à frigore media regionis*; omnia phantastica, & pro arbitrio. Attamen ex huiusmodi filis, magnas conficiunt telas: Operas scilicet *Aranearum*. At *omnis Impulsio Aëris, est Ventus, & Exhalationes permista Aëri*, plus conferunt ad *Motum*, quam ad *Materiam*; & vapores *humidi*, ex calore proportionato, etiam facilius solvuntur in *Ventum*, quam *exhalationes sicca*; & complures *Venti generantur in Regione infima Aëris, & ex terra expirant, præter illos, qui dejiçiuntur, & reperiuntur*. Videamus qualis sit sermo rerum ipsarum.

1. Rotatio naturalis Aëris ( ut dictum est in *Articulo de ventis Generalibus* ) absque causa alia externa, gignit *ventum* perceptibilem intra tropicos, ubi Aëris conversio fit per *Circulos majores*.

2. Post *Motum Aëris naturalem*, antequam inquiremus de *Sole*, qui est *Genitor ventorum præcipuus*, videndum, num quid sit tribuendum *Lunæ, & aliis Astris*, ex experientia clara.

3. Excitantur *venti magni, & fortes*, nonnullis, ante *Eclipsin Lunæ*, horis; ita ut, si *Luna deficiat medio noctis*, flent

*venti* vesp̄eri præcedente; si *Luna* deficiat mane, flent *venti* medio noctis præcedente.

4. In *Peruvia*, quæ regio est admodum flatilis, notat *Acosta*, maxime flare *ventos* in *Pleniluniis*.

MANDATUM. Dignum certe esset observatione, quid possint super *Ventos*, *Motus* & tempora *Lunæ*, cum aliquid possint super *Aquas*. Veluti, utrum *Venti* non sint paulo commotiores, in *Pleniluniis*, & *Noviluniis*, quam in *dimidiis*, quemadmodum fit in *Æstibus Aquarum*: licet enim quidam commode fingant, Imperium *Lunæ* esse super *Aquas*; *Solis* vero, & *Astrorum*, super *Aërem*; tamen certum est, *Aquam* & *Aërem* esse corpora valde homogenea; & *Lunam*, post *Solem*, plurimum hic apud nos posse, in omnibus.

5. Circa *Conjunctiones Planetarum*, non fugit hominum observationem flare *Ventos* majores.

6. Exortu *Orionis*, surgunt plerumque *venti*, & tempestates variæ; sed videndum, annon hoc fiat, quia exortus ejus sit, eo tempore Anni, quod ad generationem *ventorum* est maxime efficax; ut sit potius Concomitans quiddam, quam Causa; quod etiam de ortu *Hyadum*, & *Pleiadum*,

*dum*, quoad imbres, & *Arcturi*, quoad tempestates, similiter merito dubitari possit. De *Luna*, & *Stellis*, haftenus.

7. *Sol* proculdubio est Efficiens primarius *ventorum* plurimorum, operans per calorem, in Materiam duplicem: Corpus scilicet Aëris, & Vapores, sive Exhalationes.

8. *Sol* cum est potentior, Aërem, licet purum, & absque immixtione ulla, dilatat fortasse ad tertiam partem, quæ res haud parva est. Itaque per simplicem dilationem, necesse est ut oriatur Aura aliqua, in viis *Solis*; præsertim in magnis fervoribus; idque potius duas aut tres horas, post exortum ejus, quam ipso mane.

9. In *Europa*, noctes sunt *Æstuosiores*; in *Peruvia*, tres horæ Matutinae; ob unam eandemque causam; videlicet cessationem Aurarum, & *ventorum*, illis horis.

10. In *vitro calendari*, Aër dilatatus deprimit aquam, tanquam flatu. At in *vitro pileato* Aëre tantummodo impleto, Aër dilatatus inflat vesicam, ut *ventus* manifestus.

11. *Experimentum* fecimus in turri rotunda, undique clausa, hujus generis *venti*. Nam foculum in medio ejus locavi-



mus, cum prunis penitus ignitis, ut minus esset fumi; at à latere foculi in distantia nonnulla, filum suspendimus, cum cruce ex plumis, ut facile moveretur. Itaque post parvam moram, aucto calore, & dilatato Aëre, agitabatur crux plumea cum filo suo, hinc inde, motu vario; quin etiam facto foramine, in fenestra turris, exhibat flatus calidus, neque ille continuus, sed per vices, & undulans.

12. Etiam receptio Aëris per frigus, à dilatatione, createjushmodi *ventum*, sed debiliorem, ob minores vires frigoris; adeo ut in *Peruvia*, sub quavis parva umbra, non solum majus percipiatur refrigerium quam apud nos, (per *Antiperistasin*,) sed manifesta Aura ex receptione Aëris, quando subit umbram.

Atque de *Vento*, per meram dilatationem, aut receptionem Aëris facto, hactenus.

13. *Venti* ex meris motibus Aëris, absque immixtione Vaporum, lenes, & molles sunt. Videndum de *Ventis Vaporariis*, (eos dicimus qui generantur à vaporibus) qui tanto illis alteris possunt esse vehementiores, quanto dilatatio guttæ aquæ, versæ in Aërem, excedit aliquam dilatationem Aëris, jam facti: quod multis

tis partibus facit, ut superius monstravimus.

14. *Ventorum vaporariorum* ( qui sunt illi qui communiter flant ) Efficiens est *Sol*, & calor ejus proportionatus: Materia, Vapores, & Exhalationes, qui vertuntur, & resolvuntur in Aërem; Aërem inquam ( non aliud quippiam ab Aëre ) sed tamen ab initio minus syncerum.

15. *Solis* calor exiguus non excitat vapores, itaque nec *ventum*.

16. *Solis* calor medius excitat vapores, nec tamen eos continuo dissipat. Itaque si magna fuerit ipsorum copia, coëunt in pluviam, aut simplicem, aut cum *vento* conjunctam: si minor, vertuntur in *ventum* simplicem.

17. *Solis* calor in incremento, inclinatur magis ad generationem *ventorum*; in decremento, *Pluviarum*.

18. *Solis* calor intensus, & continuatus, attenuat, & dissipat vapores, eosque sublimat, atque interim Aëri æqualiter immiscet, & incorporat; unde Aër quietus fit, & serenus.

19. Calor *Solis* magis æqualis, & continuus, minus aptus ad generationem *Ventorum*: magis inæqualis & alternans.

magis aptus. Itaque in navigatione ad *Russiam*, minus affliguntur *Ventis*, quam in *Mari Britannico*, propter longos dies: at in *Peruvia* sub *Æquinoctio*, crebri *Venti*; ob magnam inæqualitatem caloris, alternantem noctu, & interdiu.

20. In Vaporibus, & Copia spectatur, & Qualitas: Copia parva gignit auras lenes; media *Ventos* fortiores; magna aggravat *Ærem*, & gignit pluvias, vel tranquillitas, vel cum *Ventis*.

21. Vapores ex mari, & Amnibus, & paludibus inundatis, longe majorem copiam gignunt *Ventorum*, quam Halitus terrestres. Attramen, qui à terra, & locis minus humidis, gignuntur *Venti*, sunt magis obstinati, & diutius durant, & sunt illi fere, qui dejiciuntur ex alto; ut opinio *Venerum*, in hac parte, non fuerit omnino inutilis; nisi quod placuit illis, tanquam divisa hæreditate, assignare Vaporibus pluvias, & *Ventis* solummodo Exhalationes; & hujusmodi pulchra dictu, re inania.

22. *Venti* ex resolutionibus nivium jaccentium super montes, sunt medii inter *Ventos* Aquaticos, & Terrestres; sed magis inclinant ad Aquaticos; sed tamen sunt acriores, & mobiliores.

23. Solutio nivium in montibus *Nivalibus*



libus (ut prius notavimus) semper inducit *Ventos Statos*, ex ea parte.

24. Etiam *Anniversarii Aquilones*, circa exortum Caniculæ, existimantur venire à Mari glaciali; & partibus circa circulum Arcticum, ubi seræ sunt solutiones glaciei, & nivium, æstate tum valde adulta.

26. Moles, sive Montes glaciales, quæ devehuntur versus *Canadam*, & *terram Piscationis*, magis gignunt Auras quasdam frigidas quam *Ventos* mobiles.

26. *Venti*, qui ex terris sabulosis, aut cretaceis proveniunt, sunt pauci, & sicci; iidem in regionibus calidioribus, æstuosi, & fumei, & torridi.

27. *Venti* ex vaporibus marinis, facilius abeunt retro in pluviam, aqua jus suum repetente, & vindicante; aut si hoc non conceditur, miscentur protinus Aëri, & quietem agunt. At halitus terrei, & fumei, & unctuosi, & solvuntur ægrius, & ascendunt altius, & magis irritati sunt in suo motu, & sæpe penetrant mediam regionem Aëris, & sunt aliqui materia meteororum ignitorum.

28. Traditur apud nos in *Anglia*, temporibus, cum *Gasconia* esset hujus ditionis, exhibitum fuisse Regi libellum supplicem, per subditos suos *Burdegalia*, & con-

finium; petendo ut prohiberetur Incensio Ericæ in Agris *Suffexia*, & *Hamptonia*, quia gigneret *Ventum* circa finem *Aprilis*, vineis suis exitiabilem.

22. Concurfus *Ventorum*, ad invicem, si fuerint fortes, gignunt *Ventos* vehementes, & vorticosos; si lenes, & humidi, gignunt pluviam, & sedant *Ventos*.

30. Sedantur & coërcentur *Venti*, quinque modis: Cum aut Aër, vaporibus oneratus, & tumultuans, liberatur, vaporibus se contrahentibus in pluviam: Aut cum vapores dissipantur, & fiunt subtiliores, unde permiscentur Aëri, & belle cum ipso conveniunt, & quiete degunt: Aut cum Vapores, sive halitus exaltantur, & sublimantur in altum, adeo ut requies sit ab ipsis, donec à media regione Aëris deiciantur, aut eam penetrent: Aut cum vapores, coacti in nubes, ab aliis *Ventis* in alto spirantibus, transvehuntur in alias regiones, ut pax sit ab ipsis, in regionibus, quas prætervolant: Aut denique, cum *Venti* à fomitibus suis spirantes, longo itinere, nec succedente nova materia, languescunt, & impetu suo destituuntur, & quasi expirant.

31. Imbres plerumque *Ventos* sedant, præsertim procellosos, ut & *Venti* contra sæpius detinent Imbrem.

32. Con-

32. Contrahunt se *Venti* in pluviam (qui est primus ex quinque sedandi modis, ilque præcipuus) aut ipso onere gravati, cum vapores sunt copiosi; aut propter contrarios motus *Ventorum*, modo sint placidi; aut propter obices Montium, & Promontiorum, quæ sistunt impetum *Ventorum*, eosque paulatim in se vertunt; aut per frigora intensiora, unde condensantur.

33. Solent plerunque *Venti*, minores & leviores, mane oriri, & cum Sole decumbere, sufficiente Condensatione Aëris nocturna, ad receptionem eorum. Aër enim nonnullam compressionem patitur, absque tumultu.

34. Sonitus Campanarum existimatur Tonitrua, & Fulgura dissipare; de *Ventis* non venit in observationem.

MONITUM. *Consule locum de Prognosticis Ventorum; est enim nonnulla Connexio Causarum, & Signorum.*

35. Narrat *Plinius Turbinis* vehementiam, aspersione Aceti in occursum ejus, compesci.



## Limites Ventorum.

*Ad Artic. 16. 17. 18.*

1. **T**raditur de Monte *Atho*, & similiter de *Olympo*, consuevisse sacrificantes, in *Aris*, super fastigia ipsorum constructis, literas exarare in Cineribus sacrificiorum, & postea redeunt, elapso anno (nam Anniversaria erant sacrificia) easdem litteras reperisse neutiquam turbatas, aut confusas; etiamsi Aræ illæ non starent in Templo aliquo, sed sub dio. Unde manifestum erat in tanta altitudine, neque cecidisse *Imbrem*, neque spirasse *ventum*.

2. Referunt in fastigio *Pici* de *Tenariph*, atque etiam in *Andibus*, inter *Peruviam* & *Chilem* nives subiacere per clivos, & latera Montium; at in ipsis cacuminibus, nil aliud esse quam Aërem quietum, vix spirabilem propter renuitatem, qui etiam acrimonia quadam, & os stomachi, & oculos pungat, inducendo illi nauscam, his suffusionem, & ruborem.

3. *Venti vaporarii*, non videntur in aliqua maiore altitudine flare; cum tamen probabile sit, aliquos ipsorum altius ascendere, quam pleræque Nubes. De *Altitudine* hactenus, de *Latitudine* videndum.

4. Cer-

4. Certum est, spatia, quæ occupant *Venti*, admodum varia esse, interdum amplissima, interdum pusilla, & angusta. Deprehensi sunt *Venti* occupasse spatium centenorum milliarium, cum paucarum horarum differentia.

5. *Spatiosi Venti* (si sint ex *Liberis*) plerumque vehementes sunt, non lenes: sunt etiam diuturniores, & fere 24. horas durant. Sunt itidem minus pluviosi. Angusti contra, aut lenes sunt, aut procellosi; aut semper breves.

6. *Stati Venti* sunt itinerarii, & longissima spatia occupant.

7. *Venti procellosi* non extenduntur per larga spatia, licet semper evagentur ultra spatia ipsius procellæ.

8. *Marini Venti*, intra spatia angustiora multo quam *Terrestres*, spirant; in tantum, ut in Mari aliquando conspiceretur, Auram satis alacrem, aliquam partem Aquarum occupare, (id quod ex crispatione Aquæ facile cernitur,) cum undique sit malacia, & Aqua instar speculi plana.

9. Pusilli (ut dictum est) *Turbines* ludunt quandoque coram *Equitantibus*; instar fere ventorum ex foliis.

De *Latitudine* hætenus; de *Duratione* videndum.

10. Durationes *Ventorum* valde vehementium, in Mari longiores sunt sufficiente copia vaporum; in Terra, vix ultra diem & dimidiam extenduntur.

11. *Venti* valde lenes, nec in Mari, nec in Terra ultra triduum constanter flant.

12. Non solum *Eurus* *Zephyro* magis est durabilis, (quod alibi posuimus) sed etiam, quicumque ille *ventus* sit, qui mane spirare incipit, magis durabilis solet esse illo, qui surgit vesperi.

13. Certus est, *ventos* insurgere, & augeri gradatim, (nisi fuerint meræ *Procellæ*;) at decumbere celerius, interdum quasi subito.

### Successiones Ventorum.

*Ad Artic. 19. 20. 21.*

1. Si *Ventus* se mutet, conformiter ad Motum Solis, id est, ab *Euro* ad *Austrum*; ab *Austro* ad *Zephyrum*; à *Zephyro* ad *Boream*; à *Borea* ad *Eurum*; non revertitur plerunque; aut si hoc facit, fit ad breve tempus. Si vero in contrarium Motus Solis, scilicet ab *Euro* ad *Boream*, à *Borea* ad *Zephyrum*, à *Zephyro* ad *Austrum*, ab *Austro* ab *Eurum*; plerunque restituitur ad plagam priorem, saltem antequam



tequam confecerit Circulum integrum.

2. Si pluvia primum inceperit, & postea cœperit flare *ventus*; *ventus* ille pluviae superstes erit. Quod si primo flaverit *ventus*, postea à pluvia occiderit, non reoritur plerunque *ventus*, & si facit, sequitur pluvia nova.

3. Si *venti* paucis horis varient, & tanquam experiantur, & deinde cœperint constanter flare, *ventus* ille durabit in dies plures.

4. Si *Auster* cœperit flare dies duos, vel tres, *Boreas* quandoque post eum subito spirabit. Quod si *Boreas* spiraverit totidem dies, non spirabit *Auster*, donec *ventus* paulisper ab *Euro* flarit.

5. Cum Annus inclinavit, & post Autumnum Hyems incæperit, si incipiente hyeme spiraverit *Auster*, & postea *Boreas*, erit Hyems glacialis; sin sub initiis hyemis spiraverit *Boreas*, postea *Auster*, erit Hyems clemens & tepidus.

6. *Plinius* citat *Eudoxum*, quod series *ventorum* redeat post quadriennium, quod verum minime videtur; neque enim tam celeres sunt revolutiones. Illud ex aliquorum diligentia notatum est, tempestates grandiores, & insigniores, (Fervorum, Nivium, Congelationum, Hyemum tepidarum,

darum, Æstatum gelidarum ) redire plerumque ad circuitum Annorum 35.

## Motus Ventorum.

*Ad Artic. 22. 23. 24. 25. 26. 27.*

### CONNEXIO.

**L**oquuntur homines, ac si Ventus esset corpus aliquod per se, atque impetu suo, Aërem ante se ageret, & impelleret; etiam cum Ventus locum mutet, loquuntur ac si idem Ventus se in alium locum transferret. Hac vero cum loquuntur plebei, tamen Philosophi ipsi, remedium huiusmodi opinionibus non præbent; sed & illi quoque balbutiunt, neque erroribus istis occurrunt.

1. Inquirendum igitur, & de Excitatione Motus in Ventis, & de Directione ejus, cum de Originibus localibus jam inquisitum sit. Atque de iis ventis, qui habent principium motus, in sua prima Impulsione, ut in iis, qui dejiçiuntur ex alto, aut efflant è terra, Excitatio motus est manifesta: alteri sub initiis suis descendunt, alteri ascendunt, & postea ex resistentia Aëris, fiunt voluminosi, maxime secundum angulos violentiæ suæ. At de illis, quæ constantur ubique in Aëre inferiore (qui sunt

sunt omnium *ventorum* frequentissimi) obscurior videtur inquisitio, cum tamen res sit vulgaris, ut in Commentatione, sub Articulo octavo declaravimus.

2. Etiam hujus rei Imaginem, reperi-mus in illa turri occlusa, de qua paulo ante. Tribus enim modis, illud *Experimen-tum* variavimus. Primus erat is, de quo supra diximus, Foculus ex prunis ante ignitis, & claris. Secundus erat Lebes Aquæ ferventis, remoto illo Foculo, atque tum erat Motus Crucis plumeæ, magis hebes, & piger, quam ex Foculo prunarum, hæ-rente in Aëre, rore vaporis aquei, nec dissipato in materiam *venti*, propter imbecillitatem caloris. At tertius erat ex utrisque simul, Foculo & Lebete; tum vero longe maxima erat Crucis plumeæ agitatio, adeo ut quandoque illam in sursum verteret, instar pusilli Turbinis; Aqua scilicet præbente copiam vaporis, & Foculo, quia stabat, eum dissipante.

3. Itaque *Excitationis* Motus in *ventis*, causa est præcipua, superoneratio Aëris, ex nova accessione Aëris facti ex vaporibus. Jam de *Directione Motus* videndum, & de *Verticitate*, quæ est *Directionis* Mutatio.

4. *Directionem* Motus progressivi *ventorum*, regunt fomites sui, qui sunt similes  
fonti-



fontibus Amnium; loca scilicet, ubi magna reperitur copia vaporum; ibi enim est *Patria venti*. Postquam autem invenerint currentem, ubi Aër minime resistit, (sicut Aqua invenit declivitatem,) tum quicquid inveniunt similis materiæ in via, in confortium recipiunt, & suo currenti miscent; quemadmodum faciunt & Amnes. Itaque *venti* spirant semper à parte Fomitum suorum.

5. Ubi non sunt Fomites insignes, in aliquo loco certo, vagantur admodum *venti*, & facile currentem suum mutant; ut in medio Mari, & Campestribus terræ latis.

6. Ubi magni sunt Fomites *ventorum*, in uno loco, sed in locis progressus sui parvæ accessiones, ibi *venti* fortiter flant, sub initiis, & paulatim flaccescunt; ubi contra, Fomites magis continui, leniores sunt sub initiis, & postea augentur.

7. Sunt Fomites mobiles *ventorum*, scilicet in nubibus; qui sæpe à *ventis*, in alto spirantibus, transportantur in loca procul distantia à Fomitibus vaporum, ex quibus generatæ sunt illæ Nubes: tum vero incipit esse Fomes *venti*, ex parte, ubi Nubes incipiunt solvi in *ventum*.

8. At *Verticitas Ventorum*, non fit eo, quod

quod *Ventus* prius flans, se transferat; sed quod ille, aut occiderit, aut ab altero *vento* in ordinem redactus sit. Atque totum hoc negotium pender ex variis collocationibus Fomitum *Ventorum*, & varietate temporum, quando vapores ex hujusmodi Fomitibus manantes solvuntur.

9. Si fuerint Fomites *Ventorum*, à partibus contrariis, veluti alter Fomes ab *Austro*, alter à *Borea*; prævalebit scilicet *Ventus* fortior, neque erunt *Venti* contrarii, sed *Ventus* fortior continuo spirabit; ita tamen ut à *Vento* imbecilliore nonnihil heberetur, & dometur; ut fit in Amnibus, accedente fluxu Maris, nam Motus Maris prævalet, & est unicus; sed à motu fluvii nonnihil frænatur. Quod si ita acciderit, ut alter ex illis *Ventis* contrariis, qui primum fortior fuerat, succumbat, tum subito spirabit *ventus* à parte contraria, unde & ante spirabat, sed latitabat, sub potestate majoris.

10. Si Fomes (Exempli gratia) fuerit ad *Euro-Boream*, spirabit scilicet *Euro-Boreas*. Quod si fuerint duo Fomites *Ventorum*, alter ad *Boream*, ii *Venti* ad aliquem tractum spirabunt separatim; at post Angulum confluentiæ, spirabunt ad *Euro-Boream*, aut cum inclinatione, prout  
alter

alter Fomes fuerit fortior.

11. Si sit Fomes *Venti* ex parte *Boreali*, qui distet ab aliqua regione 20. Milliaribus, & sit fortior, alter ex parte *Orientali*, qui distet 10. Milliaribus, & sit debilior; spirabit tamen ad aliquas horas. Eurus; paulo post (nimirum post emensum iter) *Boreas*.

12. Si spiret *Boreas*, atque occurrat ab Occidente Mons aliquis; spirabit paulo post *Euro-Boreas*, compositus scilicet ex *Vento* originali, & repercusso.

13. Si sit Fomes *Ventorum* in terra, à parte *Borea*, halitus autem ejus feratur recta sursum, & inueniat nubem gelidam ab Occidente, quæ eam in aduersum detru-dat, spirabit *Euro-Boreas*.

MONITUM. *Fomites Ventorum, in Terra & Mari, sunt stabiles, ita ut fons & origo ipsorum melius percipiatur: at Fomites Ventorum in Nubibus, sunt mobiles; adeo ut alibi suppeditetur Materia Ventorum, alibi vero ipsi formentur; id quod efficit Directionem Motus in Ventis magis confusam, & incertam.*

Hæc Exempli gratia adduximus; similia simili modo se habent. Atque de *Directione Motus Ventorum* hætenus. At de *Longitudine*, & tanquam Itinerario *Ventorum*,



torum, videndum; licet de hoc ipso, paulo ante, sub nomine latitudinis *Ventorum* inquitum videri possit. Nam & Latitudo, pro Longitudine, ab imperitis haberi possit, si maiora spatia *Venti* ex latere occupent, quam in longitudine progrediantur.

14. Si verum sit, *Columbum* ex oris *Lusitania*, per *Ventos Statos* ab Occidente, de *Continente* in *America*, iudicium fecisse, longo certe itinere possint commeare *Venti*.

15. Si verum sit, Solutionem Nivium, circa *Mare glaciale*, & *Scandiam*, excitare *Aquilones*, in *Italia* & *Gracia*, &c. diebus *Canicularibus*, longa certe sunt spatia.

16. Quanto citius in Consecutione, in qua *ventus* movet, (Exempligratia, si sit *Eurus*) veniat tempestas, ad locum aliquem ab Oriente, quanto vero tardius ab Occidente, nondum venit in observationem. De Motu *ventorum* in progressu hactenus; videndum jam de *undulatione ventorum*.

17. *Undulatio ventorum* ad parva momenta fit: adeo ut centies in hora, ad minus, *ventus* (licet fortis) se suscitet, & alternatum remittat. Ex quo liquet inæqualem esse impetum *ventorum*; nam nec  
Flumina,

Flumina, licet rapida, nec Currentes in mari, licet robusti, undulant nisi accedente flatu *ventorum*; neque ipsa illa *undulatio ventorum* aliquid æqualitatis habet in se; Nam instar pulsus manus, aliquando intercurrit, aliquando intermittit.

18. *Undulatio Aëris*, eo differt ab *undulatione* Aquarum; quod in Aquis, postquam fluctus sublati fuerint in altum, sponte rursus decidunt ad planum: ex quo fit, ut (quicquid dicant *Poëta* exaggerando tempestates, quod *unde attollantur in Cælum, & descendant in Tartarum*) tamen descensus undarum, non multum præcipiterur, ultra planum, & superficiem Aquarum. At in *undulatione* Aëris, ubi deest motus gravitatis, deprimitur, & attollitur Aër, fere ex æquo. De *undulatione* haftenus: jam de *Motu Conflictus* inquirendum est.

19. De *Conflictu ventorum*, & compositis Currentibus, jam partim inquisitum est. Plane constat, *Vbiquetarios* esse *ventos*, præsertim leniores: id quod manifestum etiam ex hoc, quod pauci sunt dies, aut horæ, in quibus non spirent Auræ aliquæ lenes, in locis liberis, idque satis inconstanter, & varie. Nam venti, qui non proveniunt ex Fomitibus majoribus, vagabundi

gabundi sunt, & volubiles, altero cum altero quasi ludente, modo impellente, modo fugiente.

20. Visum est nonnunquam in Mari, advenisse duos ventos simul ex contrariis partibus, id quod ex perturbatione superficiei Aquæ ab utraque parte, atque tranquillitate Aquæ in medio inter eos, facile erat conspiciere: postquam autem concurrissent illi *venti* contrarii, alias secutam esse tranquillitatem, in Aqua undique, cum scilicet *venti* se ex æquo fregissent, alias continuatam esse perturbationem Aquæ, cum scilicet fortior *ventus* prævaluisset.

21. Certum est, in Montibus *Peruvianis*, sæpe accidere, ut *venti*, eodem tempore, super Montes ex una parte spirent, in vallibus in contrarium.

22. Itidem certum apud nos, Nubes in unam partem ferri, cum *ventus* à contraria parte flet, hic in proximo.

23. Quin & illud certum, aliquando cerni Nubes altiores, supervolare Nubes humiliores; atque ita ut in diversas, aut etiam in contrarias partes abeant, tanquam Currentibus adversis.

24. Itidem certum, quandoque in superiore Aëre, *ventes* nec distrahi, nec promoveri;



moveri ; cum hic infra ad Semimilliare ,  
insano ferantur imperu.

25, Certum etiam è contra , esse ali-  
quando tranquillitatem infra , cum super-  
ne nubes ferantur satis alacriter ; sed id ra-  
rius est.

#### PHENOMENON OBLIQUUM.

*Etiam in fluctibus , quandoque superna-  
rans Aqua , quandoque demersa , incitatio-  
r est ; quinetiam fiunt ( sed raro ) varii Cur-  
rentes Aqua , quæ volvitur supra , & quæ  
labitur in imo.*

26. Neque prorsus contemnenda illa  
testimonia *Virgilii* , cum Naturalis Philo-  
sophiæ non fuerit ipse omnino imperi-  
tus :

*Vna Euræus Notusque ruunt , creberque  
procellis*

*Africus. —*

Et rursus :

*Omnia ventorum concurrere prælia vidi.*  
*De Motibus Ventorum , in Natura rerum ,*  
*inquisitum est : Videndum de Motibus eo-*  
*rum in Machinis humanis ; ante omnia*  
*in velis Navium.*

Motus

## Motus Ventorum in velis navium.

1. **I**n *Navibus* majoribus *Britannicis* (eas enim ad exemplum delegimus,) quatuor sunt *Mali*, aliquando quinque; omnes in linea recta per medium Navis ducta, alteri post alteros, erecti. Eos sic nominabimus.

2. *Malum principem*, qui in Medio Navis est: *Malum Prora*: *Malum Puppis* (qui aliquando est geminus:) & *Malum Rostri*.

3. Habent singuli *Mali* plures portiones; quæ sustolli, & per certos *Nodos*, aut articulos figi, & similiter auferri possunt; alii tres, alii duas tantum.

4. *Malus Rostri* stat ab inferiori *Nodo*, inclinatus versus mare, à superiori, reclusus, reliqui omnes *Mali* stant recti.

5. His *Malis* superimpendent *Vela* decem, & quando *Malus Puppis* geminatur, duodecim. *Malus Princeps*, & *Malus Prore* tres habent *Ordines velorum*. Eos sic nominabimus: *Velum ab infra*, *velum à supra*, & *velum à summa*. Reliqui habent duos tantum, carentes *velo à summo*.

6. *Vela* extenduntur, in transversum,  
D juxta

juxta verticem cujusque *Nodi Mali*, per ligna quæ *Antennas*, vel virgas dicimus, quibus suprema *velorum* assuuntur, ima ligantur funibus ad angulos tantum; *vela* scilicet *ab infra*, ad latera *Navis*, *vela à supra*, aut *à summo*, ad *antennas* contiguas. Trahuntur etiam aut vertuntur iisdem funibus, in alterutrum latus, ad placitum.

7. *Antenna* sive virga cujusque *Mali* in transversum porrigitur. Sed in *Malis puppis*, ex obliquo, altero sine ejus elevato, altero depresso; in cæteris in recto, ad similitudinem literæ *Tau*.

8. *Vela ab infra*, quatenus ad *vela Principis Prora*, & *Rostri*, sunt figuræ *Quadrangularis*, *Parallelogrammæ*: *vela à supra*, & *à summo*, nonnihil acuminata, sive surgentia in arcum; at ex *velis puppis*, quod *à supra*, acuminatum, quod *ab infra*, triangulare.

9. In *Navi*, quæ erat mille centum amphorarum, atque habebat in longitudine, in *carina*; pedes 112. in latitudine, in *alveo*, 40. *velum ab infra*, *Mali Principis*, continebat in altitudine, pedes 42. in latitudine, pedes 87.

10. *Velum à supra* ejusdem *Mali*, habebat in altitudine pedes 50. in latitudine pedes



pedes 84. ad basim ; pedes 42. ad fastigium.

11. *Velum à summo*, in altitudine pedes 27. in latitudine, pedes 42. ad basim; 21. ad fastigium.

12. In *Malo Prora*, *velum ab infra*, habebat in altitudine, pedes 40. cum dimidio; in latitudine pedes 72.

13. *Velum à supra* in altitudine pedes 46. cum dimidio ; in latitudine pedes 69. ad basim; 36. ad fastigium.

14. *Velum à summo*, in altitudine pedes 24. in latitudine, pedes 36. ad basim; 18. ad fastigium.

15. In *Malo Puppis*, *velum ab infra*, habebat in altitudine, à parte *antenna* elevata, pedes 51. in latitudine, qua jungitur *antenna*, pedes 72. reliquo desinente in acutum.

16. *Velum à supra*, in altitudine pedes 30. in latitudine, pedes 57. ad basim; 50. ad cacumen.

17. Si geminetur *Malus puppis*, in posteriore, vela minuuntur ab anteriore ; ad partem circiter quintam.

18. In *Malo Rostri*, *velum ab infra*, habebat in altitudine, pedes 28. cum dimidio; in latitudine, pedes 60.

19. *Velum à supra*, in altitudine, pe-

des 25. cum dimidio; in latitudine, pedes 60. ad basim; 30. ad fastigium.

20. Variant proportiones *Malorum* & *velorum*, non tantum, pro magnitudine *Navium*, verum etiam pro variis earum usibus, ad quos ædificantur; ad pugnam, ad mercaturam, ad velocitatem, & cætera. Verum nullo modo convenit proportio dimensionis *velorum* ad numerum amphorarum, cum *Navis* quingentarum Amphorarum, aut circiter, porter *velum ab infra principis Mali*, paucos pedes minus undique, quam illa altera, quæ erat duplicis magnitudinis. Unde fit, ut minores *Naves* longe præstent celeritate majoribus, non tantum propter levitatem, sed etiam propter amplitudinem *velorum*, habito respectu ad corpus *Navis*: nam proportionem illam continuare in *Navibus* majoribus, nimis vasta res esset, & inhabilis.

21. Cum singula *vela* per summa extendantur, per ima ligentur tantum ad angulos; *ventus* necessario facit *vela* intumescere, præsertim versus ima, ubi sunt laxiora.

22. Longe autem maior est tumor *veli*, in *velis* ab infra, quam in cæteris; quia non solum parallelogramma sunt; cætera acumi-

acuminata ; verum etiam , quia latitudo *antenna* tanto excedit latitudinem laterum *navis* , ad quæ alligantur : unde necesse est , propter laxitatem , magnum dari receptum *ventis* : adeo ut , in illa magna , quam exempli loco sumpsimus , *navi* , tumor in *Vento recto* possit esse ad 9. aut 10. pedes introrsum.

23. Fit etiam , ob eandem causam ; quod *vela* omnia à *vento* tumefacta , ad imum colligant se in arcus , adeo ut multum *Venti* præterlabi , necesse sit : in tantum , ut in illa , quam diximus , *navi* , arcus ille ad staturam hominis accedat.

24. At in *Velo puppis* illo triangulari , necesse est ut minor sit tumor , quam in quadrangulati ; tum propter figuram minus capacem , tum quia in quadrangulati tria latera laxa sunt , in triangulati duo tantum : unde sequitur quod *Ventus* excipiat magis rigide.

25. Motus *Ventorum* in *velis* , quo magis accedat ad *Rostrum Navis* , est fortior , & promovet magis , tum quia fit in loco , ubi undæ , propter acumen *proræ* ; facillime secantur ; tum maxime , quia Motus à *prora* , trahit navem ; Motus à *puppi* , trudit.

26. Motus *Ventorum* in *velis superiorum*



*rum ordinum*, promouet magis, quam in *velis ordinis inferioris*, qui Motus violentius maxime efficax est, ubi plurimum remouetur à resistantia, ut in vectibus & *velis molendinorum*. Sed periculum est demersionis, aut everfionis *navis*; itaque & acuminata sunt illa, ne *Ventos* nimios excipiant, & in usu præcipue, cum spirant *Venti* leniores.

27. Cum *vela* collocentur in recta linea, altera post altera, necesse est, ut quæ posterius constituuntur, suffurentur *Ventum* à prioribus, cum *Ventus* flet recta: itaque si omnia simul fuerint erecta, tamen vis *Venti* fere tantum locum habet in *velis Mali principis*, cum parvo auxilio *veli ab infra*, in *Malo Rostri*.

28. Fœlicissima & commodissima dispositio *velorum*, in *Vento recto*, ea est, ut vela duo inferiora *mali prora* erigantur; ibi enim, ( ut dictum est ) Motus est maxime efficax: erigatur etiam *velum à supra Mali principis*: relinquitur enim spatium tantum subter, ut *Ventus* sufficere possit *velis* prædictis *Prora*, absque suffuratione notabili.

29. Propter illam, quam diximus, suffurationem *Ventorum*, celerior est navigatio, cum *Vento laterali*, quam cum *recto*.

*recto.* *Laterali* enim flante, omnia *vela* in opere poni possunt; quia latera sibi invicem obvertunt, nec altera altera impediunt, neque fit furtum.

30. Etiam flante *vento laterali*; *vela* rigidius in adversum *Venti* extenduntur, quod *Ventum* comprimit nonnihil, & immittit in eam partem, ubi flare debet: unde nonnihil fortitudinis acquirit. *Ventus* autem maxime propitius est, qui fiat in quadra, inter rectum & lateralem.

31. *Velum ab infra Mali Rostris* vix unquam posset esse inutile, neque enim patitur furtum, quando colligat *ventum* qui fiat undequaque, circa latera navis, & subter *vela* cetera.

32. Spectatur in *Motu Ventorum* in *navibus* tum Impulsio, tum Directio. At Directio illa quæ fit per *clavum*, non multum pertinet ad Inquisitionem præsentem, nisi quatenus habeat connexionem cum *Motu Ventorum* in *velis*.

CONNEXIO. Ut *Motus Impulsionis* in vigore est in *Prora*, ita *motus Directionis* in *puppi*, itaque ad eum, velum ab *infra Mali pupis*, est *maximi momenti*; & quæsi copiam præbet auxiliarem *clavo*.

33. Cum *Pyxis nautica* in plagas 32. distribuatur, adeo ut semicirculi ejus sint

plagæ sedecim, potest fieri Navigatio progressiva ( non angulata, quæ fieri solet in *ventis* plane contrariis, ) etiamsi ex illis sedecim partibus, decem fuerint adversæ, sed sex tantum favorabiles; at ea Navigatio multum pendet ex *velo ab infirmali puppis*: Cum enim *venti* partes contrariæ itineri, quia sunt præpotentes, & *Clavo* solo regi non possunt, alia vela obversuræ forent, una cum *Navi* ipsa, in partem contrariam itineris, illud *velum* rigide extensum, ex opposito favens *Clavo*, & ejus motum fortificans, vertit, & quasi circumfert *Proram* in viam itineris.

34. Omnis *ventus* in *velis* non nihil aggravat, & deprimit *Navem*; tantoque magis, quo flaverit magis desuper. Itaque tempestatibus majoribus, primo devolvunt Antennas, & auferunt *vela* superiora, deinde, si opus fuerit, omnia; etiam *Malos* ipsos incidunt; quin & projiciunt onera mercium, tormentorum, &c. ut allevent *Navem*, ad supernatandum, & præstandum obsequia undis.

35. Potest fieri per motum istum *ventorum* in *velis navium* ( si *ventus* fuerit alacris, & secundus, ) progressus in itinere, 120. Milliarium *Italicorum* intra spatium 24. horarum; idque in *Navi mercatoria*;  
sunt



sunt enim *Naves* quædam *Nuncia*, quæ ad officium celeritatis oppositæ extructæ sunt, (quas *Caruvellas* vocant) quæ etiam majora spatia vincere possunt. At cum *venti* plane contrarii sint, remedio ad iter promovendum utuntur hoc ultimo, & pusillo; ut procedant lateraliter, prout ventus permittit extra viam itineris, deinde flectant se versus iter, atque angulares istos progressus repetant; Ex quo genere progressus (quod est minus quam ipsum serpere, nam serpentes sinuant, at illi angulos faciunt, poterunt fortasse intra 24. horas, vincere milliaria 15.

### Observationes majores.

1. **M**otus iste Ventorum, in Velis navium, habet Impulsonis sua tria precipua Capita, & Fontes, unde fluit; unde etiam præcepta sumi possint, ad eum augendum, & fortificandum.

2. Primus Fons est ex Quanto venti, qui excipitur. Nam nemini dubium esse possit, quin plus Venti magis conferat, quam minus. Itaque Quantum ipsum Venti procurandum diligenter: id fiet, si instar patrumfamilias prudentiorum, & frugissimus, & à furto caveamus. Quare, quantum fieri potest, nil Venti disperda-

tur, aut effundatur; nil etiam surripiatur.

3. Ventus aut supra latera Navium flat, aut infra, usque ad Aream Maris. Atque ut homines providi, solent etiam circa minima quaque magis curare, (quia majora nemo non curare potest,) ita de istis inferioribus ventis (qui proculdubio non tantum possunt, quantum superiores) primo videndum.

4. Ad ventos, qui circum latera Navium, & subter vela ipsarum potissimum flant; plane est officium veli ab infra Mali rostri, quæ inclinata est, & depressa, ut excipiantur; ne fiat dispendium, & iactura venti. Idque & per se prodest, & ventis, qui reliquis velis ministrant, nil obest: Circa hoc, non video quid ulterius per diligentiam humanam fieri possit, nisi forte etiam ex medio Navis, similia vela humilia adhibeantur, instar Pinnarum, aut Alarum, ex utroque latere gemina, cum ventus est rectus.

5. At quod ad cavendum de furto at-  
tinet, quod fit, cum vela posteriora ventum  
ab anterioribus surripiant, in vento Recto;  
(nam in Lateralis omnia vela cooperantur;) non  
video quid addi possit diligentia huma-  
na; nisi forte, ut flante vento recto, fiat  
scala

scala quedam velorum, ut posteriora vela à Malo puppis sint humillima, media à Malo principis mediocria, anteriora à Malo pro-  
ræ celsissima; ut alterum velum alterum non impediat, sed potius adjuvet, & ventum tradat, & transmittat. Atque de primo Fonte Impulsionis, hæc observata sint.

6. Secundus fons Impulsionis, est ex Modo percussione veli, per ventum; quæ si propter ventum contractum sit acuta, & rapida, movebit magis; si obtusa, & languida, minus.

7. Quod ad hoc attinet, plurimum interest ut vela mediocrem extensionem & tumorem recipiant: nam si extendantur rigide, instar Parietis ventum reperiunt; si laxæ, debilis sit Impulsio.

8. Circa hoc, bene se expedit in aliquibus industria humana, licet magis ex casu, quam ex iudicio. Nam in Vento Laterali, contrahunt partem veli, quæ Vento opponitur, quantum possunt; atque hoc modo Ventum immittunt in eam partem, quæ fare debet. Atque hoc agunt, & volunt. Sed interim hoc sequitur (quod fortasse non vident) ut Ventus sit contrahior, & reddat percussione magis acutam.

9. Quid addi possit industrie humane, in hac parte, non video; nisi mutetur Figura



*gura in velis, & fiant aliqua vela non tumentia in rotundo, sed instar Calcaris, aut Trianguli cum Malo, aut ligno, in illo angulo verticis, ut & Ventum magis contrahant in acutum, & secent Aërem externum potentius. Ille autem Angulus (ut arbitramur) non debet esse omnino acutus, sed tanquam Triangulus curtatus, ut habeat latitudinem. Neque etiam novimus, quid profuturum foret, si fiat tanquam velum in velo, hoc est, si in medio veli alicujus majoris, sit bursa quadam, non omnino laxa ex carbaso, sed cum costis, ex lignis, quæ Ventum in medio veli excipiat, & cogat in acutum.*

10. Tercius fons Impulsionis, est ex loco, ubi fit percussio: isque duplex. Nam ex anteriore parte Navis facilior & fortior est Impulsio, quam ex posteriore: & ex superiore parte Mali, & veli, quam ab inferiore.

11. Neque hoc ignorasse visa est industria humana, cum & flante vento recto, plurimam in velis Mali Proræ spem ponant; & in malaciis, & tranquillitatibus, vela à summo erigere non negligant. Neque nobis in præsentia occurrit, quid humana, ex hac parte, industria addi possit, nisi forte quoad primum, ut constituentur duo, aut tres Mali in Prora (medius rectus, reliqui inclinati) quo-

quorum vela propendeant : & quoad secundum, ut amplientur vela proræ in summo, & sint minus, quam solent esse, acuminata. Sed in utroque cavendum incommodo periculi, ex nimia depressione Navis.

## Motus Ventorum in aliis Machinis humanis.

1. **M**otus Molendinorum ad Ventum, nihil habet subtilitatis, & nihilominus non bene demonstrari, & explicari solet. Vela constituuntur recta in oppositum Venti flantis. Prostat autem in Ventum unum latus veli, alterum latus paulatim flectit se, & subducit à Vento. Conversio autem, sive consecutio Motus, fit semper à latere inferiore, hoc est eo, quod remotius est à Vento. At Ventus superfundens se, in adversum Machinæ, à quatuor velis arctatur, & in quatuor intervallis, viam suam injire cogitur. Eam compressionem non bene tolerat ventus; itaque necesse est, ut tanquam cubito percutiat latera velorum, & proinde vertat, quemadmodum ludicra vertibula digito impelli & verti solent.

2. Quod si vela ex æquo expansa essent, dubia res esset, ex qua parte foret Inclinatione,

tio, ut in casu baculi; cum autem proximum latus, quod occurrit *vento*, impetum ejus deiciat in latus inferius, atque illinc in spatia, cumque latus inferius *ventum* excipiat, tanquam palma manus, aut instar *veli* Scaphæ, fit protinus conversio ab ea parte. Notandum autem est, Originem motus esse non à prima Impulsione, quæ fit in fronte; sed à laterali Impulsione, post compressionem.

3. Probationes quasdam, & experimenta circa hoc, pro augendo hoc motu fecimus, tum ad pignus causæ recte inventæ, tum ad usum, Imitamenta hujus Motus effingentes in *velis* ex chartis, & *vento* ex foliis. Igitur addidimus lateri *veli* inferiori, plicam inversam à *vento*, ut haberet *ventus*, lateralis jam factus, amplius quiddam, quod percuteret; nec profuit: plica illa, non tam percussione *venti* adjuvante, quam Sectionem Aëris in consequentia impediante. Locavimus post *vela*, ad nonnullam distantiam, obstacula, in latitudinem diametri omnium *velorum*, ut *ventus* magis compressus, fortius percuteret: at hoc obfuit potius, repercussione motum primarium hebetante. At *vela* fecimus latiora in duplum, ut *ventus* artaretur magis, & fieret percussio lateralis.

for-



fortior. Hoc tandem magnopere successit; ut & longe mitiore flatu fieret Conversio, & longe magis pertinaciter volveretur.

MANDATUM. Fortasse hoc augmentum motus commodius fiet per octo vela, quam per vela quatuor, latitudine duplicata, nisi forte nimia moles aggravaverit Motum. De hoc fiat experimentum.

MANDATUM. Etiam longitudo velorum facit ad Motum. Nam in rotationibus, levis violentia versus circumferentiam, æquiparatur longe majori versus centrum. Sed tamen hoc conjungitur incommodum; quod quo longiora sunt vela, eo plus distant in summo, & minus arcatur ventus. Res non male fortasse se habeat, si vela sint paulo longiora, sed crescentia in Latum circa summitatem, ut palma Remi: sed de hoc nobis compertum non est.

MONITUM. In his Experimentis, si ponantur in usu ad Molendina, robor totius Machina, præcipue Fundamenti ejus. subvenendum. Nam quanto magis arcatur Ventus, tanto magis (licet motum velorum incitet) tamen Machinam ipsam concutit.

4. Traditur alicubi esse Rhedas moventes ad Ventum; de hoc diligentius inquiratur.

MAN-

MANDATUM. Rhedæ moventes ad Ventum non poterunt esse operapretium, nisi in locis apertis, & planiciebus. Præterea, quid fiet, si decubuerit Ventus? Magis sobria esset cogitatio, de facilitando Motu currum, & plaustrorum, per vela mobilia, ut Equi vel Boves minoribus viribus ea traherent, quam de creando Motu, per Ventum solum.

### Prognostica Ventorum.

Ad Artic. 32.

#### CONNEXIO.

**D**ivinatio quo magis pollui solet vanitate, & superstitione, eo purior pars ejus magis recipienda, & colenda. Naturalis vero Divinatio aliquando certior est, aliquando magis in lubrico, prout subjectum se habet, circa quod versatur. Quod si fuerit Natura constantis & regularis, certam efficit Predictionem; si varia & composita, tanquam ex natura, & casu, fallacem. Attamen etiam in subjecto vario, si diligenter canonizetur, tenebit Predictio ut plurimum; temporis forte momenta non assequetur, à re non multum errabit. Quin etiam quoad tempora eventus & complementi, nonnulla

Pra-

*Prædictiones satis certo collimabunt, ea videlicet, quæ sumuntur non à causis, verum ab ipsa re jam inchoata, sed citius se procedente in Materia proclivi, & aptius disposita quam in alia; ut in Topicis circa hunc 32. Articulum superius diximus. Prognostica igitur ventorum jam proponemus; miscentes nonnihil necessario de Prognosticis pluviarum & serenitatis, quæ bene distrahi non poterant; sed justam de illis inquisitionem propriis titulis remittentes.*

1. Si sol oriens cernatur concavus, dabit eo ipso die *Ventos* aut *imbres*: Si appareat tanquam leviter excavatus, *Ventos*; si cavus in profundo, *Imbres*.

2. Si sol oriatur pallidus, & (ut nos loquimur) aqueus, denotat *pluviam*; si occidat pallidus, *Ventum*.

3. Si corpus ipsum *Solis*, in occasu cernatur, tanquam sanguineum, præmonstrat magnos *Ventos*, in plures dies.

4. Si in exortu *Solis*, radii ejus spectantur rutili, non flavi, denotat *pluvias* potius quam *Ventos*; idemque, si tales appareant in occasu.

5. Si in ortu, aut occasu *Solis*, spectantur radii ejus tanquam contracti, aut curtati, neque eminent illustres, licet nubes absint,



absint, significat *Imbres*, potius quam *Ventos*.

6. Si ante Ortum *Solis* ostendent se Radii præcursores, & *Ventum* denotat, & *Imbres*.

7. Si in Exortu *Solis*, porrigat *Sol* Radios è nubibus, medio *Solis* manente cooperto nubibus, significabit *pluviam*; maxime si erumpant radii illi deorsum, ut *Sol* cernatur tanquam barbatus. Quod si radii erumpant è medio, aut sparsim, orbe exteriore cooperto nubibus, magnas dabit tempestates, & *Ventorum* & *Imbrium*.

8. Si *Sol* oriens cingitur circulo, à qua parte is circulus se aperuerit, expectetur *Ventus*: si totus circulus æqualiter defluerit, dabit *Serenitatem*.

9. Si sub Occasum *Solis*, appareat circum circulus candidus, levem denotat tempestatem, eadem nocte: si ater, aut subfuscus, ventum magnum in diem sequentem.

10. Si Nubes rubescant ex oriente *Sole*, prædicunt *ventum*: si occidente, *Serenum* in posterum.

11. Si sub Exortum *Solis*, globabunt se Nubes prope *Solem*, denunciant eodem die tempestatem asperam; quod si ab Ortum repellantur, & ad Occasum abibunt, *serenitatem*.

12. Si

12. Si in Exortu *Solis*, dispergantur Nubes à lateribus *Solis*, aliæ petentes *Austrum*, aliæ *Septentrionem*; licet sit cœlum Serenum circa ipsum *Solem*, præmonstrat *ventos*.

13. Si *Sol* sub Nube condatur occidens, *pluviam* denotat in posterum diem; quod si plane pluet occidente Sole, *ventos* potius. Sin Nubes videantur quasi trahi versus *solem*, & *ventos*, & *tempestatem*.

14. Si Nubes, exoriente Sole, videantur non ambire Solem, sed incumbere ei desuper, tanquam Eclipsim facturæ, portentunt *ventos*, ex ea parte orituros, qua illæ *nubes* inclinaverint. Quod si hoc faciant meridie, & *venti* fient, & *imbres*.

15. Si Nubes Solem circumcluserint, quanto minus luminis relinquetur, & magis pusillus apparebit Orbis Solis, tanto turbidior erit *tempesta*: Si vero duplex, aut triplex Orbis erit, ut appareant tanquam duo, aut tres Soles, tanto erit *tempesta* atrocior, per plures dies.

16. *Novilunia* dispositionum Aëris significativa sunt; sed magis adhuc Ortus quartus, tanquam *Novilunium confirmatum*. *Plenilunia* autem ipsa prælagiunt magis, quam dies aliqui ab ipsis.

17. Diuturna observatione, *Quinta*  
*Luna*

*Luna* suspecta est Nautis , ob tempestates.

18. Si *Luna* à Novilunio , ante diem quartum non apparuerit , turbidum aërem per totum Mensem prædicit.

19. Si *Luna* nascens , aut intra primos dies , cornu habuerit inferius , magis obscurum , aut fuscum , aut quovis modo non purum ; dies turbidos , & tempestates dabit , ante *plenilunium* : si circa medium fuerit decolor , circa ipsum *plenilunium* sequentur *tempestates* : si cornu superius hoc patiat , circa *Lunam* decrefcentem.

20. Si in quarto Ort , pura ibit *Luna* per cœlum , nec cornibus obtusis , neque prorsus jacens , neque prorsus recta , sed mediocris ; *Serenitatem* promittit majore ex parte , usque ad *Novilunium*.

21. Si in Ort illo rubicunda fuerit , ventos portendit ; si rubiginosa , aut obatra , *Pluvias* ; sed nil horum significat ultra *plenilunium*.

22. Recta *Luna* semper fere minax est , & infesta , potissimum autem denunciat ventos ; At si appareat cornibus obtusis , & curtatis , *Imbres* potius.

23. Si alterum Cornu *Luna* magis acuminatum fuerit , & rigidum , altero magis obtu-



obtusio, *ventos* potius significat; si utrumque, *pluviam*.

24. Si circulus, aut *Halo* circa *Lunam* appareat, *pluviam* potius significat, quam *ventos*; nisi stet recta *Luna* intra eum Circulum, tum vero utrumque.

25. Circuli circa *Lunam*, *ventos* semper denotant, ex parte qua ruperint; etiam splendor illustris circuli in aliqua parte, *ventos* ex ea parte, qua splendet.

26. Circuli circa *Lunam*, si fuerint duplices, aut triplices, præmonstrant horridas, & asperas tempestates; at multo magis, si illi Circuli non fuerint integri, sed maculosi, & interstincti.

27. *Plenilunia*, quoad colores, & *Halones*, eadem forte denotant, quæ Ortus quartus: sed magis præsentia, nec tam procrastinata.

28. *Plenilunia* solent esse magis serena, quam cæteræ ætates *Luna*, sed eadem, hyeme, quandoque intensiora dant frigora.

29. *Luna* sub occasum solis ampliata, & tamen luminosa, nec subfusca, *serenitatem* portat in plures dies.

30. *Eclipses Luna*, quasi semper comitantur *venti*; Solis, *Serenitates*; *pluvia* raro alterutrum.

31. A *Conjunctionibus* reliquis *Planetarum*, præter Solem, expectabis *ventos*; & ante, & post, à *Conjunctionibus* cum Sole, *serenitatem*.

32. In exortu *Pleiadum* & *Hyadum*, sequuntur *Imbres*, & *Pluviæ*, sed tranquillæ; in exortu *Orionis*, & *Arcturi*, *Tempestates*.

33. *Stella* (ut loquimur) discurrentes, & sagittantes, protinus *ventos* indicant, ex ea parte, unde vibrantur. Quod si ex variis, aut etiam contrariis partibus volitent, magnas tempestates, & *Ventorum*, & *Imbrium*.

43. Cum non conspiciuntur *Stella* minusculæ, quales sunt, quas vocant *Asellos*, idque fit ubique per totum cœlum, magnas præmonstrat *Tempestates*, & *Imbres* intra aliquot dies: quod si alicubi *Stella* minutæ obscurentur, alicubi sint claræ, *ventos* tantum, sed citius.

35. Cœlum æqualiter splendens, in Novi-luniis, aut Ortu quarto, *Serenitatem* dabit per plures dies: æqualiter obscurum, *Imbres*; inæqualiter, *ventos*, ab ea parte, qua cernitur Obscuratio. Quod si subito fiat obscuratio, sine nube, aut caligine, quæ fulgorem Stellarum perstringat, graves & asperæ instant *Tempestates*.

36. Si Planetarum, aut Stellarum majorum aliquam, incluserit Circulus integer, *imbres* prædicit; si fractus, *ventos* ad eas partes, ubi circulus deficit.

37. Cum tonat vehementius, quam fulgurat, *ventos* dabit magnos; sin crebro inter tonandum fulserit, *Imbres* conferros, & grandibus gattis.

38. Tonitrua *Matutina* *ventos* significant; Meridiana *Imbres*.

39. Tonitrua mugientia, & veluti transeuntia, *ventos* significant; atque inæquales habent fragores, & acutos, procellas, tam *ventorum*, quam *Imbrium*.

40. Cum cœlo sereno fulguraverit, non longe absunt *venti*, & *Imbres* ab ea parte, qua fulgurat, quod si ex diversis partibus cœli fulguraverit, sequentur atrocēs, & horridæ Tempestates.

41. Si fulguraverit à plagis cœli gelidioribus, *Septentrione* & *Aquilone*, sequentur grandines; si à tepidioribus, *Austro* & *Zephyro*, *Imbres*, cum cœlo æstuoso.

42. Magni fervores, post solstitium Æstivale, desinunt plerunque in tonitru, & fulgura; quæ si non sequantur, desinunt in *ventos*, & *pluvias* per plures dies.

43. Globus flammæ, quem *Castorem* vocabant Antiqui, qui cernitur navigantibus



tibus in mari, si fuerit unicus, atrocem Tempestatem prænunciat (*Castor* scilicet est Frater intermortuus; ) at multo magis, si non hæserit *Malo*, sed volvatur, aut salter; quod si fuerint Gemini, ( præsentē scilicet *Polluce* Fratre vivo ) idque tempestate adulta, salutare signum habetur: sin fuerint tres ( superveniente scilicet *Helena*, peste rerum ) magis dira incumber *Tempestas*: videtur sane unicus, crudam significare materiam tempestatis; duplex, quasi coctam, & maturam; triplex, vel multiplex, copiam ægre dissipabilem.

44. Si conspiciantur Nubes ferri citatius, cœlo sereno, expectentur *venti*, ab ea parte, à qua feruntur Nubes. Quod si globabuntur, & glomerabunt simul, cum Sol appropinquaverit ad eam partem, in qua globantur, incipient discuti; quod si discutientur magis versus *Boream*, significat *ventum*, si versus *Austrum*, *pluvias*.

45. Si occidente Sole, Nubes oriantur atræ, aut fuscæ, *Imbrem* significant: Si adversus Solem, in Oriente scilicet, eadem nocte, si juxta Solem ab Occidente, in posterum diem, cum *ventis*.

46. Liquidatio, sive differētiatio cœli nubili, incipiens in contrarium *venti*, qui fiat,

at, *Serenitatem* significat; sed à parte *venti*, nihil indicat, sed incerta res est.

47. Conspiciuntur quandoque plures, veluti Camerae, aut contignationes Nubium, alterae super alteras (ut aliquando quinque simul se vidisse, & notasse affirmet *Gilbertus*) & semper attriores sunt infimae, licet quandoque secus appareat, quia candidiores visum magis laceffunt. Duplex contignatio, si sit spissior, *pluvias* denotat instantes (praesertim si nubes inferior cernatur quasi gravida:) plures contignationes perendinant *pluvias*.

48. *Nubes*, si ut vellera lanæ spargentur, hinc inde, *tempestates* denotant; Quod si instar squammarum, aut testarum, altera alteri incumbat, siccitatem, & *serenitatem*.

49. *Nubes* plumatae, & similes ramis palmæ, aut floribus Iridis, *Imbres* protinus, non ita multo post, denunciant.

50. Cum *Montes*, & *Colles* conspiciuntur veluti pileati, incumbantibus in illis Nubibus, eosque circumplectentibus, *Tempestates* praemonstrant imminentes.

51. *Nubes* electrinæ, & aureæ, ante Occasum Solis, & tanquam cum fimbriis deauratis, postquam Sol magis condi coeperit, *serenitates* praemonstrant.

52. *Nubes* luteæ, & tanquam cœnosæ, significant *Imbrem* cum *vento* instare.

53. *Nubecula* aliqua, non ante visa, subito se monstrans, cœlo circum sereno, præsertim ab Occidente, aut circa Meridiem, *Tempestatem* indicat ingruentem.

54. *Nebula*, & caligines ascendentes, & fursum se recipientes, *pluvias*, & si subito hoc fiat, at tanquam sorbeantur, *ventos*, prædicunt; at cadentes, & in vallibus residentes, *Serenitatem*.

55. *Nube* grvida candicante; quam vocant Antiqui *Tempestatem albam*, sequitur æstate, Grando minuta, instar constituræ; hyeme, Nix.

56. Autumnus serenus ventosam Hyemem præmonstrat: ventosa Hyems, Ver pluviosum: Ver pluviosum, Æstatem serenam: serena Æstas, Autumnus ventosum. Ita ut Annus (ut proverbio dicitur) sibi debitor raro sit: neque eadem series tempestatum redeat, per duos Annos simul.

57. *Ignes* in focus, pallidiores solito, atque intra se murmurantes, *Tempestates* nunciant. Quod si *Flamma* flexuose volitet, & sinuet, *ventum*, præcipue: at Fungi, sive Tuberes in lucernis, *pluvias* potius.

58. *Car-*



58. *Carbo*nes clarius perlucen-  
tes, *ventus* significant; etiam cum favillas ex se  
facilius discutiunt, & deponunt.

59. *Mare* cum conspicitur in portu  
tranquillum in superficie, & nihilominus  
intra se murmuraverit, licet non intumue-  
scat, *ventus* prædicat.

60. *Littora* in tranquillo resonantia,  
et *Maris*que ipsius sonitus cum plangore, aut  
quodam echo, clarius, & longius solito  
auditus, *ventos* prænunciant.

61. Si in tranquillo, & plana superficie  
*Maris*, conspiciantur Spumæ hinc inde,  
aut coronæ albæ, aut Aquarum bullæ,  
et *ventos* prædicunt: Et si hæc signa fuerint  
insigniora, asperas tempestates.

62. In Mari fluctibus agitato, si appa-  
reant spumæ coruscantes, ( quas *Pulmones*  
et *Marinos* vocant ) prænunciant duraturam  
Tempestatem, in plures dies.

63. Si *Mare* silentio intumescat, &  
intra portum altius solito insurgat, aut  
Æstus ad littora celerius solito accedat,  
et *ventos* prænunciat.

64. Sonitus à *Montibus*, nemorumque  
murmur increbrescens, atque fragor etiam  
nonnullus in campestribus, *ventos* porten-  
dit. Cœli quoque murmur prodigiosum,  
absque tonitru, ad *ventos* maxime spectat.

65. *Folia* & *paleæ* ludentes, sine aura, quæ sentiat, & *Lanugines* plantarum volitantes, plumæque in *Aquis* innatantes, colludentes, *ventos* adesse nunciant.

66. *Aves aquatica* concursantes, & gregatim volantes, *Mergique* præcipue, & *Fulica*, à Mari, aut stagnis fugientes, & ad littora, aut ripas properantes, præsertim cum clangore, & ludentes in sicco, *ventos* prænunciant, maxime si hoc faciant mane.

67. At *terrestres volucres* contra, aquam petentes, eamque alis percutientes, & clangores dantes, & se perfundentes; ac præcipue *Cornix*, tempestates portendunt.

68. *Mergi*, *Anatesque*, ante *ventum* pennas rostro purgant; at *Anseres*, clangore suo importuno, *pluviam* invocant.

99. *Ardea* petens excelsa, adeo ut nubem quandoque humilem, supervolare conspiciatur, *ventum* significat. At *Milvi* contra, in sublimi volantes, *serenitatem*.

70. *Corvi* singultu quodam latrantes, si continuabunt, *ventos* denotant, si vero carptim vocem resorbebunt, aut per intervalla longiora crocitabunt, *Imbres*.

71. *Noctua* garrula, putabatur ab antiquis, mutationem Tempestatis præmonstrare;

strare; si in sereno, *Imbres*, si in nubilo, *Serenitatem*: at apud nos, *Noctua* clare; & libenter ululans, *Serenitates* plerunque indicat, præcipue Hyeme.

72. *Aves* in arboribus habitantes, si in nidus suos, sedulo fugitent, & à pabulo citius recedant, *Tempestates* præmonstrant; *Ardea* vero in arena stans tristis, sicut *Corvus* spatians, *Imbres* tantum.

73. *Delphini* tranquillo Mari lascivientes, Flatum existimantur prædicere, ex qua veniunt parte; at turbato ludentes, & aquam spargentes, contra, *Serenitatem*: At plerique Piscium, in summo natantes, sicut quandoque exilientes, *pluviam* significant.

74. Inguente vento, Sues ita terrentur, & turbantur, & incompote agunt, ut Rustici dicant illud solum Animal videre *Ventum*, specie scilicet horrendum.

75. Paulo ante *Ventum* *Aranea* sedulo laborant, & nent, ac si provide præoccuparent, quia *Vento* flante nere nequeunt.

76. Ante pluviam, *Campanarum* sonitus auditur magis ex longinquo; At ante *Ventum*, auditur magis inæqualiter accedens, & recedens, quemadmodum fit *vento* manifesto flante.



77. *Trifolium* inhorrescere, & folia contra tempestatem subrigere, pro certo ponit *Plinius*.

78. Idem ait, *vasa*, in quibus esculenta reponuntur, quandoque sudorem in repositoriis relinquere, idque diras tempestates prænunciare.

MONITUM. Cum Pluvia, & Venti, habeant materiam fere communem; cumque Ventum semper præcedat nonnulla Condensatio Aëris, ex Aëre noviter facta, intra veterem recepto, ut ex plangoribus littorum, & excelsa volatu Ardeæ, & aliis patet; cumque pluviam similiter præcedat Aëris Condensatio; ( sed Aër in Pluvia postea contrahitur magis, in Ventis contra excrefcit ) Necesse est, ut Pluviæ habeant complura Prognostica, cum Ventis communia. De iis consule Prognostica Pluviarum, sub titulo suo.

## Imitamenta Ventorum.

Ad Artic. 33.

### CONNEXIO.

Si animum homines inducere possent, ut S contemplationes suas, in subiecto sibi proposito, non nimium figerent, & cætera  
tan-

tanquam parerga rejicerent; nec circa ipsum subiectum in infinitum, & plerumque inutiliter subtilizarent; haudquaquam talis, qualis solet, occuparet ipsos stupor, sed transferendo cogitationes suas, & discurrendo, plurima invenirent in longinquo, quae prope latent. Itaque ut in Jure Civili, ita in Jure Naturæ, procedendum animo sagaci, ad Similia, & Conformia.

1. Folles apud homines *Æoli* utres sunt: unde *ventum* quis promere possit, pro modulo nostro. Etiam Interstitia, & Fauces Montium, & *Ædificiorum* Anfractus, non alia sunt, quam Folles majores. In usu autem sunt Folles præcipue, aut ad excitationem Flammæ, aut ad Organæ Musica. *Follium* autem ratio est, ut sugant Aërem propter rationem *Vacui*, (ut loquuntur) & emittant per Compressionem.

2. Etiam *Flabellis* utimur manualibus, ad faciendum Ventum, & refrigeria, impellendo solummodo Aërem leniter.

3. De cœnaculorum æstivorum refrigeriis, quædam posuimus in *Responsio* ad *Artic. 9.* Possunt inveniri alii modi magis accurati, præsertim si *Follium* modo alicubi attrahatur Aër, alicubi emittatur.

Sed ea, quæ jam in usu sunt; ad simplicem compressionem, tantum referuntur.

4. *Flatus* in *Microcosmo*, & *Animalibus*, cum *ventis* in Mundo majore, optime conveniunt. Nam & ex humore gignuntur, & cum humore alternant, ut faciunt *venti* & *pluvia*; & à calore fortiore dissipantur, & perspirant. Ab illis autem, transferenda est certe ea Observatio ad *ventos*; quod scilicet gignantur *Flatus*, ex materia, quæ dat vaporem tenacem, nec facile resolubilem, ut Fabæ, & Legumina, & Fructus; quod etiam, eodem modo se habet in *ventis* majoribus.

5. In destillatione vitrioli, & aliorum Fossilium, quæ sunt magis flatusosa, opus est receptaculis valde capacibus, & amplis, alioqui effringentur.

6. *Ventus* factus ex *Nitro*, commisto in *Pulvere pyrio*, erumpens, & inflans flammam, *ventos* in Universo (exceptis fulminosis) non tantum imitatur, sed exuperat.

7. Hujus autem vires premuntur, in Machinis humanis, ut in Bombardis, & Cuniculis, & domibus pulverariis incensis; utrum autem, si in Aëre aperto, magna *pulveris pyrii* moles, incensa esset, *ventum* ex Aëris commotione, etiam ad plures horas, excitatura esset,



esset, nondum venit in Experimentum.

8, Latet spiritus flatuosus, & expansivus, in *Argento vivo*, adeo ut pulverem pyrium, ( ut quidam volunt, ) imitetur, & parum ex eo, pulveri pyrio admistum, cum reddat fortiolem. Etiam de *Auro* loquuntur *Chymista*, quod periculose, & fere tonitruum modo, in quibusdam preparationibus erumpat; sed de his mihi non compertum est.

### Observatio major.

**M**otus Ventorum tanquam in speculo spectatur, in Motibus Aquarum quoad plurima.

Venti magni sunt Inundationes Aëris, quales conspiciuntur Inundationes Aquarum; utraque ex aucto. Quanto. Quemadmodum Aqua aut descendunt ex Alto, aut emanant è Terra; ita & ventorum nonnulli sunt dejecti, nonnulli exurgunt. Quemadmodum nonnunquam intra Amnes sunt contrarii Motus; unus fluxus Maris, alter Cursus Amnis; & nihilominus unicuique efficitur Motus, prævalente fluxu Maris: ita & flantibus ventis contrariis, Major in ordinem redigit Minorem. Quemadmodum in Carrentibus Maris, & quorundam

*dam Amnium, aliquando evenit, ut Gurges in summitate Aqua in contrarium vergat Gurgiti in profundo: ita & in Aëre, flantibus simul contrariis ventis, alter alterum supervolat. Quemadmodum sunt Cataractæ Pluviarum, in spatio angusto; similiter & Turbines ventorum. Quemadmodum Aqua, utcunque progrediantur, tamen si perturbata fuerint, interim undulant, modo ascendentes, & cumulata, modo descendentes, & sulcata; similiter faciunt & venti, nisi quod absit Motus Gravitatis. Sunt & alia similitudines, quæ ex iis, quæ inquisita sunt, notari possunt.*

## Canones mobiles de Ventis.

### CONNEXIO.

**C**anones aut Particulares sunt, aut Generales; utrique Mobiles apud nos. Nil enim adhuc pronunciamus. At Particulares ex singulis fere Articulis, possunt decerpi, aut expromi; Generales, eosque paucos, ipsi jam excerpemus, & subjungemus.

I. Ventus non est aliud quippiam ab Aëre moto, sed ipse Aër Motus; aut per  
Impul-

Impulsionem simplicem, aut per Immissionem Vaporum.

2. Venti per Impulsionem Aëris simplicem, sunt quatuor modis, aut per Motum Aëris naturalem; aut per Expansionem Aëris in viis solis; aut per Receptionem Aëris ex frigore subitaneo; aut per Compressionem Aëris per Corpora externa.

Possit esse & quintus Modus, per Agitationem, & Concussionem Aëris ab Aëstis: sed fileant paulisper hujusmodi res, aut audiantur parca fide.

3. Ventorum, qui sunt per Immissionem vaporum, præcipua causa est superoneratione Aëris, per Aërem noviter factum ex vaporibus; unde moles Aëris excrefcit, & nova spatia querit.

4. Quantum non magnum Aëris superadditi, magnum ciet tumorem in Aëre circumquaque; ita ut Aër ille novus, ex resolutione Vaporum, plus conferat ad Motum, quam ad Materiam: Corpus autem magnum venti consistit in Aëre priore, neque Aër novus Aërem veterem ante se agit, ac si Corpora separata essent; sed utraque commissa, ampliorem locum desiderant.

5. Quando aliud concurrit Principium Motus, præter ipsam Superonerationem Aëris, Accessorium quippiam est illud, & Principale.



cipale fortificat, & auget; unde fit, ut venti magni, & impetuosissimi, raro oriuntur ex Superoneratione Aëris simplici.

6. Quatuor sunt Accessoria ad Superonerationem Aëris: Expiratio è subterraneis: Dejectio ex media regione Aëris (quam vocant; ) Dissipatio ex Nube facta; & Mobilitas, atque Acrimonia Exhalationis ipsius.

7. Motus venti quasi semper lateralis est: verum is qui fit per Superonerationem simplicem, usque à principio: is qui fit per Expirationem è terra, aut Repercussionem ab alto, non multo post: nisi Eruptio, aut Pracipitium, aut Reverberatio, fuerint admodum violenta.

8. Aër nonnullam compressionem tolerat, antequam Superonerationem percipiat, & Aërem contiguum impellat; ex quo fit, ut omnes venti sint paulo densiores, quam Aër quietus.

9. Sedantur venti quinque modis; aut coëuntibus vaporibus, aut Sublimatis; aut Transvectis, aut Destitutis.

10. Coëunt Vapores, atque adeo ipse Aër in pluviam, quatuor modis: aut per copiam aggravantem, aut per Frigora condensantia; aut per Ventos contrarios compellentes, aut per Obices reperiunt.

II. Tam

11. *Tam Vapores, quam Exhalationes. Materia ventorum sunt. Etenim ex Exhalationibus nunquam Pluvia, ex vaporibus sepiissime Ventii. At illud interest, quod facti Ventii ex Vaporibus, facilius se incorporant Aëri puro, & citius sedantur, nec sunt tam obstinati, quam illi ex Halitibus.*

12. *Modus, & diversa conditiones Caloris, non minus possunt in Generatione ventorum, quam Copia aut Conditiones Materiae.*

13. *Solis calor in Generatione ventorum, ita proportionatus esse debet, ut eos excitet, sed non tanta copia, ut coeant in pluviā; nec tanta paucitate, ut prorsus discutiantur & dissipentur.*

14. *Ventii spirant ex parte Fomitum suorum: cumque Fomites varie disponentur, diversi ventii, ut plurimum, simul spirant; sed fortior debiliorem, aut obruit, aut flectit in Currentem suum.*

15. *Vbiq; generantur ventii, ab ipsa terra superficie, usque ad frigidam Regionem Aëris: sed frequentiores in proximo, fortiores in sublimi.*

16. *Regiones, quae habent ventos Affeclas ex tepidis, sunt calidiores, quam prae ratione Climatis sui; quae ex gelidis, frigidiores.*

## Charta humana, five optativa cum proximis circa ventos.

### OPTATIVA.

1. **V**ela Navium, ita componere & disponere, ut minore flatu, majorem conficiant viam; Res insigniter utilis, ad compendia itinerum per Mare, & parcendum impensis.

PROXIM. Proximum non occurrit adhuc inventum; precise in practica. Sed consule de eo Observationes Majores, super Art. 26.

2. **OPTATIV.** Molendina ad ventum & vela ipsorum ita fabricari, ut minore flatu, plus molant; Res utilis ad lucrum.

PROXIM. Consule de hoc, Experimenta nostra, in Responso ad Artic. 27. ubi videtur res quasi peracta.

3. **OPTATIV.** Ventos crituros, & occasuros, & tempora ipsorum prænoscere; Res utilis ad Navigationes, & Agriculturam, maxime autem ad electiones temporum, ad praelia Navalium.

PROXIM. Huc multa pertinent eorum, quæ in Inquisitione, præsertim in Responso ad Articulum 32. notata sunt. At Observatio



ratio in posterum diligentior (si quibus ea cordi erit) patefcente jam causa Ventorum, longe exactiora prognostica præstabit.

4. OPTATIV. Iudicium, & Prognostica facere per ventos, de aliis rebus: veluti primo, si sint Continentes, aut Insulæ in Mari, in aliquo loco, vel potius mare liberum? Res utilis ad Navigationes novas, & incognitas.

PROXIM. Proximum est, Observatio circa Ventos statos: id quo usus videtur Columbus.

5. OPTATIV. Itidem de ubertate, aut Caritate fructuum, & segetum, annis singulis; Res utilis ad lucrum & venditiones anticipantes, & coëmptiones, ut proditum est de Thalete, circa Monopolium Olivarum.

PROXIM. Huc pertinent nonnulla, in Inquisitione posita, de Ventis, aut malignis, aut decussivis, & temporibus, quando nocent, ad Artic. 29.

6. OPTATIV. Itidem, de Morbis & Pestilentiis, annis singulis: Res utilis ad existimationem Medicorum, si illa prædicere possint; etiam ad Causas, & Curas morborum, & nonnulla alia civilia.

PROXIM. Huc pertinent etiam nonnulla in Inquisitione posita, ad Art. 30.

MONI-

MONITUM. De Prædictionibus ex Ventis, circa segetes, fructus, & morbos, consule Historias Agriculturæ, & Medicinæ.

7. OPTATIV. Ventos excitare, & sedare.

PROXIM. De his, habentur quadam superstitiosa & Magica, quæ videntur digna quæ in Historiam Naturalem seriam & severam recipiantur. Neque occurrit nobis aliquid Proximum in hoc genere. Designatio ea esse poterit, ut Natura Aëris penitus introspiciatur, & inquiratur; si possit inveniri aliquid, quod in quantitate non magna, in Aërem immissum, possit excitare & multiplicare Motum, ad Dilatationem, aut Contractionem, in Corpore Aëris. Ex hoc etenim (si fieri possit) sequentur Excitationes & Sedationes Ventorum; quale est illud Experimentum Plinii de Aceto injecto in occursum Turbinis, si verum foret. Altera designatio possit esse, per Emissionem Ventorum ex subterraneis, si congregentur alicubi, in magna copia, quale est illud receptum de Puteo in Dalmatia; verum & loca hujusmodi Carcerum nosse difficile.

8. OPTATIV. Complura ludicra, & mira, per motum Ventorum efficere.

PROXIM. De his cogitationem suscipere,

*pere, nobis non est otium. Proximum est illud vulgatum Duellorum ad ventum: Proculdubio, multa ejusmodi jucunda reperiri possunt; & ad Motus, & ad Sonos.*

**Aditus ad Titulos in proximos quinque menses destinatos.**

*Historia Densi & Rari.*

**A D I T U S.**

**N**il mirum, si Natura Philosophiæ, & Scientiis Debitrix sit; cum ad reddendas rationes, nunquam adhuc sit interpellata. Neque enim de *Quanto* Materiæ, & *Quomodo* illud per corpora sit distributum (in aliis copiose, in aliis parce) instituta est Inquisitio diligens, & dispensatoria, secundum veros, aut proximos veris calculos. Illud recte receptum est; Nil deperdi, aut addi Summæ universali: Etiam tractatus est à nonnullis ille locus; *Quomodo* corpora laxari possint, & contrahi absque Vacuo intermixto, secundum plus & minus. *Densi* autem & *Rari*



*Rari* Naturas, alius ad Copiam, & paucitatem Materiæ retulit; alius hoc ipsum elusit; plerique, Authorem suum secuti, rem totam per frigidam illam distinctionem Actus & Potentiæ discutiunt, & componunt. Etiam qui illa Materiæ rationibus attribuunt, (quæ vera est sententia) neque Materiam primam Quanto planè spoliant, licet ad alias formas æquam volunt, tamen in hoc ipso inquisitionem terminant, ulterius nihil quærunt, neque quid inde sequatur perspiciunt; remque quæ ad infinita spectat, & Naturalis Philosophiæ veluti Basis est, aut non attingunt, aut non urgent.

Primo igitur, quod bene positum est, non movendum: Non scilicet fieri in aliqua transmutatione corporum, Transactionem, aut à nihilo, aut ad nihilum; Sed Opera esse ejusdem Omnipotentiae, creare ex nihilo, & redigere in nihilum; Ex cursu Naturæ vero hoc nunquam fieri. Itaq; Summa Materiæ totalis semper constat; nil additur, nil minuitur. At istam Summam inter corpora per portiones dividi, nemini dubium esse possit. Neque enim quisquam subtilitatibus abstractis tam dementatus esse queat, ut existimet tantum Materiæ inesse dolo Aquæ, quantum  
decem

decem doliis Aquæ; neque similiter dolio Aëris, quantum decem doliis Aëris. At in corpore eodem non dubitatur, quin Copia Materiæ multiplicetur pro mensura corporis: In corporibus diversis, ambigitur. Quod si demonstretur, unum dolium Aquæ in Aërem versum, decem dare dolia Aëris, (istamenim computationem propter Opinionem receptam sumimus, licet centupla verior sit) bene habet: Etenim jam non amplius sunt diversa corpora, Aqua & Aër, sed idem corpus Aëris, in decem doliis. At unum dolium Aëris (ut modo concessum est) decima tantum pars est decem doliorum. Itaque resisti jam non potest, quin in uno dolio Aquæ, decuplo plus sit materiæ, quam in uno dolio Aëris. Itaque si quis asserat dolium Aquæ totum, in dolium Aëris unicuique verti posse, idem prorsus est, ac si asserat aliquid posse redigi ad nihilum. Etenim una Decima Aquæ ad hoc sufficiet, reliquæ novem partes necesse est ut annihilentur. Contra, si quis asserat, dolium Aëris in dolium Aquæ verti posse, idem est ac si asserat aliquid posse creari ex nihilo. Etenim Dolium Aëris, nisi ad decimam partem Dolii Aquæ attinget; Reliquæ novem partes necesse est ut fiant ex nihilo,

Illud

## 116 HISTORIA GRAVIS

Illud interim plane confitemur, de rationibus, & calculis, & quota parte *Quantitatis* *Materiae*, quæ diversis corporibus subest; & qua industria, & sagacitate de illis *Informatio* vera capi possit, arduam *Inquisitionem* esse; quam tamen ingens, & latissime fusa utilitas compenset. Nam & *Densitates*, & *Raritates* *Corporum* nosse, & multo magis *Condensationes*, & *Rarefactiones* procurare, & efficere, maxime interest & *Contemplativæ*, & *Practicæ*. Cum igitur sit res ( si qua alia ) plane fundamentalis, & Catholica; Accincti debemus ad eam accedere, quandoquidem omnis *Philosophia* absque ea, plane discincta, & dissoluta sit.

## Historia Gravis & Levis.

### A D I T U S.

**M**otum *Gravitatis* & *Levitatis*, Veteres *Motus Naturalis* nomine insigniverunt. Scilicet nullum conspiciebant *Efficiens externum*; nullam etiam *Resistentiam* apparentem. Quinimo citatior videbatur *Motus* iste in progressu suo. Huic *Contemplationi*, vel *Sermoni* potius, *Phantasiam* illam *Mathematicam* de *Hæsiōe* *Gravium* ad *Centrum Terræ* (etiam



(etiam si perforata foret ipsa Terra,) nec non Commentum illud *Scholasticum*, de Motu Corporum ad loca sua, veluti *salem* asperserunt. His positis, perfunctos se credentes, nil amplius quærebant, nisi quod de *Centro Gravitatis*, in diversis figuris, & de iis, quæ per Aquam vehuntur, paulo diligentius quispiam ex illis quæsit. Neque ex Recentioribus quicquam operæ pretium circa hoc fecit, addendo solummodo pauca *Mechanica*, eaque per *Demonstrationes* suas detorta. Verum missis verbulis, certissimum est, Corpus non nisi à Corpore pati; nec ullum fieri Motum Localem, qui non sollicitetur, aut à partibus Corporis ipsius, quod movetur; aut à Corporibus adjacentibus, vel in contiguo, vel in proximo, vel saltem intra Orbem Activitatis suæ. Itaque vires *Magneticas* non inscite introduxit *Gilbertus*, sed & ipse factus *Magnes*; nimio scilicet plura, quam oportet, ad illas trahens, & *Navem* ædificans ex *Scalmo*.

## Historia Sympathiæ & Antipathiæ rerum.

### A D I T U S.

**L**is, & *Amicitia* in Natura, stimuli sunt Motuum, & Claves Operum. Hinc Corporum Unio & Fuga, hinc Partium Mistio & Separatio, hinc altæ atque intimæ Impressiones Virtutum, & quod vocant, Conjungere activa cum passivis; denique Magnalia Naturæ. Sed impura est admodum hæc pars Philosophiæ, de *Sympathia & Antipathia Rerum*, quam etiam *Naturalem Magiam* appellant, atque (quod semper fere fit) ubi diligentia defuit, spes superfuit. Operatio autem ejus in hominibus, prorsus similis est soporiferis nonnullis Medicamentis, quæ somnum conciliant, atque insuper læta, & placentia somnia immittunt. Primo enim Intellectum humanum in soporem conjicit, decantando Proprietates específicas, & Virtutes occultas, unde homines ad veras causas eruendas non amplius excitantur, nec evigilant; sed in hujusmodi otii acquiescunt: deinde innumera Commenta, Somniorum instar, insinuat, & spargit. Sperant etiam Homines vani, *Naturam*

ex fronte & persona cognoscere, & per  
 Similitudines extrinsecas, Proprietates in-  
 ternas detegere. Practica quoque, Inqui-  
 sitioni similiima. Præcepta enim *Magia*  
*Naturalis* talia sunt, ac si considerent homi-  
 nes terram subigere, & *Panem suum come-*  
*dere* absque *sudore vultus*; & per otiosas,  
 & faciles Corporum Applicationes rerum  
 potentes fieri: semper autem in ore ha-  
 bent, & tanquam sponsores appellant *Ma-*  
*gnetem*, & consensum *Auri* cum *Argento*  
*virgo*; & pauca hujus generis, ad fidem  
 aliarum rerum, quæ neutiquam simili  
 contractu obligantur. Verum optima quæ-  
 que laboribus, tum Inquirendi, tum Ope-  
 randi, proposuit Deus. Nos injure Naturæ  
 enucleando, & rerum fœderibus interpre-  
 randis, paulo diligentiores erimus; nec Mi-  
 raculis faventes, nec tamen Inquisitionem  
 instituentes humilem, aut angustam.

## Historia Sulphuris, Mer- curii, & Salis.

### A D I T U S.

**P**rinicipiorum Trias istud à *Chymistis* in-  
 troducedum est; atque quoad Specula-  
 tiva, est ex iis, quæ illi afferunt, Inventum  
 optimum. Subtiliores ex iis, quique phi-  
 loso-



losophantur maxime, *Elementa* volunt esse *Terram, Aquam, Aërem, Æthera*; Illa autem non *Materiam* rerum esse ponunt, sed *Matrices*; in quibus specifica *Semina* rerum generant, pro natura *Matricis*. Pro *Materia* autem *prima* (quam spoliata, & adiaphoram ponunt *Scholastici*) substituunt illa tria, *Sulphurem, Mercurium, & Salem*, ex quibus omnia Corpora sint coagmentata, & mista: Nos vocabula ipsorum accipimus; Dogmata parum sana sunt. Illud tamen non male cum illorum Opinione convenit, quod duo ex illis, *Sulphurem* scilicet, & *Mercurium* (sensu nostro accepta) censemus esse *Naturas* admodum primordiales, & penitissimos *Materia Schematismos*; & inter *Formas primæ classis* fere præcipuas. Variare autem possumus Vocabula *Sulphuris* & *Mercurii*, ut ea aliter nominemus; *Oleosum, Aqueum: Pingue, Crudum: Inflammabile, Non inflammabile*: huiusmodi. Videntur enim esse hæ duæ Rerum Tribus magnæ prorsus, & quæ Universum occupant, & penetrant: Siquidem in Subterraneis, sunt *Sulphur, & Mercurius*, ut appellantur: in Vegetabili & Animaligenere, sunt *Oleum, & Aqua*: in Pneumaticis inferioribus, sunt *Aër, & Flam-*

*Flamma*: in Cœlestibus, *Corpus stella*, & *Æther purum*; verum de ultima hac Dualitate nil adhuc pronunciamus, licet probabilis videatur esse Symbolizatio. Quod vero ad *Salem* attinet; alia res est. Si enim *Salem* intelligunt pro parte Corporis fixa, quæ neque abit in Flammam, neque in Fumum; pertinet hoc ad *Inquisitionem Flutidi*, & *Determinati*; de quibus nunc non est sermo. Sin *Salem* accipi volunt, secundum literam, absque parabola; non est *Sal* aliquid tertium à *Sulphure*, & *Mercurio*; sed mistum ex utrisque per spiritum acrem devinctis. Etenim *Sal* omnis habet partes inflammabiles; habet alias; flammam non solum non concipientes, sed eam exhorrentes, & strenue fugientes. Nihilominus cum *Inquisitio* de *Sale*, sit quiddam Affine *inquisitioni* de duobus reliquis, atque insuper sit eximii usus, utpote vinculum utriusque Naturæ, *Sulphurea* & *Salis*, & Vitæ ipsius rudimentum; illum etiam in hanc *Historiam* & *Inquisitionem* recipere visum est. At illud interim monemus, de *Pneumaticis* illis, *Aëre*, *Aqua*, *Stellis*, *Æthere*; nos illa (prout certe merentur) *Inquisitionibus* propriis reservare; & de *Sulphure*, & *Mercurio* (tangibili nimirum vel Minerali, vel Vegetabili,

## Historia Vitæ &amp; Mortis.

## A D I T U S.

**D**e *Vita* brevi, & *Arte* longa, vetus est Cantilena, & querela. Videtur igitur esse tanquam ex congruo, ut nos, qui pro viribus incumbimus ad *Artes* perficiendas, etiam de *Vita* Hominum *producenda*, cogitationem suscipiamus, favente & *Veritatis*, & *Vitæ Authore*. Etsi enim *Vita* Mortalium, non aliud sit, quam Cumulus, & accessio Peccatorum, & *Ærumnarum*, quique ad *Æternitatem* aspirant, iis leve sit lucrum *vita*; tamen non despicienda est, etiam nobis *Christianis*, Operum Charitatis Continuatio. Quinetiam *Discipulus Amatus* cæteris superstes fuit; & complures ex *Patribus*, præsertim *Monachis* sanctis, & *Eremitis*, longævi fuerint; ut isti *Benedictioni*, (toties in *Lege veteri* repetitæ,) minus detractum videatur post ævum *Servatoris*, quam reliquis *Benedictionibus* terrenis. Verum ut hoc pro maximo Bono habeatur, proclive est. De Modis assequendi, ardua Inquisitio; eoque magis, quod sit & *Opinionibus* falsis, & *Præconiis* vanis depræ-



depravata. Nam & quæ à turba *Medicorum*, de *Humore Radicali*, & *Calore Naturali* dici solent, sunt seductoria: & laudes immodicæ *Medicinarum Chymicarum*, primo inflant *Hominum* spes, deinde destituunt.

Atque de *Morte*, quæ sequitur ex *Suffocatione*, *Putrefactione*, & variis *Morbis*, non instituitur præsens *Inquisitio*; pertinere enim ad *Historiam Medicinalem*: sed de ea tantum *Morte*, quæ fit per *Resolutionem*, ac *Atrophiam* senilem. Attamen de ultimo passu *Mortis*, atque de ipsa *Extinctione vite*, quæ tot modis, & exterius, & interiorius, fieri potest, (qui tamen habent quasi *Atrium* commune, antequam ad *Articulum Mortis* ventum sit) inquirere; affine quiddam præsentis *Inquisitioni* esse censuimus: sed illud postremo loco ponemus.

Quod reparari potest sensim, atque primo *Integro* non destructo, id potentia æternum est, tanquam *Ignis Vestalis*. Cum igitur viderent *Medici*, & *Philosophi*, aliorum *Animalia*, eorumque *Corpora* reparari, & refici; neque tamen id diu fieri, sed paulo post senescere ea, & ad *Interitum* propere deduci; *Mortem* quæsierunt in aliquo, quod proprie reparari non possit; existimantes *Humorem* aliquem *Radica-*

*calem*, & *Primigenium* non reparari in solidum, sed fieri jam usque ab Infantia, Appositionem quandam degenerem, non Reparationem justam, quæ sensim cum Ætate depravetur, & demum *Pravum* deducat ad *Nullum*. Hæc cogitarunt imperite satis, & leviter. Omnia enim in Animalibus, sub Adolescentia, & Juventute, reparantur integre; quinetiam ad tempus, Quantitate augentur, Qualitate meliorantur; ut Materia Reparationis, quasi æterna esse posset, si Modus Reparationis non intercederet. Sed revera hoc fit. Vergente ætate, inæqualis admodum fit Reparatio; aliæ partes reparantur satis feliciter, aliæ ægre, & in pejus: ut ab eo tempore, Corpora humana subire incipiant tormentum illud *Mexentii*, *Vt viva in amplexu mortuorum immoriantur*, atque facile reparabilia, propter ægre reparabilia copulata, deficient. Nam etiam post Declinationem, & decursum ætatis, *Spiritus, Sanguis, Caro, Adeps*, facile reparantur; at quæ sicciore, aut porosiores sunt partes, *Membrana, & Tunica* omnes, *Nervi, Arteria, Vena*, *Ossa, Cartilagines*, etiam *Viscera* pleraque, denique *Organica* fere omnia, difficilius reparantur, & cum jactura. Illæ autem ipsæ partes, cum ad illas alteras

Repa-

Reparabiles partes , actu reparandas , omnino officium suum præstare debeant ; activitate sua , ac viribus imminutæ , functiones suas amplius exequi non possunt. Ex quo fit , ut paulo post , omnia ruere incipiant , & ipsæ illæ partes , quæ in natura sua sunt valde reparabiles , tamen deficientibus Organis Reparationis , nec ipsæ similiter amplius commode reparentur , sed minuantur , & tandem deficient. Causa autem *Periodi* ea est ; quod Spiritus , instar flammæ lenis perpetuo prædatorius , & cum hoc conspirans Aër externus , qui etiam corpora sugit , & arefacit , tandem officinam Corporis , & Machinas , & Organa perdat , & inhabilia reddat ad Munus Reparationis. Hæ sunt veræ viæ *Mortis naturalis* bene & diligenter animo vendæ. Etenim qui Naturæ vias non novit , quomodo is illis occurrere possit , eamque vertere ?

Itaque duplex debet esse *Inquisitio* : altera de *Consumptione* , aut *Depradatione* corporis humani ; altera de ejusdem *Reparatione* , aut *Refectio* : eo intuitu , ut altera , quantum fieri possit , inhibeatur , altera confortetur. Atque prior istarum pertinet præcipue ad Spiritus , & Aërem externum , per quos fit Deprædatio ; Secunda



ad universum processum Alimentationis, per quem fit Restitutio. Atque quoad primam *Inquisitionis* partem, quæ est de *Consumptione*, omnino illa cum Corporibus Inanimatis, magna ex parte, communis est. Etenim quæ Spiritus innatus (qui omnibus Tangibilibus, sive vivis, sive mortuis inest) & Aër ambiens, operatur super Inanimata, eadem & tentat super Animata; licet superadditus Spiritus vitalis, illas operationes partim infringat, & compescat, partim potenter admodum intendat, & augeat. Nam manifestissimum est Inanimata complura, absque Reparatione, ad tempus bene longum durare posse: At Animata absque Alimento, & Reparatione, subito concidunt, & extinguuntur, ut & Ignis. Itaque *Inquisitio* duplex esse debet; primo contemplando Corpus humanum, tanquam Inanimatum, & Inalimentatum; deinde tanquam Animatum & Alimentatum. Verum hæc præfati, ad *Topica Inquisitionis* jam pergamus, de quibus HISTORIA VITÆ ET MORTIS consulatur.

F I N I S.


FRANCISCI BACONIS  
DE VERULAMIO

HISTORIA  
NATURALIS,

ET

---

DE  
FORMA CALIDI.







*Inquisitio Formarum  
sic procedit.*

**A P H O R I S M U S I.**

**S**uper naturam datam primo facienda est *comparentia ad Intellectum* omnium *Instantiarum* notarum, quæ in eadem natura conveniunt, per Materias licet dissimillimas. Atque hujusmodi collectio facienda est historice, absque contemplatione præfestina, aut subtilitate aliqua majore. Exempli gratia; In Inquisitione de Forma Calidi.

*Instantie Convenientes in  
Natura Calidi.*

1. Radii Solis, præsertim *Æstate & Meridie*.
2. Radii Solis reflexi & constipati, ut inter montes, aut per parietes, & maxime omnium in speculis comburentibus.
3. Meteora Ignita.

F 5

4. Ful-

4. Fulmina Comburentia.
5. Eructationes flammarum ex Cavis montium, &c.
6. Flamma omnis.
7. Ignita solida.
8. Balnea Calida Naturalia.
9. Liquida ferventia aut calefacta.
10. Vapores & Fumi ferventes, atque Aër ipse, qui fortissimum & furemtem suscipit calorem, si concludatur; ut in Reverberatoriis.
11. Tempestates aliquæ sudæ per ipsam constitutionem Aëris, non habita ratione Temporis Anni.
12. Aër conclusus & subterraneus in Cavernis nonnullis, præsertim hyeme.
13. Omnia villosa; ut lana, pelles animalium, & plumagines, habent nonnihil teporis.
14. Corpora omnia, tam solida, quam liquida, & tam densa, quam tenuia (qualis est ipse Aër) Igni ad tempus approximata.
15. Scintillæ ex filice & chalybe per fortem percussionem.
16. Omne Corpus fortiter attritum, ut lapis, lignum, pannus, &c. adeo ut remones, & axes rotarum, aliquando flammam concipiant; & Mos excitandi

tandi Ignis apud Indos Occidentales fuerit per Attritionem.

17. Herbæ virides & humidæ simul conclusæ & contrusæ, ut Rosæ, pisæ in corbibus; adeo ut fœnum si repositum fuerit madidum, sæpe concipiat flammam.
18. Calx viva, aqua aspersa.
19. Ferrum, cum primo dissolvitur per aquas fortes in vitro, idque absque ulla admotione ad ignem: & stannum similiter, &c. sed non adeo intense.
20. Animalia, præsertim & perpetuo per interiora; licet in insectis calor ob parvitatem corporis non deprehendatur ad tactum.
21. Fimus equinus, & hujusmodi excrementa animalium recentia.
22. Oleum forte Sulphuris & Vitrioli exequitur opera Caloris in linteo adurendo.
23. Oleum Origani, & hujusmodi, exequitur opera Caloris, in adurendis ossibus dentium.
24. Spiritus vini fortis & bene rectificatus exequitur opera Caloris; adeo ut si albumen ovi in eum injiciatur, concreascet & albescat, fere in modum albuminis cocti; & panis injectus  
torre-



torrefiat & incrustetur , ad modum panis tosti.

25. Aromata , & herbæ calidæ , ut Dracunculus , Nasturtium vetus , &c. licet ad manum non sint calida , ( nec integra , nec pulveres eorum ) tamen ad linguam & palatum parum masticata , percipiuntur calida , & quasi adurentia.
26. Acetum forte , & omnia acida , in membro ubi non sit *Epidermis* , ut in oculo , lingua , aut aliqua alia parte vulnerata , & cure detecta , dolorem cient , non multum discrepantem ab eo qui inducitur à calido.
27. Etiam frigora acria & intensa inducunt sensum quendam ustionis;  
*Nec Boreæ penetrabile frigus adurit.*
28. Alia.

Hanc *Tabulam Essentia & Prasentia*, appellare consuevimus.

## A P H O R. II.

Secundo , facienda est *Comparentia* ad Intellectum *Instantiarum*, quæ Naturæ data privantur : quia Forma ( ut dictum est ) non minus abesse debet , ubi Natura data abest ; quam adesse , ubi adest. Hoc vero infinitum esset in omnibus,

Ita-

Itaque subjungenda sunt *Negativa Affirmativa*, & Privationes inspiciendæ tantum in illis Subjectis, quæ sunt maxime cognata illis alteris, in quibus natura data inest & comparer. Hanc *Tabulam declinationis*, sive *Absentia in proximo*, appellare consuevimus.

*Instantia in proximo*, quæ pri-  
vantur natura Calidi.

*Ad Instantiam 1<sup>am</sup> Affirmativam. Instantia negativa sive Subjunctiva.*

Lunæ & Stellarum, & Cometarum radii non inveniuntur Calidi ad tactum: quinetiam observari solent acerrima frigora in Pleniluniis. At Stellæ fixæ Majores, quando Sol eas subit, aut iis approximat, existimantur fervores Solis augere & intendere; ut fit cum Sol sistitur in Leone, & Diebus Canicularibus.

*Ad Instantiam 2<sup>am</sup> Negativa VI.*

1. Radii Solis in Media (quam vocant) Regione Aëris non calefaciunt; cujus ratio vulgo non male redditur; quia Regio illa nec satis appropinquat ad Corpus Solis,

Solis unde radii emanant , nec etiam ad Terram , unde reflectuntur. Atque hoc liquet ex fastigiis Montium , ( si sint præalti ) ubi nives perpetuo durant. Sed contra notatum est à nonnullis , quod in cacumine *Picus de Tenariph* , atque etiam in *Andis Peruvia* , ipsa fastigia Montium nive destituta sint ; nivibus jacentibus tantum inferius in ascensu. Atque insuper Aër in illis Verticibus Montium deprehenditur minime frigidus ; sed tenuis tantum & acer , adeo ut , in *Andis* , pungat & vulneret oculos per nimiam acrimoniam , atque etiam pungat os ventriculi , & inducat vomitum. Atque ab Antiquis notatum est , in vertice *Olympi* tantam fuisse Aëris tenuitatem , ut necesse fuerit illis , qui eo ascenderant , secum deferre spongiarum aceto & aqua madefactas , easque ad os & nares subinde apponere ; quia Aër ob tenuitatem non sufficiebat respirationi : In quo Vertice etiam relatum est , tantam fuisse serenitatem & tranquillitatem à pluviis , & nivibus , & ventis ; ut à Sacrificantibus literæ descriptæ digito in cineribus Sacrificiorum super aram *Iovis* , manerent in annum proximum absque ulla perturbatione. Atque etiam hodie ascendentes ad verticem *Picus de Tenariph* , eo vadunt noctu & non interdiu ;



diu; & paulo post ortum Solis moventur & excitantur à Ducibus suis, ut festinent descendere, propter periculum ( ut videtur ) à tenuitate Aëris, ne solvat spiritus & suffocet.

2. Reflexio radiorum Solis, in Regionibus prope Circulos Polares, admodum debilis & inefficax invenitur in Calore: adeo ut Belgæ, qui hybernarunt in nova *Zembla*, cum expectarent navis suæ liberationem & deobstructionem à glaciali mole ( quæ eam obsederat ) per initia mensis Julii spe sua frustrati sint, & coacti scaphæ se committere. Itaque radii Solis directi videntur parum posse, etiam super terram planam; nec reflexi etiam, nisi multiplicentur & uniantur; quod fit, cum Sol magis vergit ad perpendicularum; quia tum incidentia radiorum facit angulos acutiores; ut lineæ radiorum sint magis in propinquo: ubi contra in magnis obliquitatibus Solis, anguli sint valde obtusi, & proinde lineæ radiorum magis distantes. Sed interim notandum est, multas esse posse operationes radiorum Solis, atque etiam ex natura Calidi, quæ non sunt proportionatæ ad tactum nostrum: adeo ut respectu nostri non operentur usque ad calefactionem, sed respectu aliorum non-

nul-

nullorum corporum exequantur opera Calidi.

3. Fiat hujusmodi Experimentum. Accipiaturn speculum fabricatum, contra ac fit in speculis Comburentibus; & interponatur inter manum & radios Solis; & fiat observatio, utrum minuat calorem Solis, quemadmodum speculum Comburens eundem auget & intendit. Manifestum est enim quoad radios Opticos, prout fabricatur speculum in densitate inæquali respectu Medii & Laterum, ita apparere simulachra magis diffusa, aut magis contracta. Itaque idem videndum in Calore.

4. Fiat Experimentum diligenter, utrum per Specula Comburentia fortissima & optime fabricata, radii Lunæ possint excipi & colligi in aliquem vel minimum gradum teporis. Is vero gradus teporis, si fortasse nimis subtilis & debilis fuerit, ut ad tactum percipi & deprehendi non possit; confugiendum erit ad Vitra illa quæ indicant constitutionem Aëris calidam aut frigidam; ita ut radii Lunæ per Speculum Comburens incidant, & jactantur in summitatem Vitri hujusmodi; atque tum notetur, si fiat depressio aquæ per teporem.

5. Practicetur etiam Vitrum Comburentens

rens super Calidum , quod non sit radio-  
sum aut luminosum ; ut Ferri , & Lapidis  
calefacti, sed non igniti , aut Aquæ ferven-  
tis , aut similibus : & notetur , utrum fiat  
augmentum & intentio Calidi , ut in ra-  
diis Solis.

6. Practicetur etiam Speculum Com-  
burens in flamma communi.

*Ad Instantiam 3<sup>am</sup> Affirmativam  
Negativa una.*

Cometarum ( si & illos numerare inter  
Meteora libuerit ) non deprehenditur con-  
ardoribus anni , licet siccitate <sup>augendis</sup> ~~et~~ sequi notatæ sint. Quinetiam Trabes , &  
Columnæ Lucidæ , & Chasmata , & simi-  
lia , apparent sæpius temporibus hybernis,  
quam æstivis ; & maxime per intensissima  
frigora , sed conjuncta cum siccitatibus.  
Fulmina tamen & Coruscationes & To-  
nitrua raro eveniunt hyeme , sed sub tem-  
pus magnorum fervorum. At Stellæ ( quas  
vocant ) Cadentes , existimantur vulgo  
magis constare ex viscosa aliqua materia  
splendida & accensa , quam esse naturæ  
ignæ fortioris. Sed de hoc inquiratur ul-  
terius.



*Ad 4<sup>am</sup> una.*

Sunt quædam Coruscationes, quæ præbent Lumen, sed non urunt: Eæ vero semper fiunt sine Tonitru.

*Ad 5<sup>am</sup> una.*

Eruktiones & eruptiones Flammarum inveniuntur non minus in Regionibus frigidis quam calidis; ut in *Islandia* & *Groenlandia*: quemadmodum & Arbores per regiones frigidas magis sunt quandoque inflammabiles, & magis piceæ ac resinosæ, quam per regiones calidas; ut sit in Abiete, Pinu, & reliquis: Verum in qualibet perueniendi solent, ut possimus *Affirmativa* subungere *Negativam*, non satis quæsitum est.

*Ad 6<sup>am</sup> una.*

Omnis flamma perpetuo est calida magis aut minus, neque omnino subjungitur *Negativa*: Et tamen referunt Ignem Fatuum, (quem vocant) qui etiam aliquando impingitur in parietem, non multum habere caloris; fortasse instar flammæ spiritus vini, quæ clemens & lenis est. Sed adhuc lenior videtur ea flamma, quæ in nonnullis Historiis fidis & gravibus invenitur

nitur apparuisse circa capita & comas  
Puerorum & Virginum; quæ nullo modo  
comas adurebat, sed molliter circum eas  
trepidabat. Atque certissimum est, circa  
Equum in itinere sudantem, noctu & suda  
tempestate apparuisse quandoque corus-  
cationem quandam absque manifesto ca-  
lore. Atque paucis abhinc annis, notissi-  
mum est, & pro miraculo quasi habitum,  
Gremiale cuiusdam Puellæ paulo motum  
aut fricatum coruscasse: quod fortasse fa-  
ctum est ob alumen aut sales, quibus gre-  
miale tinctum erat, paulo crassius hæren-  
tia & incrustata, & ex fricatione fracta.  
Atque certissimum est, Saccharum omne,  
sive Conditum (ut vocant) sive nuptia,  
modo sit durius, in tenebris factum aut  
cultello sculptum coruscare. Similiter A-  
liqua Marina & salsa, noctu interdum inve-  
nitur remis fortiter percussa coruscare.  
Atque etiam in tempestatibus Spuma Ma-  
ris fortiter agitata noctu coruscat; quam  
Coruscationem Hispani *pulmonem Mari-*  
*num* vocant. De illa Flamma autem, quam  
Antiqui nautæ vocabant *Castorem* & *Pol-*  
*lucem*, & moderni *Focum Sancti Ermi*,  
qualem calorem habeat, non satis quæsi-  
tum est.

*Ad 7<sup>am</sup> una.*

Omne Ignitum ita ut vertatur in ruborem igneum, etiam sine flamma perpetuo Calidum est; neque huic *Affirmativa* subjungitur *Negativa*: sed quod in proximo est, videtur esse Lignum putre; quod splendet noctu, neque tamen deprehenditur calidum: & squamæ Piscium putrescentes, quæ etiam splendent noctu, nec inveniuntur ad tactum calidæ; neque etiam corpus Cicindelæ, aut Muscæ (quam vocant Luciolam) calidum ad tactum deprehenditur.

*Ad 8<sup>am</sup> una.*

De Balneis calidis, in quo situ & natura Soli emanare soleant, non satis quæsitum est: itaque non subjungitur *Negativa*.

*Ad 9<sup>am</sup> una.*

Liquidis ferventibus subjungitur *Negativa* ipsius Liquidi in natura sua. Nulum enim invenitur liquidum tangibile, quod sit in natura sua, & maneat constanter Calidum; sed superinducitur ad tempus tantum Calor, ut Natura ascititia: adeo ut quæ potestate & operatione sunt maxime Calida, ut Spiritus Vini, olea aromatum



minatum chymica, etiam oleo vitrioli & sulphuris, & similia, quæ paulo post adurunt; ad primum tactum sint frigida. Aquarum naturam Balneorum naturalium excepta in varias aliquod, & separata à fontibus suis deinceps effervescent perinde ac aqua igne calefacta. At verum est corpora Oleosa, ad tactum paulo minus esse frigida quam Aquea; ut Oleum minus quam Aqua, Sericum minus quam Linteum. Verum hoc pertinet ad *Tabulam Graduum* de Frigido.

*Ad 10<sup>am</sup> una.*

1. Similiter Vaporis fervido subjungitur *Negativa* naturæ ipsius Vaporis, qualis apud nos invenitur. Etenim exhalationes ex Oleosis, licet facile inflammabiles, tamen non inveniuntur calidæ, nisi à corpore calido recenter exhalaverint.
2. Similiter Aëri ipsi ferventi subjungitur *Negativa* naturæ Aëris ipsius. Neque enim invenitur apud nos Aër calidus; nisi fuerit aut conclusus, aut attritus, aut manifeste calefactus à Sole, Igne, aut aliquo alio corpore calido.

*Ad 11<sup>am</sup> una.*

Subjungitur *Negativa* Tempestatum frigidarum magis quam pro ratione temperaturæ

poris Anni, quæ eveniunt apud nos flante Euro & Borea: quemadmodum & contrariæ tempestates eveniunt flante Austro & Zephyro. Etiam inclinatio ad pluviam (præsertim temporibus hyemalibus) comitatur tempestatem repidam: at Gelu contra, frigidam.

*Ad 12<sup>am</sup> una.*

Subjungitur *Negativa* Aëris conclusi in cavernis tempore æstivo. At de Aëre concluso omnino diligentius inquirendum. Primo enim non absque causa in dubitationem venit, qualis sit natura Aëris, quatenus ad Calidum & Frigidum in natura sua propria. Recipit enim Aër Calidum manifesto ex impressione Cœlestium; Frigidum autem fortasse ab expiratione Terræ; & rursus in Media (quam vocant) Regione Aëris, à vaporibus frigidis & nivibus: Ut nullum iudicium fieri possit de Aëris natura per Aërem qui ferus est & sub Dio, sed verius foret iudicium per Aërem conclusum. Atqui opus est etiam ut Aër concludatur in tali vase & materia, quæ nec ipsa imbuat Aërem calido, vel frigido ex vi propria, nec facile admittat vim Aëris extranei. Fiat itaque Experimentum per ollam figuralem multiplici corio

serico obductam ad muniendam ipsam ab  
Aëre extraneo , facta mora per tres aut  
quatuor dies in vase bene occluso : depre-  
hensio autem fit post apertionem vasis, vel  
per manum , vel per vitrum graduum or-  
dine applicatum.

*Ad 13<sup>am</sup> una.*

Subest similiter dubitatio , utrum tepor  
in lana, & pellibus, & plumis, & hujusmo-  
di, fiat ex quodam exili calore inhærente,  
quatenus excernuntur ab animalibus ; aut  
etiam ob pinguedinem quandam & oleo-  
sitate, quæ sit naturæ congruæ cum te-  
pore ; vel plane ob conclusionem & fra-  
ctionem Aëris, ut in articulo præcedente  
dictum est. Videtur enim omnis Aër ab-  
scissus, à continuitate Aëris forinseci ha-  
bere nonnihil teporis. Itaque fiat Expe-  
rimentum in fibrosis, quæ fiunt ex lino ;  
non ex lana, aut plumis, aut serico, quæ  
excernuntur ab animatis. Notandum est  
etiam, omnes pulveres (ubi manifesto in-  
cluditur Aër) minus esse frigidos, quam  
corpora ipsorum : quemadmodum etiam  
existimamus omnem spumam ( utpote  
quæ aërem contineat ) minus esse frigi-  
dam, quam liquorem ipsum.

*Ad*



*Ad 14<sup>am</sup> una.*

Huic non subjungitur *Negativa*. Nihil enim reperitur apud nos sive Tangibile, sive Spiritale, quod admotum igni non excipiat calorem. In eo tamen differunt, quod alia excipiant calorem citius, ut Aër, Oleum, & Aqua; alia tardius, ut Lapis & Metalla. Verum hoc pertinet ad *Tabulam Graduum*.

*Ad 15<sup>am</sup> una.*

Huic Instantiæ non subjungitur *Negativa* alia, quam ut bene notetur; Non excitari scintillas ex filice & chalybe, aut alia aliqua substantia dura, nisi ubi excutuntur minutiæ aliquæ ex ipsa substantia Lapidis vel Metalli: neque Aërem attritum unquam per se generare scintillas, ut vulgo putant: Quia & ipsæ illæ scintillæ ex pondere corporis igniti magis vergunt deorsum quam sursum, & in extinctione redeunt in quandam fuliginem corpoream.

*Ad 16<sup>am</sup> una.*

Existimamus huic Instantiæ non subjungi *Negativam*. Nullum enim invenitur apud nos corpus tangibile, quod non ex attritione manifesto caleseat; adeo ut

Vc-

Veteres somniarent non inesse Cœlestibus aliam viam aut virtutem calefaciendi, nisi ex attritione Aëris per rotationem rapidam & incitatam. Verum in hoc genere ulterius inquirendum est, utrum corpora quæ emittuntur ex Machinis (qualia sunt pilæ ex Tormentis) non ex ipsa percussione contrahant aliquem gradum caloris; adeo ut postquam deciderint, inveniuntur nonnihil calida. At Aër motus magis infrigidat quam calefacit; ut in Ventis, & Follibus, & flatu oris contracti. Verum hujusmodi motus non est tam rapidus, ut excitet calorem: & fit secundum totum, non per particulas: ut mirum non sit, si non generet calorem.

*Ad 17<sup>am</sup> una.*

Circa hanc Instantiam facienda est inquisitio diligentior. Videntur enim Herbæ & Vegetabilia viridia & humida aliquid habere in se occulti caloris. Ille vero calor tam tenuis est, ut in singulis non percipiatur ad tactum: Verum postquam illa adunata sint & conclusa, ut spiritus ipsorum non expiret in aërem, sed se invicem foveat: tum vero oritur calor manifestus, & nonnunquam flamma in materia congrua.

G

*Ad*

*Ad 18<sup>am</sup> una.*

Etiam circa hanc Instantiam diligentior facienda est inquisitio. Videtur enim calx viva aqua aspersa concipere calorem; vel propter unionem caloris qui antea distrahebarur, (ut ante dictum est de Herbis conclusis) vel ob irritationem & exasperationem spiritus ignei ab aqua, ut fiat quidam conflictus & antiperistasis. Utra vero res sit in causa, facilius apparebit, si loco Aquæ immittatur Oleum: Oleum enim æque ac Aqua valebit ad unionem spiritus inclusi, sed non ad irritationem. Etiam faciendum est Experimentum latius tam in cineribus & calcibus diversorum corporum, quam per immersionem diversorum liquorum.

*Ad 19<sup>am</sup> una.*

Huic Instantiæ subjungitur *Negativa* aliorum Metallorum, quæ sunt magis mollia & fluxa. Etenim bracteolæ Auri solutæ in liquorem per Aquam Regis, nulum dant calorem ad tactum in dissolutione: neque similiter plumbum in Aqua forti. Neque etiam Argentum vivum, (ut memini) sed Argentum ipsum parum excitat



citat caloris, atque etiam Cuprum, (ut memini) sed magis manifesto Stannum, atque omnium maxime Ferrum & Chalybs; quæ non solum fortem excitant calorem in dissolutione, sed etiam violentam ebullitionem. Itaque videtur calor fieri per conflictum, cum Aquæ fortes penetrant, & fodiunt, & divellunt partes corporis, & corpora ipsa resistunt. Ubi vero corpora facilius cedunt, vix excitatur Calor.

*Ad 20<sup>am</sup> una.*

Calori Animalium nulla subjungitur *Negativa*, nisi Insectorum (ut dictum est) ob parvitatem corporis. Etenim in Piscibus collatis ad Animalia terrestria magis notatur gradus caloris, quam privatio. In Vegetabilibus autem & Plantis nullus percipitur gradus caloris ad tactum, neque in lachrymis ipsorum, neque in Medullis recenter apertis. At in Animalibus magna reperitur diversitas Caloris; tum in partibus ipsorum; (alius est enim calor circa Cor, alius in Cerebro, alius circa Externa) tum in Accidentibus eorum, ut in exercitatione vehementi, & febribus.

*Ad 21<sup>am</sup> una.*

Huic Instantiæ vix subjungitur *Negativa*.

*tiva.* Quinetiam excrementa Animalium non recentia manifeste habent calorem potentialem, ut cernitur in impinguatione soli.

*Ad 22<sup>am</sup> una.*

Liquores ( sive Aquæ vocentur, sive Olea ) qui habent magnam & intensam acrimoniam, exequuntur opera caloris in divulsione corporum, atque adustione post aliquam moram: sed tamen ad ipsum tactum manus, non sunt calidi ab initio. Operantur autem secundum analogiam, & poros corporis cui adjunguntur. Aqua enim Regis Aurum solvit, Argentum minime: At contra, Aqua fortis Argentum solvit, Aurum minime: Neutrum autem solvit Vitrum; & sic de cæteris.

*Ad 24<sup>am</sup> una.*

Fiat Experimentum spiritus vini in Lignis, ac etiam in Butyro, aut Cera, aut Pice; si forte per calorem suum ea aliquatenus liquefaciat. Etenim Instantia 24. ostendit potestatem ejus imitativam Caloris in incrustationibus. Itaque fiat similiter Experimentum in Liquefactionibus. Fiat etiam Experimentum per Vitrum Graduum sive Calendare, quod concavum  
sit

fit in summitate sua per exterius ; & im-  
mittatur in illud concavum exterius spiri-  
tus vini bene rectificatus , cum operculo  
ut melius contineat calorem suum ; & no-  
tetur utrum per calorem suum faciat aquam  
descendere.

*Ad 25<sup>am</sup> una.*

Aromata , & Herbæ acres ad palatum,  
multo magis sumptæ interius , percipiun-  
tur calida. Videndum itaque in quibus  
aliis materiis exequantur opera caloris.  
Atque referunt Nautæ , cum cumuli &  
massæ Aromatum diu conclusæ subito a-  
periuntur , periculum instare illis qui eas  
primo agitant & extrahunt , à febribus &  
inflammationibus spiritus. Similiter fieri  
poterit Experimentum , utrum pulveres  
hujusmodi Aromatum aut Herbarum non  
arefaciant Laridum , & Carnem suspensam  
super ipsos, veluti fumus Ignis.

*Ad 26<sup>am</sup> una.*

Acrimonia sive Penetratio inest tam Frigi-  
dis, qualia sunt Acetum , & oleum Vitrioli;  
quam Calidis, qualia sunt oleum Origani &  
similia. Itaque similiter & in Animatis cient  
dolorem, & in non Animatis divellunt par-  
tes & consumunt. Neque huic Instantiæ



subjungitur *Negativa*. Atque in Animalis nullus reperitur dolor, nisi cum quodam sensu caloris.

*Ad 27<sup>am</sup> una.*

Communes sunt complures actiones & Calidi, & Frigidi, licet diversa admodum ratione. Nam & nives, puerorum manus videntur paulo post urere; & frigora tuentur carnis à putrefactione, non minus quam ignis; & Calores contrahunt corpora in minus; quod faciunt & Frigida. Verum hæc & similia opportunius est referre ad Inquisitionem de Frigido.

A P H O R. III.

**T**ertio facienda est *Comparentia ad Intellectum* Instantiarum in quibus Natura, de qua fit Inquisitio, inest secundum magis & minus; sive facta comparatione incrementi & decrementi in eodem subiecto, sive facta comparatione ad invicem in subiectis diversis. Cum enim Forma rei sit ipsissima Res; neque differat Res à Forma, aliter quam differunt Apparens & Existens, aut Exterius & Interius, aut in ordine ad Hominem & in Ordine ad Universum; omnino sequitur, ut non recipiatur aliqua Natura pro vera Forma, nisi  
perpe-

perpetuo decrescat quando Natura ipsa decrevit, & similiter perpetuo augeatur quando Natura ipsa augetur. Hanc itaque Tabulam, *Tabulam Graduum*, sive *Tabulam Comparativam* appellare consuevimus.

*Tabula Graduum, sive Comparativa in Calido.*

Primo itaque dicemus de iis quæ nulum prorsus gradum Caloris habent ad tactum, sed videntur habere potentialem tantum quendam calorem, sive dispositionem & præparationem ad calidum. Postea demum descendemus ad ea, quæ sunt actus, sive ad tactum Calida, eorumque fortitudines & gradus.

I. In corporibus solidis & tangibilibus non invenitur aliquid, quod in Natura sua Calidum sit originaliter. Non enim lapis aliquis, non metallum, non sulphur, non fossile aliquod, non lignum, non aqua, non cadaver animalis, inveniuntur Calida. Aquæ autem calidæ in Balneis videntur calefieri per accidens, sive per flammam, aut ignem subterraneum, qualis ex *Ætna*, & montibus aliis compluribus evomitur; sive ex conflictu corporum, quemadmodum Calor fit in ferri & stanni dissolu-

lutionibus. Itaque gradus Caloris in Inanimatis, quatenus ad tactum humanum, nullus est; veruntamen illa gradu Frigoris differunt; non enim æque frigidum est lignum, ac metallum. Sed hoc pertinet ad *Tabulam graduum in Frigido.*

2. Attamen quoad potentiales Calores & præparationes ad flammam, complura inveniuntur inanimata admodum disposita, ut Sulphur, Naphta, Petrelæum.

3. Quæ antea incaluerunt, ut fimus equinus ex animali, aut calx, aut fortasse cinis aut fuligo ex Igne, reliquias latentes quasdam caloris prioris retinent. Itaque fiunt quædam distillationes & separationes corporum, per sepulturam in fimo equino; atque excitatur calor in calce, per asperisionem aquæ; ut jam dictum est.

4. Inter Vegetabilia non invenitur aliqua Planta, siue pars Plantæ (veluti lachryma, aut medulla) quæ sit ad tactum humanum calida. Sed tamen (ut superius dictum est) herbæ virides conclusæ calefcunt; atque ad interiorem tactum, veluti ad palatum, aut ad stomachum, aut etiam ad exteriores partes post aliquam moram (ut in emplastris & unguentis) alia vegetabilia inveniuntur calida, alia frigida.

§. Non



5. Non invenitur in partibus animalium, postquam fuerint mortuæ aut separatae, aliquid calidum ad tactum humanum. Nam neque fimus equinus ipse, nisi fuerit conclusus & sepultus, calorem retinet. Sed tamen omnis fimus habere videtur calorem potentialem, ut in agrorum impinguatione. Et similiter, cadavera animalium, hujusmodi habent latentem & potentialem calorem; adeo ut in Cœmeteriis, ubi quotidie fiunt sepulturae; Terra calorem quendam occultum colligat, qui cadaver aliquod recenter impositum consumit, longe citius quam terra pura. Atque apud Orientales traditur inveniri textile quoddam tenue & molle, factum ex avium plumagine, quod vi innata butyrum solvat & liquefaciat, in ipso leviter involutum.

6. Quæ impinguant agros, ut Fimi omnis generis, Creta, Arena maris, Sal, & similia, dispositionem nonnullam habent ad Calidum.

7. Omnis putrefactio in se rudimenta quædam exilis Caloris habet, licet non hucusque, ut ad tactum percipiatur. Nam nec ea ipsa quæ putrefacta solvuntur in animalcula, ut Caro, Caseus, ad tactum percipiuntur Calida; neque lignum pu-

tre, quod noctu splendet, deprehenditur ad tactum Calidum. Calor autem in putridis quandoque se prodit per odores terros & fortes.

8. Primus itaque Caloris gradus, ex iis quæ ad tactum humanum percipiuntur Calida, videtur esse Calor animalium, qui bene magnam habet graduum latitudinem: nam infimus gradus (ut in insectis) vix ad tactum deprehenditur; summus autem gradus vix attingit ad gradum Caloris radiorum Solis in regionibus & temporibus maxime ferventibus; neque ita acris est, quin tolerari possit à manu. Et tamen referunt de *Constantio*, aliisque nonnullis, qui Constitutionis & habitus Corporis admodum sicci fuerunt, quod acutissimis febribus correpti, ita incaluerint, ut manum admotam aliquantulum urere visi sint.

9. Animalia, ex Motu & exercitatione, ex vino & epulis, ex venere, ex febribus ardentissimis, & ex dolore, augentur Calore.

10. Animalia in accessibus febrium intermittentium, à principio, frigore & horrore corripiuntur; sed paulo post majorem in modum incalescunt; quod etiam faciunt à principio in Causonibus, & febribus pestilentialibus.

11. Inquiratur ulterius de Calore comparato in diversis animalibus, veluti piscibus, quadrupedibus, serpentibus, avibus; atque etiam secundum species ipsorum, ut in Leone, Milvio, Homine, Nam ex vulgari opinione, pisces per interiora minus calidi sunt, aves autem maxime calidæ; præsertim Columbæ, Accipitres, Struthiones.

12. Inquiratur ulterius de Calore comparato in eodem animali, secundum partes & membra ejus diversa. Nam lac, sanguis, sperma, ova, inveniuntur gradu modico tepida, & minus calida quam ipsa caro exterior in animali, quando movetur, aut agitur. Qualis vero gradus sit caloris in cerebro, stomacho, corde, & reliquis, similiter adhuc non est quæsitum.

13. Animalia omnia, per hyemem & tempestates frigidas, secundum Exterius frigent; sed per Interiora etiam magis esse calida existimantur.

14. Calor Cœlestium etiam in regione calidissima, atque temporibus anni & diei calidissimis, non eum gradum Caloris obtrinet, qui vel lignum aridissimum, vel stramen, vel etiam linteum ustum incendat aut adurat, nisi per specula comburentia roboretur; sed tamen è rebus humidis vaporem excitare potest.



15. Ex traditione Astronomorum ponuntur stellæ aliæ magis, aliæ minus Calidæ. Inter Planetas enim post *Solem* ponitur *Mars* calidissimus, deinde *Iupiter*, deinde *Venus*; ponuntur autem tanquam frigidi, *Luna*, & deinde omnium maxime *Saturnus*. Inter fixas autem ponitur calidissimus *Sirius*; deinde *Cor Leonis*, sive *Regulus*; deinde *Canicula*, &c.

16. Sol magis calefacit, quo magis vergit ad perpendicularum, sive *Zenith*; quod etiam credendum est de aliis Planetis, pro modulo suo Caloris. Exempli gratia; *Iovem* magis apud nos calefacere, cum positus sit sub *Cancro*, aut *Leone*, quam sub *Capricorno*, aut *Aquario*.

17. Credendum est, *Solem* ipsum, & Planetas reliquos, magis calefacere in *Perigæis* suis, propter propinquitatem ad terram, quam in *Apogæis*. Quod si eveniat, ut in aliqua regione Sol sit simul in *Perigæo*, & propius ad perpendicularum; necesse est ut magis calefaciat, quam in regione ubi Sol sit similiter in *Perigæo*, sed magis ad obliquum. Adeo ut Comparatio exaltationis Planetarum notari debeat, prout ex perpendicularo aut obliquitate participet, secundum regionum varietatem.

18. Sol

18. Sol etiam, & similiter reliqui Planetæ, calefacere magis exstimantur, cum sunt in proximo ad Stellæ fixas majores; veluti cum Sol ponitur in Leone, magis vicinus fit cordi Leonis, caudæ Leonis, & Spicæ virginis, & Sirio, & Caniculæ, quam cum ponitur in Cancro, ubi tamen magis sistitur ad perpendicularum. Atque credendum est, partes Cœli majorem infundere calorem ( licet ad tactum minime perceptibilem ) quo magis ornatae sint Stellis, præsertim majoribus.

19. Omnino Calor Cœlestium augetur tribus modis; videlicet ex perpendicularo, ex propinquitate sive Perigæo, & ex conjunctione sive consortio Stellarum.

20. Magnum omnino invenitur intervallum inter Calorem Animalium, ac etiam radiorum Cœlestium, ( prout ad nos deferuntur, ) atque flammam, licet lenissimam, atque etiam Ignita omnia; atque insuper liquores, aut Aërem ipsum, majorem in modum ab igne calefactum. Et enim flamma spiritus vini præsertim rara, nec constipata, tamen potis est stramen, aut linteum, aut papyrus incendere; quod nunquam faciet Calor Animalis, vel Solis, absque speculis comburentibus.

21. Flammæ autem, & Ignitorum, plurimi

rimi sunt gradus in fortitudine & debilitate Caloris. Verum de his nulla est facta diligens Inquisitio ; ut necesse sit ista leviter transmittere. Videtur autem ex flammis illa ex spiritu vini esse mollissima ; nisi forte Ignis fatuus , aut flammæ , seu coruscationes ex sudoribus animalium , sint molliores. Hanc sequi opinamur flammam ex vegetabilibus & porosis , ut stramine , scirpis , & foliis arefactis , à quibus non multum differre flammam ex pilis aut plumis. Hanc sequitur fortasse flamma ex lignis , præsertim iis quæ non multum habent ex resina aut pice ; ita tamen ut flamma ex lignis quæ parva sunt mole ( quæ vulgo colligantur in fasciculos ) lenior sit , quam quæ fit ex truncis arborum & radicibus. Id quod vulgo experiri licet in fornacibus quæ ferrum excoquant , in quibus ignis ex fasciculis & ramis arborum non est admodum utilis. Hanc sequitur ( ut arbitramur ) flamma ex oleo , & sevo , & cera , & huiusmodi oleosis & pinguibus , quæ sunt sine magna acrimonia : fortissimus autem Calor reperitur in pice & resina ; atque adhuc magis in Sulphure , & Caphura , & Naphtha , & Petrelæo , & Salibus , ( postquam materia cruda eruperit ) & in horum compositionibus , veluti pulvere  
Tor-



Tormentario, Igne Græco, (quem vulgo Ignem ferum vocant) & diversis ejus generibus, quæ tam obstinatum habent Calorem, ut ab aquis non facile extinguantur.

22. Existimamus etiam, flammam, quæ resultat ex nonnullis metallis imperfectis, esse valde robustam & acrem. Verum de istis omnibus inquiratur ulterius.

23. Videtur autem flamma fulminum potentiorum has omnes flammæ superare; adeo ut ferrum ipsum perfectum aliquando colliquaverit in guttas; quod flammæ illæ alteræ facere non possunt.

24. In Ignitis autem diversi sunt etiam gradus. Caloris, de quibus etiam non facta est diligens inquisitio. Calorem maxime debilem existimamus esse ex linteo usto, quali ad flammæ excitationem uti solemus; & similiter ex ligno illo spongioso, aut funiculis arefactis, qui ad tormentorum accensionem adhibentur. Post hunc sequitur carbo ignitus ex lignis, & anthracibus, atque etiam ex lateribus ignitis, & similibus. Ignitorum autem vehementissime Calida existimamus esse metalla ignita, ut Ferrum, & Cuprum, & cætera. Verum de his etiam facienda est ulterior inquisitio.

25. Inveniuntur ex Ignitis nonnulla longe Calidiora, quam nonnullæ ex flammis. Multo enim Calidius est, & magis adurens Ferrum Ignitum, quam flamma spiritus vini.

26. Inveniuntur etiam ex illis quæ Ignita non sunt, sed tantum ab igne Calefacta, sicut Aquæ ferventes, & Aër conclusus in reverberatoriis, nonnulla quæ superant Calore multa ex flammis ipsis, & Ignitis.

27. Motus auget Calorem; ut videre est in follibus & flatu; adeo ut duriora ex Metallis non solvantur, aut liquefiant per ignem mortuum aut quietum, nisi flatu excitetur.

28. Fiat Experimentum per specula comburentia, in quibus (ut memini) hoc fit; ut si speculum ponatur (exempli gratia) ad distantiam spithamæ ab objecto combustibili, non tantopere incendat aut adurat, quam si positum fuerit speculum (exempli gratia) ad distantiam semispithamæ, & gradatim & lente trahatur ad distantiam spithamæ. Conus tamen, & unio radorum eadem sunt, sed ipse Motus auget operationem Caloris.

29. Existimantur incendia illa, quæ fiunt flante vento forti, majores progressus

et  
fus facere adversus ventum, quam secundum ventum, quia scilicet flamma resilit motu perniciores, vento remittente, quam procedit vento impellente.

30. Flamma non emicat aut generatur, nisi detur aliquid concavi, in quo flamma movere possit & ludere; præterquam in flammis flatuosis pulveris Tormentarii & similibus, ubi compressio & incarceration flammæ auget ejus furorem.

31. Incus per malleum calefit admodum; adeo ut si Incus fuerit laminæ tenuioris, existimemus illam per fortes & continuos ictus mallei posse rubescere, ut ferrum ignitum; sed de hoc fiat Experimentum.

32. At in Ignitis quæ sunt porosa, ita ut detur spatium ad exercendum motum ignis, si cohibeatur hujusmodi motus per compressionem fortem, statim extinguuntur ignis; veluti cum linteum ustum, aut filum ardens candelæ aut lampadis, aut etiam carbonis aut pruna ardens, comprimuntur per pressorium, aut pedis conculcationem, aut hujusmodi, statim cessant operationes Ignis.

33. Approximatio ad corpus Calidum augeat Calorem, gradu approximationis; quod etiam fit in lumine: Nam quo propius



propius collocatur objectum ad lumen, eo magis est visibile.

34. Unio calorum diversorum auget Calorem, nisi facta sit commistio corporum. Nam focus magnus, & focus parvus in eodem loco, non nihil invicem augent Calorem; at aqua tepida immissa in aquam ferventem refrigerat.

35. Mora corporis calidi auget Calorem. Etenim Calor perpetuo transiens & emanans, commiscetur cum calore præinexistente, adeo ut multiplicet Calorem. Nam focus non æque calefacit cubiculum per moram semihoræ, ac si idem focus dureret per horam integram. At hoc non facit lumen; Etenim lampas aut candela in aliquo loco posita, non magis illuminat per moram diuturnam, quam statim ab initio.

36. Irritatio per frigidum ambiens auget Calorem; ut in focus videre est per gelu acre. Quod existimamus fieri non tantum per conclusionem & contractionem Caloris, quæ est species unionis; sed per exasperationem: veluti cum Aër aut baculum violenter comprimitur aut flectitur, non ad punctum loci prioris resilit, sed ulterius in contrarium. Itaque fiat diligens Experimentum, per baculum vel simile

simile aliquid immissum in flammam, utrum ad latera flammæ non uratur citius, quam in medio flammæ.

37. Gradus autem in susceptione Caloris sunt complures. Atque primo omnium notandum est, quam parvus & exilis calor, etiam ea corpora quæ Caloris minime omnium sunt susceptiva, immutet tamen & nonnihil calefaciat. Nam ipse calor manus, globulum plumbi, aut alicujus Metallī, paulisper detentum nonnihil calefacit. Adeo facile, & in omnibus transmittitur & excitatur Calor, corpore nullo modo ad apparentiam immutato.

38. Facillimè omnium corporum apud nos & excipit, & remittit Calorem Aër, quod optime cernitur in vitris Calendariis. Eorum confectio est talis: Accipiat vitrum ventre concavo, collo tenui & oblongo; resupinetur & demittatur hujusmodi vitrum ore deorsum verso, ventre sursum, in aliud vasculum vitreum ubi sit Aqua; tangendo fundum vasculi illius recipientis, extremo ore vitri immissi; & incumbat paululum vitri immissi collum ad os vitri recipientis, ita ut stare possit; quod ut commodius fiat, apponatur parum ceræ ad os vitri recipientis, ita tamen ut non penitus obturetur os ejus, ne ob defectum

ctum Aëris succedentis impediatur motus, de quo jam dicetur, qui est admodum facilis & delicatus.

Oportet autem ut vitrum demissum, antequam inferatur in alterum, calefiat ad ignem à parte superiori, ventre scilicet. Postquam autem fuerit vitrum illud collocatum, ut diximus, recipiet & contrahet se Aër ( qui dilatatus erat per calefactionem ) post moram sufficientem pro extinctione illius ascititii Caloris, ad talem extensionem sive dimensionem, qualis erit Aëris ambientis aut communis tunc temporis, quando immittitur vitrum, atque attrahet aquam in sursum ad hujusmodi mensuram. Debet autem appendi charta angusta & oblonga, & gradibus ( quot libuerit ) interstincta. Videbis autem prout tempestas diei incalescit aut frigescit, Aërem se contrahere in angustias per frigidum, & extendere se in latius per Calidum; id quod conspicietur per aquam ascendentem quando contrahitur Aër, & descendentem sive depressam quando dilatatur Aër. Sensus autem aëris, quatenus ad Calidum, & Frigidum, tam subtilis est & exquisitus, ut facultatem tactus humani multum superet; adeo ut Solis radius aliquis, aut calor anhelitus, multo magis calor



calor manus, super vitri summitatem positus, statim deprimat aquam manifesto. Attamen existimamus spiritum animalium magis adhuc exquisitum sensum habere Calidi & Frigidi, nisi quod à mole corporea impediatur & hebetetur.

39. Post Aërem existimamus corpora esse maxime sensitiva Caloris ea, quæ à frigore recenter immutata sint & compressa; qualia sunt Nix, & Glacies, ea enim leni aliquo tepore solvi incipiunt & colliquari. Post illa sequitur fortasse Argentum vivum. Post illud sequuntur corpora pingua, ut oleum, butyrum, & similia; deinde Lignum; deinde Aqua. Postremo Lapides, & Metalla; quæ non facile calefiunt, præsertim interius. Illa tamen Calorem semel susceptum diutissime retinent, ita ut later, aut lapis, aut ferrum ignitum in pelvim aquæ frigidæ immisum, & demersum per quartam partem horæ (plus minus) retineat Calorem, ita ut tangi non possit.

40. Quò minor est corporis moles, eo citius per corpus calidum approximatum incalescit; id quod demonstrat omnem Calorem apud nos, esse corpori tangibili quodammodo adversum.

41. Calidum, quatenus ad sensum &  
ta-

tactum humanum, res varia est & respectiva; adeo ut aqua tepida, si manus frigore occupetur, sentiatur esse calida; si manus incaluerit, frigida.

#### A P H O R. IV.

Quam inopes simus historiae, quivis facile advertet; cum in *Tabulis* superioribus, præterquam quod loco historiae probatae & Instantiarum certarum nonnunquam traditiones & relationes inferamus, (semper tamen adjecta dubiae fidei & Authoritatis vota) sæpenumero etiam hisce verbis: *Fiat Experimentum*, vel *Inquiratur ulterius*, uti cogamur.

#### A P H O R. V.

Atque Opus & officium harum trium Tabularum, *Compurentiam Instantiarum ad intellectum*, vocare consuevimus. Facta autem *Compurentia*, in opere ponenda est ipsa *Inductio*, Inveniendae enim, super *Compurentiam* omnium & singularum Instantiarum, Natura talis, quæ cum natura data perpetuo adsit, absit, atque crescat, & decreseat; sitque (ut superius dictum est) limitatio Naturæ magis communis. Hoc si mens jam ab initio facere tentet affirmative (quod sibi permissa

missa semper facere solet) occurrent phantasmata, & opinabilia, & notionalia male determinata, & Axiomata quotidie emendanda; nisi libeat (Scholarum more) pugnare pro falsis. Ea tamen proculdubio merentur meliora aut praviora, pro facultate & robore intellectus qui operatur. At omnino Deo (Formarum Inditori & opifici) aut fortasse Angelis & Intelligentiis non competit, Formas per Affirmationem immediate nosse, atque ab initio Contemplationis. Sed certe supra hominem est; Cui tantum conceditur, procedere primo per *Negativas*, & postremo loco desinere per *Affirmativas*, post omnimodam exclusionem.

## A P H O R. VI.

Itaque Naturæ facienda est prorsus solutio & separatio; non per Ignem certe, sed per Mentem, tanquam Ignem divinum. Est itaque *Inductionis* veræ opus primum ( quatenus ad inveniendas Formas ) *Rejectio* sive *Exclusiva* Naturarum singularium, quæ non inveniuntur in aliqua Instantia, ubi Natura data adest; aut non inveniuntur in aliqua Instantia, ubi Natura data abest; aut inveniuntur in aliqua Instantia crescere, cum Natura data decreseat;



crescat ; aut decrefcere cum Natura data crefcat. Tum vero poft *Rejectionem* & *Exclufivam* debitis modis factam, fecundo loco ( tanquam in fundo ) manebit ( abeuntibus in fumum opinionibus volatilibus ) Forma affirmativa, folida, & vera, & bene terminata. Atque hoc breve dictu eft, qui per multas ambages ad hoc pervenitur. Nos autem nihil fortaffe ex iis, quæ ad hoc faciunt, prætermitemus.

### APHOR. VII.

Cavendum autem eft, & monendum Quafi perpetuo, ne cum tantæ partes Formis videantur à nobis tribui, trahantur ea, quæ dicimus, ad Formas eas, quibus hominum contemplationes & cogitationes hætenus affueverunt.

Primo enim, de Formis copulatis, quæ funt ( ut diximus ) Naturarum simplicium Conjugia ex curfu communi univerfi, ut Leonis, Aquilæ, Rosæ, Auri, & huiusmodi, impræfentiarum non loquimur. Tempus enim erit de iis tractandi, cum ventum fuerit ad *latentes Processus*, & *latentes Schematismos*, eorumque inventionem, prout reperiuntur in fubftantiis ( quas vocant ) feu Naturis concretis.

Rurfus vero, non intelligantur ea quæ dici-

dicimus (etiam quatenus ad Naturas simplices) de formis & Ideis abstractis, aut in materia non determinatis, aut male determinatis. Nos enim quum de Formis loquimur, nil aliud intelligimus, quam leges illas & determinationes Actus puri, quæ Naturam aliquam simplicem ordinant & constituunt: ut calorem, lumen, pondus, in omnimoda materia & subiecto susceptibili. Itaque eadem res est Forma calidi, aut Forma Luminis, & Lex calidi, sive Lex Luminis; neque vero à rebus ipsis & parte operativa, unquam nos abstrahimus, aut precedimus. Quare cum dicimus (exempli gratia) in Inquisitione Formæ caloris, *Rejice tenuitatem, aut, tenuitas non est ex Forma Caloris*; idem est ac si dicamus, *poteſt homo superinducere Calorem in corpus densum*; aut contra, *poteſt homo auferre aut arcere Calorem à corpore tenui*.

Quod si cuiquam videantur etiam Formæ nostræ habere nonnihil abstracti, quod misceant & jungant heterogenea, (videntur enim valde esse heterogenea calor & celestium, & ignis; rubor fixus in rosa, aut similibus, & apparens in Iride, aut radiis Opalii, aut Adamantis; Mors ex summissione, ex crematione, ex punctura gladii, ex Apoplexia, ex Atrophia; & ta-

men conveniunt ista in Natura Calidi, Ruboris, Mortis) is se habere intellectum norit consuetudine, & integralitate rerum, & opinionibus captum & detentum. Certissimum enim est, ista, utcumque heterogenea & aliena, coire in Formam, sive Legem eam quæ ordinat Calorem, aut ruborem, aut mortem; nec emancipari posse potentiam humanam, & liberari à Naturæ cursu communi, & expandi & exaltari ad Efficientia nova, & Modos operandi novos, nisi per revelationem & inventionem huiusmodi Formarum; & tamen post istam unionem Naturæ, quæ est res maxime principalis, de Naturæ divisionibus & venis, tam ordinariis, quam interioribus & verioribus, suo loco postea dicitur.

### A P H O R. VIII.

**T**am vero proponendum est Exemplum *Exclusionis* sive *Rejectionis* Naturarum, quæ per *Tabulas Comparentia* reperiuntur non esse ex Forma Calidi; illud interim monendo, non solum sufficere singulas *Tabulas* ad *Rejectionem* alicujus Naturæ, sed etiam unamquamque ex Instantiis singularibus in illis contentis. Manifestum enim est ex iis quæ dicta sunt, omnem *Instantiam contradictoriam* destruere opinabile



nabile de Forma. Sed nihilominus quandoque perspicuitatis causa, & ut usus *Tabularum* clarius demonstretur, *Exclusivam* duplicamus, aut repetimus.

Exemplum *Exclusivæ*, sive *Rejectionis Naturarum à forma Calidi.*

1. **P**er radios Solis, *Rejice* Naturam Elementarem.

2. Per Ignem communem, & maxime per Ignem subterraneos ( qui remotissimi sunt, & plurimum intercluduntur à radiis Cœlestibus ) *Rejice* Naturam Cœlestem.

3. Per Calefactionem omnigenum corporum, ( hoc est, Mineralium, Vegetabilium, partium exteriorum Animalium, Aquæ, Olei, Aëris, & reliquorum ) ex approximatione sola ad Ignem, aut aliud Corpus calidum; *Rejice* omnem Varietatem, sive subtiliorem Texturam corporum.

4. Per Ferrum & Metalla ignita, quæ calefaciunt alia corpora, nec tamen non omnino pondere aut substantia minuuntur; *Rejice* inditionem sive mixturam substantiæ alterius Calidi.

5. Per Aquam ferventem, atque Aë-

rem, arque etiam per Metalla, & alia Solida calefacta, sed non usque ad ignitionem, sive ruborem; *Rejice* Lucem, aut Lumen.

6. Per radios Lunæ, & aliarum Stellarum, (excepto Sole;) *Rejice* etiam Lucem & Lumen.

7. Per *Comparativam* Ferri igniti, & Flammæ spiritus vini (ex quibus, Ferrum ignitum plus habet calidi & minus lucidi, Flamma autem spiritus vini plus lucidi & minus calidi) *Rejice* etiam lucem & Lumen.

8. Per aurum & alia Metalla ignita, quæ densissimi sunt corporis secundum totum; *Rejice* Tenuitatem.

9. Per Aërem, qui invenitur ut plurimum frigidus, & tamen manet tenuis; *Rejice* etiam Tenuitatem.

10. Per Ferrum ignitum, quod non intumescit mole, sed manet intra eandem dimensionem visibilem; *Rejice* Motum localem, aut expansivum secundum totum.

11. Per dilatationem Aëris in Vitris Calendariis & similibus, qui movetur localiter & expansive manifesto, neque tamen colligit manifestum augmentum Caloris; *Rejice* etiam Motum Localem, aut expansivum secundum totum.

12. Per

12. Per facilem Tepefactionem omnium corporum, absque aliqua destructione aut alteratione notabili; *Rejice* Naturam destructivam, aut inditionem violentam alicujus Naturæ novæ.

13. Per Consensum & Conformitatem operum similium, quæ eduntur à Calore & à Frigore; *Rejice* Motum tam Expansivum quam Contractivum, secundum totum.

14. Per Accensionem Caloris ex attritione corporum; *Rejice* Naturam Principalem. Naturam Principalem vocamus eam, quæ Positiva reperitur in Natura; nec causatur à Natura præcedente.

Sunt & aliæ Naturæ: neque enim Tabulas conficimus perfectas, sed Exemplantum.

Omnes & singulæ Naturæ prædictæ non sunt ex forma Calidi. Atque ab omnibus Naturis prædictis liberatur Homo in operatione super Calidum.

## A P H O R. IX.

**A**tque in *Exclusiva* jacta sunt fundamenta *Inductionis* veræ; quæ tamen non perficitur donec sistatur in Affirmativa. Neque vero ipsa *Exclusiva* ullo modo perfecta est, neque adeo esse potest sub



iniciis. Est enim *Exclusiva* ( ut plane liquet ) *Rejectio* Naturarum Simplicium : Quod si non habeamus adhuc bonas & veras Notiones Naturarum simplicium, quomodo rectificari potest *Exclusiva*? At nonnullæ ex supradictis ( veluti Notio Naturæ Elementaris, Notio Naturæ Cœlestis, Notio Tenuitatis ) sunt Notiones vagæ, nec bene terminatæ. Itaque nos, qui nec ignari sumus, nec obliti, quantum opus aggrediamur; ( vid. ut faciamus Intellectum humanum Rebus & Naturæ parem ) nullo modo acquiescimus in his quæ adhuc præcepimus: sed & rem in ulterius provehimus, & fortiora auxilia in usum Intellectus machinamur & ministramus, quæ nunc subjungemus. Et certe in *Interpretatione Natura* animus omnino taliter est præparandus & formandus, ut & sustineat se in gradibus debitis certitudinis, & tamen cogitet ( præsertim sub iniciis ) ea, quæ adsunt, multum pendere ex iis quæ supersunt.

## A P H O R. X.

**A**ttamen quia citius emergit Veritas ex errore quam ex confusione, utile putamus ut fiat permissio Intellectui, post tres Tabulas *Comparentia prima* ( quales posui-

posuimus) factas & pensitatas, accingendi  
se & tentandi opus *Interpretationis Naturæ*  
in affirmativa; tam ex Instantiis Tabula-  
rum, quam ex iis quæ alias occurrent.  
Quod genus Tentamenti, *Permissionem*  
*Intellectus*, sive *Interpretationem inchoa-*  
*tam*, sive *Vindemiationem primam* appel-  
lare consuevimus.

*Vindemiatio prima de*  
*Forma Calidi.*

**A**nimadvertendum autem est, For-  
mam rei inesse (ut ex iis, quæ dicta  
sunt, plane liquet) Instantiis universis &  
singulis, in quibus Res ipsa inest; aliter  
enim Forma non esset: Itaque nulla plane  
dari potest *Instantia* contradictoria. At-  
tamen longe magis conspicua invenitur  
Forma evidens in aliquibus *Instantiis*,  
quam in aliis; in iis videlicet, ubi minus  
cohibita est Natura Formæ, & impedita,  
& redacta in ordinem, per Naturas alias.  
Hujusmodi autem Instantias, *Elucescen-*  
*tias* vel *Instantias Ostensivas* appellare  
consuevimus. Pergendum itaque est ad  
*Vindemiationem ipsam primam* de Forma  
Calidi. Per universas & singulas *Instan-*  
*tias*, Natura, cujus limitatio est Calor,  
videtur esse Motus. Hoc autem maxime

ostenditur in Flamma, quæ perpetuo movetur, & in Liquoribus ferventibus aut bullientibus, qui etiam perpetuo moventur. Atque ostenditur etiam in incitatione sive incremento Caloris factò per motum; ut in Follibus, & ventis; de quo vide *Instant. 29. Tab. 3.* Atque similiter in aliis modis Motus, de quibus vide *Instant. 28. & 31. Tab. 3.* Rursus ostenditur in extinctione Ignis & Caloris per omnem fortem compressionem, quæ frænat & cessare facit Motum: de quo vide *Instant. 30. & 32. Tab. 3.* Ostenditur etiam in hoc, quod omne corpus destruitur aut saltem insigniter alteratur ab omni Igne & Calore forti ac vehementi: Vnde liquido constat, fieri à Calore tumultum & perturbationem, & motum acrem in partibus internis Corporis; qui sensim vergit ad dissolutionem.

Intelligatur hoc quod diximus de Motu, (nempe, ut sit instar Generis ad Calorem) non quod Calor generet Motum, aut quod Motus generet Calorem; (licet & hæc in aliquibus vera sint) sed quod ipsissimus Calor, sive *Quid ipsum* Caloris sit Motus, & nihil aliud; imitatus tamen per *Differentias*, quas mox subjungemus, postquam nonnullas cautiones adje-



adjecerimus ad evitandum *Æquivocum*.

Calidum ad sensum, res *Respectiva* est, & in ordine ad Hominem, non ad Universum; & ponitur recte ut *Effectus Caloris* tantum in Spiritum Animalem: Quinetiam in seipso res varia est, cum idem corpus (prout *Sensus prædisponitur*) inducat perceptionem tam Calidi quam Frigidi: ut patet per *Instant. 41. Tab. 3.*

Neque vero communicatio Caloris, si-  
ve *Natura* ejus *Transitiva*, per quam cor-  
pus admotum corpori calido incalescit,  
confundi debet cum forma Calidi. Aliud  
enim est Calidum, aliud *Calefactivum*.  
Nam per motum *Attritionis* inducitur  
Calor absque aliquo Calido præcedente,  
unde excluditur *Calefactivum* à Forma  
Calidi. Atque etiam ubi Calidum efficitur,  
per approximationem Calidi, hoc ipsum  
non fit ex forma Calidi; sed omnino pen-  
det à *Natura* altiore & magis communi;  
vid. ex *Natura Assimilationis* sive *Multi-  
plicationis* sui: de qua facienda est separa-  
tim inquisitio.

At notio *Ignis* plebeia est, & nihil va-  
let: composita enim est ex concursu qui  
fit Calidi & Lucidi in aliquo corpore; ut  
in *Flamma* communi, & corporibus ac-  
census usque ad ruborem.

H 5

Remo-

Remoto itaque omni *Æquivoco*, veniendum jam tandem est ad *Differentias* veras, quæ limitant Motum, & constituunt eum in Formam Calidi.

**P**rima igitur *Differentia* ea est; quod Calor sit Motus Expansivus, per quem corpus nititur ad dilatationem sui, & recipiendi se in majorem sphaeram sive dimensionem, quam prius occupaverat. Hæc autem *Differentia* maxime ostenditur in flamma; ubi fumus sive halitus pinguis manifesto dilatatur & aperit se in flammam.

Ostenditur etiam in omni Liquore fervente, qui manifesto intumescit, insurgit, & emittit bullas: atque urget processum expandendi se, donec vertitur in corpus longe magis extensum & dilatatum, quam sit ipse liquor: videlicet in Vaporem, aut Fumum, aut Aërem.

Ostenditur etiam in omni Ligno & Combustibili; ubi fit aliquando exudatio, at semper evaporatio.

Ostenditur etiam in colliquatione Metallorum; quæ (cum sint corporis compactissimi) non facile intumescunt & se dilatant: sed etiam Spiritus eorum, postquam fuerit in se dilatatus, & majorem  
adeo

adeo dilatationem concupierit, trudit plane & agit partes crassiores in Liquidum. Quod si etiam Calor fortius intendatur, solvit & vertit multum ex iis involatile.

Ostenditur etiam in Ferro aut Lapidibus: quæ licet non liquefiant aut fundantur, tamen emolliuntur. Quod etiam fit in baculis ligni; quæ calefacta paululum in cineribus calidis fiunt flexibilia.

Optime autem cernitur iste motus in Aëre, qui per exiguum calorem se dilatat continuo & manifesto: ut per *Instant. 33. Tab. 3.*

Ostenditur etiam in natura contraria Frigidi. Frigus enim omne corpus contrahit & cogit in angustias; adeo ut per intensa Frigora clavi excidant ex parietibus, ara dissiliant, vitrum etiam calefactum & subito positum in Frigido dissiliat & frangatur. Similiter Aër per levem infrigidationem recipit se in Angustius: ut per *Instant. 38 Tab. 3.* Verum de his fufius dicetur in inquisitione de frigido.

Neque mirum est, si Calidum & Frigidum edant complures actiones communes, (de quo vide *Instant. 32. Tab. 2.*) cum inveniantur duæ ex sequentibus *Differentiis* (de quibus mox dicemus) quæ competunt utrique Naturæ; licet in hac *Differentia*



*rentia* ( de qua nunc loquimur ) actiones sint ex diametro oppositæ ; Calidum enim dat motum expansivum & dilarantem ; Frigidum autem dat motum contractivum & coëuntem.

*Secunda Differentia* est modificatio prioris ; Hæc videlicet , quod Calor sit Motus expansivus sive versus circumferentiam : hac lege tamen , ut una feratur corpus sursum. Dubium enim non est , quin sint Motus complures mixti. Exempli gratia : sagitta aut speculum simul & progrediendo rotat , & rotando progreditur. Similiter & Motus Caloris simul est & Expansivus , & Latio in sursum.

Hæc vero *Differentia* ostenditur in Forcipe , aut Bacillo ferreo immisso in ignem : quia si immittatur perpendiculariter tenendo manum superius , cito manum adurit ; sin ex latere aut inferius , omnino tardius.

Conspicua etiam est in *Disillationibus* per Descensorium ; quibus utuntur homines ad Flores delicatiores , quorum odores facile evanescunt. Nam hoc reperit industria , ut collocent Ignem non subter , sed supra , ut adurat minus. Neque enim Flamma tantum vergit sursum , sed etiam omne Calidum.

Fiat

Fiat autem Experimentum hujus rei in contraria Natura Frigidi: vid. utrum Frigus non contrahat corpus descendendo deorsum; quemadmodum Calidum dilatat corpus ascendendo sursum. Itaque adhibeantur duo bacilla ferrea, vel duo tubi vitrei, quoad cætera pares; & calefiant nonnihil; & ponatur spongia cum aqua frigida, vel nix, subter unam, & similiter super alteram. Existimamus enim celeriore fore Refrigerationem ad extremitates, in eo bacillo ubi nix ponitur supra, quam in eo ubi nix ponitur subter: contra ac fit in Calido.

**T**ertia *Differentia* ea est; ut Calor sit Motus, non Expansivus uniformiter secundum totum, sed Expansivus per particulas minores corporis; & simul cohibitus, & repulsus, & reverberatus, adeo ut induat Motum alternativum, & perpetuo trepidantem, & tentantem, & nitentem, & ex percussione irritatum; unde furor ille Ignis & Caloris ortum habet.

Ista vero *Differentia* ostenditur maxime in Flamma & Liquoribus bullientibus: quæ perpetuo trepidant, & in parvis portionibus tument, & rursus subsidunt.

Ostenditur etiam in iis corporibus, quæ  
sunt

sunt tam duræ compagis, ut calefacta aut ignita non intumescant aut dilatentur mole; ut ferrum ignitum, in quo calor est acerrimus.

Ostenditur etiam in hoc, quod per frigidissimas tempestates focus ardeat acerrimè.

Ostenditur etiam in hoc, quod cum extenditur Aër in vitro Calendari absque impedimento aut repulsione, uniformiter scilicet & æqualiter; non percipiatur calor. Etiam in ventis conclusis, licet erumpant vi maxima, tamen non percipitur calor insignis; quia scilicet Motus fit secundum totum, absque Motu alternante in particulis. Atque ad hoc fiat Experimentum, utrum Flamma non urat acrius versus latera, quam in medio flammæ.

Ostenditur etiam in hoc, quod omnis ustio transigatur per minutos poros corporis quod uritur; adeo ut Ustio subruat, & penetret, & fodicet, & stimulet; perinde ac si essent infinitæ cuspides acus. Itaque ex hoc illud etiam fit, quod omnes Aquæ fortes (si proportionatæ sint ad corpus, in quod agunt) edant opera Ignis, ex natura sua corrodente & pungente.

Atque ista *Differentia* (de qua nunc dicimus) communis est cum natura Frigidi;  
in



in quo cohibetur Motus contractivus, per renitentiam expandendi; quemadmodum in calido cohibetur Motus expansivus, per renitentiam contrahendi.

Itaque siue partes corporis penetrent versus interius, siue penetrent versus exterius, similis est ratio; licet impar admodum sit fortitudo: quia non habemus hic apud nos in superficie Terræ aliquid, quod sit impense Frigidum. Vide *Instant. 27. Tab. 9.*

**Q**uarta Differentia est Modificatio prioris: Hæc scilicet, quod Motus ille Stimulationis aut Penetrationis debeat esse non nihil rapidus & minime lentus; atque fiat etiam per particulas, licet minutas; tamen non ad extremam subtilitatem, sed quasi majusculas.

Ostenditur hæc *Differentia* in comparatione operum quæ edit Ignis, cum iis quæ edit Tempus siue Ætas. Ætis enim siue Tempus arefacit, consumit, subruit, & incinerat, non minus quam Ignis; vel potius longe subtilius; sed quia Motus ejusmodi est lentus admodum, qui fit per particulas valde exiles, non percipitur Calor.

Ostenditur etiam in comparatione dis-

solu-

solutionum Ferri & Auri. Aurum enim dissolvitur absque calore excitato; Ferrum autem cum vehementi excitatione caloris, licet simili fere intervallo quoad tempus. Quia scilicet in Auro, ingressus Aquæ Separationis est clemens & subtiliter insinuans, & cessio partium Auri facilis: At in Ferro, ingressus est asper, & cum conflictu, & partes Ferri habent obstinationem majorem.

Ostenditur etiam aliquatenus in Gangrænis nonnullis & Mortificationibus carniū; quæ non excitant magnum calorem aut dolorem, ob subtilitatem putrefactionis.

Atque hæc sit *Prima Vindemiatio*, sive *Interpretatio inchoata* de FORMA CALIDI, facta per *Permissionem Intellectus*.

Ex *Vindemiatione* autem ista *prima*, Forma sive Definitio vera Caloris (ejus, qui est in ordine ad Universum, non relativus tantummodo ad Sensum) talis est, brevi verborum complexu. *Calor est Motus Expansivus, cohibitus, & nitens per partes minores*. Modificatur autem Expansio; *ut expandendo in ambitum, nonnihil tamen inclinet versus superiora*. Modificatur autem & Nixus ille per partes, *ut non sit*

*fit omnino segnis , sed incitatus , & cum impetu nonnullo.*

Quod vero ad Operativam attinet , eadem res est. Nam designatio est talis : Si in aliquo corpore naturali poteris excitare Motu , id se dilatandum , aut expandendum ; eumque Motum ita reprimere & in se vertere , ut dilatatio illa non procedat aequaliter , sed partim obtineat , partim retrudatur ; proculdubio generabis Calidum : non habita ratione , sive corpus illud sit Elementare , ( ut loquuntur ) sive imbutum à Cœlestibus ; sive luminosum , sive opacum , sive tenue , sive densum ; sive localiter expansum , sive intra claustra dimensionis primæ contentum ; sive vergens ad dissolutionem , sive manens in statu ; sive Animal , sive Vegetabile ; sive Minerale , sive Aqua ; sive Oleum , sive Aër , aut aliqua alia substantia quæcunque susceptiva Motus prædicti. Calidum autem ad Sensum , res eadem est : sed cum analogia , qualis competit Sensui.



## DIVISIO CALIDI.

**O**mnino videtur esse divisio solennis & authentica, quod sint tria genera Caloris; vid. Calor Cœlestium, Calor Animalium, & Calor Ignis: quæque isti Calores (præsertim unus ex illis comparatus ad reliquos duos) sint ipsa essentia & specie, sive natura specifica differentes & plane heterogenei: Quandoquidem Calor Cœlestium & Animalium generet & foveat, at Calor Ignis contra corrumpat & destruat. Est itaque *Instantia Fœderis*, Experimentum illud satis vulgatum; Cum recipitur ramus aliquis vitis intra domum ubi sit focus assiduus, ex quo maturescunt uvæ, etiam mense integro citius quam foras: Ita ut maturatio fructus etiam pendentis super arborem fieri possit, scilicet ab Igne, cum hoc ipsum videatur esse opus proprium Solis. Itaque ab hoc initio facile insurgit Intellectus, repudiata Heterogenea essentiali, ad inquirendum quæ sint Differentiæ illæ, quæ revera reperiuntur inter Calorem Solis & Ignis; ex quibus fit, ut eorum operationes sint tam dissimiles; utcunque illi ipsi participant ex Natura communi.

Quæ differentiæ reperientur quatuor:  
vid.

vie Primo, quod Calor Solis respectu  
 Caloris Ignis, sit gradu longe clementior  
 & lenior: Secundo, quod sit (præsertim  
 ut deferretur ad nos per Aërem) qualitate  
 multo humidior; Tertio, (quod Caput  
 rei est) quod sit summe inæqualis; atque  
 accedens & auctus, & deinceps recedens  
 & diminutus: id quod maxime confert ad  
 Generationem corporum. Recte enim as-  
 seruit *Aristoteles*, causam principalem Ge-  
 nerationum & Corruptionum quæ fiunt  
 hic apud nos in superficie Terræ, esse  
 viam obliquam Solis per Zodiacum: unde  
 Calor Solis, partim per vicissitudines Diei  
 & Noctis, partim per successiones Æstatis  
 & Hyemis, evadit miris modis inæqualis.  
 Neque tamen desinit ille Vir, id quod ab  
 eo recte inventum fuit, statim corrumpere  
 & depravare. Nam ut Arbiter scilicet  
 Naturæ (quod illi in more est) valde Magi-  
 straliter assignat causam Generationis,  
 Accessui Solis; causam autem Corruptio-  
 nis, Recessui: cum utraque res (Acces-  
 sus videlicet Solis, & Recessus) non re-  
 spectively, sed quasi indifferenter præbeat  
 causam tam Generationi quam Corrup-  
 tionis: quandoquidem inæqualitas Calo-  
 ris, Generationi & Corruptioni rerum;  
 æqualitas, Conservationi tantum mini-  
 stre.

stret. Est & Quarta Differentia inter Calorem Solis & Ignis, magni prorsus momenti: vid. quod Sol operationes suas insinuet per longa temporis spatia; cum operationes Ignis (urgente hominum impatientia) per breviora intervalla ad exitum perducantur. Quod si quis id sedulo agat, ut Calorem Ignis attemperet & reducat ad gradum moderatiorem & leniorem; (quod multis modis facile fit) deinde etiam inspergat & admisceat nonnullam humiditatem; maxime autem si imitetur Calorem Solis in inæqualitate; postremo, si moram patienter toleret, (non certe eam quæ sit proportionata operibus Solis, sed largiorem, quam homines adhibere solent in operibus Ignis;) Is facile missam faciet Heterogeneam illam Caloris: & vel tentabit, velexæquabit, vel in aliquibus vincet opera Solis, per Calorem Ignis. Similis *Instantia Fæderis* est, resuscitatio Papilionum ex frigore stupentium & tanquam emortuorum, per exiguum teporem Ignis: ut facile cernas, non magis negatum esse Igni vivificare Animantia, quam maturare Vegetabilia. Etiam Inventum illud celebre *Fracaistorii* de Sartagine acriter calefacta, qua circundant Medici capita Apoplecticorum despera-



operatorum , expandit manifeste spiritus  
animales , ab humoribus & obstructioni-  
bus Cerebri compressos , & quasi extin-  
ctos ; illosque ad motum excitat , non ali-  
ter , quam Ignis operatur in Aquam aut  
Aërem ; & tamen per consequens vivifi-  
cat. Etiam Ova aliquando excluduntur  
per Calorem Ignis ; id quod prorsus imi-  
tatur Calorem Animalium ; & complura  
ejusmodi : ut nemo dubitare possit , quin  
Calor Ignis in multis subjectis modificari  
possit ad imaginem Caloris Cœlestium &  
Animalium.

FRANCISCI BACONIS  
VERULAMII  
DE MOTUS,  
SIVE  
VIRTUTIS ACTIVÆ  
VARIIS SPECIEBUS.



D E  
M O T U S  
V A R I I S S P E C I E B U S .

**M**otus primus sit Motus *Antity-*  
*piæ* Materiæ, quæ inest in singu-  
 lis portionibus ejus; per quem  
 plane annihilari non vult: ita ut  
 nullum incendium, nullum pondus, aut de-  
 pressio, nulla violentia, nulla denique ætas  
 aut diuturnitas temporis possit redigere  
 aliquam vel minimam portionem Materiæ  
 in Nihilum; quin illa & sit Aliquid, &  
 Loci aliquid occupet; & se (in qualicun-  
 que necessitate ponatur) vel Formam mu-  
 tando vel Locum, liberet; vel (si non de-  
 tur copia) ut est, subsistat; neque unquam  
 res eo deveniat, ut aut Nihil sit, aut Nul-  
 libi. Quem Motum Schola (quæ semper  
 fere & denominat & definit Res, potius  
 per Effectus & Incommoda, quam per  
 Causas Interiores) vel denotat per illud  
 Axioma, quod *Duo corpora non possint esse*  
*in uno loco*; vel vocat Motum, *Ne fiat*  
*pene-*



*penetratio dimensionum.* Neque hujus Motus exempla proponi consentaneum est: Inest enim omni Corpori.

Sic Motus Secundus, Motus (quem appellamus) *Nexus*; per quem Corpora non patiuntur se ulla ex parte sui dirimi à contactu alterius Corporis, ut quæ mutuo nexu & contactu gaudeant. Quem Motum Schola vocat Motum, *Ne detur vacuum.* Veluti cum Aqua attrahitur sursum exuctione, aut per Fistulas; Caro per Ventosas; aut cum Aqua sistitur, nec effluit in Hydriis perforatis, nisi os Hydriæ ad immittendum Aërem aperiatur; & innumera id genus.

Sit Motus Tertius, Motus (quem appellamus) *Libertatis*; per quem Corpora se liberare nituntur à Pressura aut Pensura præternaturali, & restituere se in Dimensionem corpori suo conveniens. Cujus Motus etiam innumera sunt exempla: Veluti (quatenus ad Liberationem à Pressura) Aquæ in Natando, Aëris in volando; Aquæ in Remigando, Aëris in undulationibus Ventorum, Laminæ in Horologiis. Nec ineleganter se ostendit Motus Aëris compressus in Sclopetis ludicris puerorum, cum Alnum aut simile quoddam excavant, & infarciunt frusto alicujus Radicis succulentæ,

vel similia, ad utrosque fines; deinde per Embolum trudent radicem vel hujusmodi farcimentum in foramen alterum: Unde emittitur & ejicitur Radix cum sonitu ad foramen alterum, idque antequam tangatur à Radice aut Farcimento citimo, aut Embolo. Quatenus vero ad Liberationem à Tensura, ostendit se hic Motus in Aëre post exuctionem in Ovis vitreis remanente; in Chordis, in Corio, & Panno; resilientibus post Tensuras suas, nisi Tensuræ illæ per moram invaluerint, &c. Atque hunc Motum Schola sub nomine Motus ex *Forma Elementi* innuit: satis quidem inscite, cum hic Motus non tantum ad Aërem, Aquam, aut Flammam pertineat, sed ad omnem diversitatem Consistentiæ: ut Ligni, Ferri, Plumbi, Panni, Membranae, &c. in quibus, singula Corpora suum habent Dimensionis modulum; ab ea eo ægrie ad spatium aliquod notabile abripiuntur. Verum quia motus iste Libertatis omnium est maxime obviu, & ad infinita spectans; consultum fuerit eum bene & perspicue distinguere. Quidam enim valde negligenter confundunt hunc Motum, cum gemino illo Motu *Antitypia* & *Nexus*; Liberationem scilicet à Pressura, cum Motu

*Antitypia* ; à Tensura, cum Motu *Nexus* : ac si ideo cederent aut se dilatarent corpora compressa, ne sequeretur *Penetratio dimensionum* ; ideo resilirent & contraherent se Corpora tensa, ne sequeretur *Vacuum*. Atqui si Aër compressus se vellet recipere in densitatem Aquæ, aut Lignum in densitatem Lapidis ; nil opus foret *penetratione dimensionum* : & nihilominus longe major posset esse Compressio illorum, quam illa ullo modo patiuntur. Eodem modo si Aqua se dilatare vellet in raritatem Aëris, aut Lapis in raritatem Ligni ; non opus foret *vacuo* : & tamen longe major posset fieri Extensio eorum, quam illa ullo modo patiuntur. Itaque non reducitur res ad *Penetrationem dimensionum*, & *Vacuum*, nisi in ultimitatibus Condensationis & Rarefactionis : cum tamen isti Motus longe citra eas sistant & versentur ; neque aliud sint, quam Desideria Corporum conservandi se in Consistentiis suis, ( sive, si malint, in Formis suis ) nec ab iis recedendi subito, nisi per modos suaves, ac per consensum alterentur. At longe magis necessarium est ( quia multa secum trahit ) ut intimetur hominibus ; Motum Violentum ( quem nos *Mechanicum* ; *Democritus*, qui in Motibus suis



fuis primis expediendis etiam infra Mediocres Philosophos ponendus est, Motum *Plage* vocavit ) nil aliud esse quam Motum Libertatis , scilicet à Compressione ad Relaxationem. Etenim in omni, sive simplici Protrusione , sive Volatu per Aërem, non fit summotio aut Latio Localis, antequam partes Corporis præternaturaliter patiantur & comprimantur ab Impellente. Tum vero Partibus aliis alias per successionem trudentibus , fertur Totum; nec solum Progrediendo , sed etiam Rotando simul ; ut etiam hoc modo Partes se liberare , aut magis ex æquo tolerare possint. Atque de hoc Motu hætenus.

Sit Motus Quartus, Motus cui nomen dedimus Motus *Hyles*: Qui Motus Antistrophus est quodammodo Motui, de quo diximus, Libertatis. Etenim in Motu Libertatis Corpora novum Dimensum , sive novam Sphæram, sive novam Dilatationem aut Contractionem ( hæc enim Verborum varietas idem innuit ) exhorrent, respuunt, fugiunt, & resilire ac veterem Consistentiam recuperare totis viribus contendunt. At contra in hoc Motu *Hyles*, Corpora novam Sphæram sive Dimensum appetunt; atque ad illud libenter & propere, & quandoque valentissimo nixu

(ut in Pulvere Pyrio) aspirant. Instrumenta autem hujus Motus, non sola certe, sed potentissima, aut saltem frequentissima, sunt Calor & Frigus. Exempli gratia; Aër, si per Tensuram (velut per exuctionem in Ovis vitreis) dilatetur, magno laborat desiderio seipsum restituendi. At admoto Calore, è contra appetit dilatari, & concupiscit novam sphaeram, & transit & migrat in illam libenter, tanquam in novam Formam (ut loquuntur;) Nec post dilatationem nonnullam de reditu curat, nisi per admotionem Frigidi ad eam invitetur; quæ non Reditus est, sed Transmutatio repetita. Eodem modo & Aqua, si per compressionem arctetur, recalcitrat; & vult fieri qualis fuit, scilicet latior. At si interveniat Frigus intensum & continuatum, mutat se sponte sua & libenter in condensationem Glaciei: atque si plane continuetur Frigus, nec à reporbis interruptatur, (ut fit in Speluncis & Cavernis paulo profundioribus) vertitur in Crystalum, aut materiam similem, nec unquam restituitur.

Sit Motus Quintus, Motus Continuationis: Intelligimus autem non Continuationis simplicis & primariæ, cum corpore aliquo altero; (nam ille est Motus Nexus)

sed

sed Continuationis sui, in Corpore certo. Certissimum enim est, quod Corpora omnia solutionem Continuitatis exhorreant; alia magis, alia minus, sed omnia aliquatenus. Nam ut Corporibus Duris (veluti Chalybis, Vitri) Reluctatio contra Discontinuationem est maxime robusta & valida; ita etiam in Liquoribus, ubi cessare aut languere saltem videtur Motus ejusmodi, tamen non prorsus reperitur Privatio ejus; sed plane inest ipsis in gradu tanquam infimo, & prodit se in Experimentis plurimis; sicut in Bullis, in rotunditate Guttarum, in filis tenuioribus Stillicidiorum, & in sequacitate Corporum Glutinosorum, & ejusmodi. Sed maxime omnium se ostendit Appetitus iste, si Discontinuatione tentetur usque ad fractiones minores. Nam in Mortariis, post contusionem ad certum gradum, non amplius operatur Pistillum: Aqua non subintrat rimas minores. Quin & ipse Aër, non obstante subtilitate corporis ipsius, Poros Vasorum paulo solidorum non pertransit subito, nec nisi per diuturnam insinuationem.

Sit Motus Sextus, Motus quem nominamus Motum *ad Lucrum*, sive Motum *Indigentia*. Is est, per quem Corpora,



quando versantur inter plane Heterogenea & quasi inimica; si forte nanciscantur copiam aut commoditatem evitandi illa Heterogenea, & se applicandi ad magis Cognata; (licet illa ipsa Cognata talia fuerint, quæ non habeant arctum consensum cum ipsis) tamen statim ea amplectuntur, & tanquam potiora malunt; & Lucri loco (unde vocabulum sumpsimus) hoc ponere videntur, tanquam talium Corporum indiga. Exempli gratia: Aurum, aut aliud Metallum foliatum non delectatur Aëre circumfuso. Itaque si corpus aliquod Tangibile & Crassum nanciscatur, (ut Digitum, Papyrus, quidvis aliud) adhæret statim, nec facile divellitur. Etiam Papyrus, aut Pannus, & hujusmodi, non bene se habent cum Aëre qui inseritur & commistus est in ipsorum Poris. Itaque Aquam aut Liquorem libenter imbibunt, & Aërem exterminant. Etiam Saccharum, aut Spongia infusa in Aquam aut Vinum, licet pars ipsorum emineat & longe attollantur supra Vinum aut Aquam, tamen Aquam aut Vinum paulatim & per gradus attrahunt in sursum.

Unde optimus Canon sumitur Aperturæ & Solutionum Corporum. Missis enim Corrosivis & Aquis fortibus, quæ  
viam

viam sibi aperiunt; si possit inveniri Corpus proportionatum & magis consentiens & amicum Corpori alicui solido, quam illud cum quo tanquam per necessitatem commiscetur; statim se aperit & relaxat Corpus, & illud alterum intro recipit, priore excluso aut summo. Neque operatur, aut potest, iste *Motus ad Lucrum*, solummodo ad Tactum. Nam Electrica Operatio (de qua *Gilbertus*, & alii post eum tantas excitarunt fabulas) non alia est quam Corporis per frictionem levem excitati Appetitus, qui Aërem non bene tolerat; sed aliud tangibile mavult, si reperiatur in propinquo.

Sit Motus Septimus, Motus (quem appellamus) *Congregationis Majoris*; per quem Corpora feruntur ad Massas Connaturalium suorum: Gravia, ad Globum Terræ; Levia, ad Ambitum Cœli. Hunc Schola nomine *Motus Naturalis* insignivit; levi contemplatione. Quia scilicet nil spectabile erat ab extra, quod eum Motum ciceret: (Itaque Rebus ipsis innatum atque insitum putavit.) Aut forte quia non cessat. Nec mirum: Semper enim præsto sunt Cœlum & Terra; cum è contra causæ & origines plurimorum ex reliquis Motibus interdum absint.

interdum adsint. Itaque hunc, quia non intermittit, sed cæteris intermittentibus statim occurrit, Perpetuum & Proprium; reliquos Ascitirios posuit. Est autem iste Motus revera satis infirmus & hebes, tanquam is qui (nisi sit Moles Corporis major) cæteris Motibus, quandiu operantur, cedat & succumbat. Atque cum hic Motus hominum cogitationes ita impleverit; ut fere reliquos Motus occultaverit; tamen parum est quod homines de eo sciunt, sed in multis circa illum erroribus versantur.

Sit Motus Octavus, Motus *Congregationis Minoris*; per quem Partes Homogeneæ in Corpore aliquo separant se ab Heterogeneis, & coeunt inter sese; per quem etiam Corpora integra ex similitudine substantiæ se amplectuntur & foveant, & quandoque ad distantiam aliquam congregantur, attrahuntur, & conveniunt: Veluti, cum in Lacte Flos lactis post moram aliquam supernatat; in Vino Fæces & Tartarum subsidunt. Neque enim hæc fiunt per Motum Gravitatis & Levitatis tantum, ut aliæ partes summitatem petant, aliæ ad imum vergant; sed multo magis per Desiderium Homogeneorum inter se coeundi, & se uniendi. Differt autem



autem iste Motus à Motu *Indigentia*, in duobus. Uno, quod in Motu *Indigentia* sit stimulus major Naturæ malignæ & contrariæ: At in hoc Motu (si modo impedimenta & vincula absint) uniuntur partes per Amicitiam, licet absit Natura aliena quæ litem movent. Altero, quod arctior sit unio, & tanquam majore cum delectu. In illo enim, modo evitetur Corpus inimicum, Corpora etiam non admodum cognata concurrunt: At in hoc coeunt Substantiæ, germana plane similitudine devinctæ; & conflantur tanquam in unum. Atque hic Motus omnibus Corporibus Compositis inest; & se facile conspicendum in singulis daret, nisi ligaretur & frænaretur per alios Corporum Appetitus & Necessitates, quæ istam Coitionem disturbant.

Ligatur autem Motus iste plerumque tribus modis: Torpore Corporum; Fræno Corporis Dominantis; & Motu externo. Ad Torporem Corporum quod attinet; certum est inesse Corporibus tangibilibus Pigritiam quandam secundum magis & minus, & Exhorrentiam Motus Localis; ut nisi excitentur, malint statu suo (prout sunt) esse contenta, quam in melius se expedire. Discutitur autem iste

Torpor, triplici Auxilio : aut per Calorem , aut per Virtutem alicujus Cognati corporis eminentem , aut per Motum vividum & potentem. Atque primo quoad auxilium Caloris : hinc fit , quod Calor pronuntietur esse illud quod *separet Heterogonea, congreget Homogenea* Quam Definitionem Peripateticorum merito derisit *Gilbertus* ; dicens eam esse perinde ac si quis diceret ac definiret Hominem illud esse , quod serat Triticum , & plantet Vineas : esse enim Definitionem tantum per Effectus , eosque particulares. Sed adhuc magis culpanda est illa Definitio ; quia etiam Effectus illi ( quales quales sunt ) non sunt ex proprietate Caloris , sed tantum per accidens , ( idem enim facit Frigus , ut postea dicemus ) nempe ex desiderio partium Homogenearum coeundi ; adjuvante tantum Calore ad discutiendum Torporem , qui Torpor desiderium illud antea ligaverat. Quoad vero Auxilium Virtutis inditæ à Corpore Cognato , illud mirabiliter elucescit in Magnete armato. Nam ita fert natura , ut magnes armatus in distantia aliqua , non trahat ferrum fortius quam magnes non armatus. Verum si admoveatur ferrum , ita ut tangat ferrum in magnete armato , tunc magnes  
arma-

armatus longe majus pondus ferri sustinet, quam magnes simplex, & inermis, propter similitudinem substantiæ ferri versus ferrum, discussio torpore ferri per virtutem Magnetis. Quoad vero Auxilium Motus, conspicitur illud in sagittis ligneis. Notatum est sagittas parvas ligneas, absque cuspidē ferrea, emissas ex sclopetis grandibus, alius penetrare in materiam ligneam (puta latera navium aut similia) quam easdem sagittas ferro acuminatas, propter similitudinem substantiæ ligni ad lignum, licet hoc ante in ligno latuerit, discussio torpore ligni per motum celerem.

Ligatio vero Motus *Congregationis Minoris*, quæ fit per Frazum Corporis Dominantis, conspicitur in solutione Sanguinis & Urinarum per Frigus. Quamdiu enim repleta fuerint Corpora illa spiritu agili, qui singulas eorum partes cujuscunque generis, ipse ut Dominus Totius ordinat & cohibet; tandiu non coeunt Heterogenea, propter Frazum: sed postquam ille Spiritus evaporaverit aut suffocatus fuerit per Frigus, tum solutæ Partes à Frazo, coeunt secundum desiderium suum naturale. Atque ideo fit, ut omnia Corpora, quæ continent Spiritum acrem,

(ut



(ut Sales, & hujusmodi) durent & non solvantur, ob Frænum permanens & durable Spiritus dominantis & imperiosi.

Ligatio vero Motus *Congregationis Minoris*, quæ sit per Motum Externum, maxime conspicitur in Agitationibus Corporum, per quas arceatur putrefactio. Omnis enim Putrefactio fundatur in Congregatione Homogeneorum; unde paulatim sit Corruptio prioris (quam vocant) Formæ, & Generatio novæ. Nam putrefactionem, quæ sternit viam ad Generationem novæ Formæ, præcedit Solutio veteris; quæ est ipsa Coitio ad Homogeniam. Ea vero si non impedita fuerit, sit Solutio simplex, sin occurrant varia quæ obstant, sequuntur Putrefactiones quæ sunt rudimenta generationis novæ. Quod si (id quod nunc agitur) fiat agitatio frequens per Motum Externum; tum vero Motus iste Coitionis (qui est delicatus & mollis, & indiget quiete ab externis) disturbatur & cessat; ut fieri videmus in innumeris: Veluti, cum quotidiana agitatio aut profluentia Aquæ arceat Putrefactionem; Venti arceant pestilentiam Aëris; Grana in granariis versa & agitata maneant pura; Omnia denique agitata exterius non facile putrescant interius.

Super-

Supereſt ut non omittatur Coitio illa Partium Corporum, unde fit præcipue Induratio & deficcatio. Poſtquam enim Spiritus, aut Humidum in Spiritum verſum evolaverit in aliquo Corpore poroſiore, (ut in Ligno, Oſſe, Membrana, & huiusmodi) tum Partes craſſiores majore nixu contrahuntur & coeunt; unde ſequitur Induratio aut Deficcatio: quod exiſtimamus fieri, non tam ob Motum *Nexus*, ne detur Vacuum, quam per Motum iſtum Amicitiae & Unionis.

Ad Coitionem vero ad diſtans quod attinet, ea infrequens eſt & rara: & tamen in pluribus ineſt, quam quibus obſervatur. Huius ſimulacra ſunt, cum Bulla ſolvit Bullam; Medicamenta ex ſimilitudine ſubſtantiae trahunt humores; Chorda in diverſis ſidibus ad Unifonum mover Chordam; & huiusmodi. Etiam in Spiritibus Animalium hunc Motum vigere exiſtimamus, ſed plane incognitum. At eminet certe in Magnete, & Ferro excito. Cum autem de Moribus Magnetis, loquimur, diſtinguendi plane ſunt. Quatuor enim Virtutes ſive Operationes ſunt in Magnete, quæ non confundi, ſed ſeparari debent; ſicet admiratio hominũ & ſtupor eas commiſcuerit, Una, Coitionis Magnetis ad  
Magne-

Magnetem, vel Ferri ad Magnetem, vel Ferri exciti ad Ferrum. Secunda, Verticitatis ejus ad Septentriones & Austrum, atque simul declinationis ejus. Tertia, Penetrationis ejus per Aurum, Vitrum, Lapidem, omnia. Quarta, Communicationis Virtutis ejus de Lapide in Ferrum, & de Ferro in Ferrum, absque Communicatione substantiæ. Verum hoc loco de prima Virtute ejus tantum loquimur, videlicet Coitionis. Insignis etiam est Motus Coitionis Argenti Vivi & Auri; adeo ut Aurum alliciat Argentum Vivum, licet confectum in unguenta: atque Operarii inter vapores Argenti Vivi soleant tenere in ore frustum Auri ad colligendas emissiones Argenti Vivi, alias crania & ossa eorum invasuras; unde etiam frustum illud paulo post albescit. Atque de Motu *Congregationis Minoris* hæc dicta sint.

Sit Motus Nonus, *Motus Magneticus*; qui licet sit ex genere Motus *Congregationis Minoris*, tamen si operetur ad Distantias magnas, & super Massas rerum magnas, Inquisitionem meretur separatam; præsertim si nec incipiat à Tactu, quemadmodum plurimi, nec perducatur ad Tactum, quemadmodum omnes Motus Congregativi; sed Corpora  
tan-



tantum eleuet, aut ea intumescere faciat; nec quicquam ultra. Nam si Luna attollat Aquas, aut turgescere aut intumescere faciat Humida; aut Cœlum Stellatum attrahat Planetas versus sua Apogœa; aut Sol alliget Astra Veneris & Mercurii, ne longius absint à Corpore ejus, quam ad Distantiam certam; videntur hi Motus nec sub *Congregatione Majore*, nec sub *Congregatione Minore* bene collocari; sed esse tanquam Congregativa Media & imperfecta, ideoque Speciem debere constituere propriam.

Sit Motus Decimus, *Motus Fuga*; Motus scilicet Motui *Congregationis Minoris* contrarius; per quem Corpora ex Antipathia fugiunt & fugant inimica, seque ab illis separant, aut cum illis miscere se recusant. Quamvis enim videri possit in aliquibus hic Motus esse Motus tantum per accidens, aut per consequens, respectu Motus *Congregationis Minoris*, quia nequeunt coire Homogenea, nisi Heterogeneis exclusis & remotis: tamen ponendus est Motus iste per se, & in Speciem constituendus, quia in multis Appetitus *Fuga* cernitur magis principalis, quam Appetitus *Coitionis*.

Eminet autem hic Motus insigniter in  
Excre-

Excretionibus Animalium; nec minus etiam in Sensuum nonnullorum odiosis Objectis, præcipue in Olfactu & Gustu. Odor enim foetidus ita rejicitur ab Olfactu, ut etiam inducat in Os stomachi Motum Expulsionis per Consensum; Sapor amarus & horridus ita rejicitur à Palato aut Gutturæ, ut inducat per consensum Capitis conquassationem & horrorem. Veruntamen etiam in aliis locum habet iste Motus. Conspicitur enim in Antiperistasis nonnullis; ut in Aëris media Regione, cujus Frigora videntur esse Rejectiones Naturæ frigida ex Confiniis Cœlestium; quemadmodum etiam videntur magni illi fervores & inflammationes quæ inveniuntur in locis subterraneis, esse Rejectiones Naturæ calida ab interioribus Terræ. Calor enim & Frigus, si fuerint in Quanto minore, se invicem perimunt; sin fuerint in Massis majoribus, & tanquam justis exercitiis, tum vero per Conflictum se locis invicem summovent, & ejiciunt. Etiam tradunt, Cinamomum & Odorifera sita juxta latrinas & loca foetida, diutius odorem retinere, quia recusant exire & commisceri cum foetidis. Certe Argentum vivum, quod alias se reuniret in Corpus integrum, prohibetur per salivam hominis, aut

aut Axungiam porci, aut Terebinthinam, & hujusmodi, ne partes ejus coëant; propter malum Consensum quem habent cum hujusmodi Corporibus; à quibus undique circumfusus se retrahunt; adeo ut fortior sit earum *Fuga* ab istis interjacentibus, quam desiderium uniendi se cum partibus sui similibus; id quod vocant *Mortificationem* Argenti vivi. Etiam quod Oleum cum Aqua non misceatur, non tantum in Causa est differentia Levitatis; sed malus ipsorum Consensus: ut videre est in Spiritu vini, qui cum levior sit Oleo, tamen se bene miscet cum Aqua. At maxime omnium insignis est Motus *Fuga* in Nitro, & hujusmodi Corporibus crudis, quæ Flammam exhorrent; ut in pulvere pyrio, Argento vivo, nec non in Auro. *Fuga* vero ferri ab altero polo Magnetis, à Gilberto bene notatur non esse *Fuga* propria, sed Conformitas, & Coitio ad fitum magis accommodatum.

Sit Motus Undecimus, *Motus Assimilationis*, sive *Multiplicationis* sui, sive etiam *Generationis simplicis*. *Generationem* autem *simplicem* dicimus non Corporum Integralium, ut in Plantis, aut Animalibus; sed Corporum similiarum. Nempe per hunc Motum Corpora similiaria vertunt  
Cor-



Corpora alia affinia, aut saltem bene disposita & præparata, in Substantiam & Naturam suam; ut Flamma, quæ super halitus & oleosa multiplicat se, & generat novam Flammam; Aër, qui super Aquam & Aquea multiplicat se, & generat novum Aërem; Spiritus Vegetabilis & Animalis, qui super tenuiores partes tam Aquei quam Oleosi in alimentis suis multiplicat se, & generat novum Spiritum; partes solidæ plantarum & Animalium, veluti Folium, Flos, Caro, Os, & sic de cæteris, quæ singulæ ex Succis alimentorum assimilant & generant substantiam successivam, & Epusiam. Neque enim quenquam cum *Paracelso* delirare juvet, qui ( distillationibus suis scilicet occæcatus ) Nutritionem per separationem tantum fieri voluit; quodque in Pane vel Cibolateat Oculus, Nasus, Cerebrum, Jecur; in succo Terræ Radix, Folium, Flos. Etenim sicut Faber ex rudi Massa lapidis vel ligni, per separationem & Rejectionem superflui educit Folium, Florem, Oculum, Nasum, Manum, Pedem, & similia; ita *Archaum* illum Fabrum internum ex alimento per Separationem & Rejectionem educere singula membra & partes, asserit ille. Verum missis nugis, certissimum

omnium est, partes singulas, tam Similares, quam Organicas, in Vegetabilibus & Animalibus, succos alimentorum suorum conferre communes, aut non multum diversos, primo attrahere cum nonnullo delectu, deinde assimilare, & vertere in Naturam suam. Neque *Assimilatio* ista, aut *Generatio simplex* fit solum in Corporibus Animatis; verum & Inanimata ex hac re participant; veluti de Flamma & Aëre dictum est. Quinetiam Spiritus mortuus, qui in omni Tangibili Animato continetur, id perpetuo agit, ut partes crassiores digerat & vertat in Spiritum, qui deinde exeat; unde fit diminutio ponderis & exsiccatio, ut alibi diximus. Neque etiam respuenda est in *Assimilatione*, Accretio illa, quam vulgo ab Alimentatione distinguunt; veluti cum lutum inter lapillos concrescit, & vertitur in materiam lapideam; squammæ circa dentes, vertuntur in substantiam non minus duram, quam sunt dentes ipsi, &c. Sumus enim in ea opinione, inesse Corporibus omnibus desiderium Assimilandi, non minus, quam Coëundi ad Homogenea: verum ligatur ista virtus, sicut & illa; licet non iisdem modis. Sed modos illos, nec non solutionem ab iisdem, omni diligentia inquirere oportet.

oportet, quia pertinent ad Senectutis refocillationem. Postremo videtur notatu dignum, quod in novem illis motibus, de quibus diximus, Corpora tantum Naturæ suæ Conversationem appetere videntur; in hoc decimo autem Propagationem.

Sit Motus Duodecimus, *Motus Excitationis*; qui Motus videtur esse ex genere *Assimilationis*, atque eo nomine quandoque à nobis promiscue vocatur. Est enim Motus Diffusivus, & Communicativus, & Transivus, & Multiplicativus, sicut & ille; atque Effectu (ut plurimum) consentiunt, licet efficiendi modo & subjecto differant. Motus enim *Assimilationis* procedit tanquam cum imperio, & potestate: Iubet enim & cogit Assimilatum in Assimilantem verti & mutari. At Motus *Excitationis* procedit tanquam Arte & insinuatione, & furtim; & invitat tantum, & disponit Excitatum ad naturam Excitantis. Etiam Motus *Assimilationis* multiplicat & transformat Corpora & substantias; veluti, Plus fit flammæ, Plus Aëris, Plus Spiritus, Plus Carnis. At in Motu *Excitationis*, multiplicantur & transeunt virtutes tantum; & Plus fit Calidi, Plus Magnetici, Plus putridi. Eminent autem iste Motus præ-



præcipue in Calido & Frigido. Neque  
enim Calor diffundit se in calefaciendo  
per Communicationem primi caloris; sed  
tantum per *Excitationem* partium corpo-  
ris ad Motum illum, qui est Forma Calidi;  
de quo in *Vindemiatioe prima de Natura*  
*Calidi* diximus. Itaque longe tardius &  
difficilius excitatur calor in Lapide aut  
Metallo, quam in Aëre; ob inhabilitatem  
& impromptitudinem corporum illorum  
ad Motum illum; ita ut verisimile sit, pos-  
se esse interius viscera Terræ materias,  
quæ calefieri prorsus respuant; quia ob  
Condensationem majorem spiritu illo de-  
stituuntur, à quo Motus iste *Excitationis*  
plerumque incipit. Similiter Magnes in-  
duit Ferrum nova partium dispositione, &  
Motu conformi; ipse autem nihil ex Vir-  
tute perdit. Similiter Fermentum Panis,  
& Flos Cervisiæ, & Coagulum Lactis, &  
nonnulla ex venenis, excitant & invitant  
Motum in Massa Farinaria, aut Cerevisia,  
aut Caseo, aut Corpore humano successi-  
vum & continuatum; non tam ex vi Ex-  
citantis, quam ex prædispositione & facili  
Cessione Excitati.

Sit Motus Decimus tertius, *Motus Im-*  
*pressionis*; qui Motus est etiam ex genere  
*Motus Assimilationis*; estque ex Diffusi-  
vis

vis Motibus subtilissimus. Nobis autem visum est eum in Speciem propriam constituere, propter differentiam insignem quam habet erga priores duos. Motus enim *Assimilationis* simplex Corpora ipsa transformat; ita ut si tollas primum Movens, nihil intersit ad ea quæ sequuntur. Neque enim prima accensio in Flammam, aut prima versio in Aërem, aliquid facit ad Flammam, aut Aërem, in Generatione succedentem. Similiter, Motus *Excitationis* omnino manet, remoto primo movente, ad tempora bene diuturna; ut in Corpore calefacto, remoto primo Calore; in Ferro excito, remoto Magnete; in Massa farinaria, remoto Fermento. At Motus *Impressionis*, licet sit Diffusivus, & Transfinitivus, tamen perpetuo pendere videtur ex primo Movente; adeo ut sublato aut cessante illo, statim deficiat aut pereat: Itaque etiam momento, aut saltem exiguo tempore transigitur. Quare Morus illos *Assimilationis & Excitationis*, Motus *Generationis Iovis*, quia generatio manet; Hunc autem Motum, *Motum Generationis Saturni*, quia natus statim devoratur & absorbetur, appellare consuevimus. Manifestat se vero hic Motus in tribus: In Lucis radiis, Sonorum percussionibus, & Magne-

Magneticis, quatenus ad Communicationem. Etenim Amota Luce, statim percunt Colores, & reliquæ Imagines ejus; Amota percussione prima, & quassatione Corporis inde facta, paulo post perit sonus. Licet enim Soni, etiam in Medio per ventos, tanquam per Undas agitentur: tamen diligentius notandum est, quod Sonus non tam diu durat, quam sit Resonatio. Etenim impulsâ Campana, Sonus ad bene magnum tempus continuari videtur; unde quis facile in errorem labatur, si existimet toto illo tempore Sonum tanquam nātare & hærere in Aëre; quod falsissimum est. Etenim illa Resonatio non est idem Sonus Numero, sed renovatur. Hoc autem manifestatur ex Sedatione sive cohibitione Corporis percussi. Si enim sistatur & detineatur Campana fortiter, & fiat immobilis, statim perit Sonus, nec resonat amplius; ut in chordis, si post primam percussione tangatur chorda, vel digito, ut in Lyra: vel calamo, ut in Espinetis; statim desinit Resonatio. Magnete autem remoto, statim Ferrum decidit. Luna autem à Mari non potest removeri; nec Terra à Ponderoso dum cadit. Itaque de illis nullum fieri potest Experimentum; sed ratio eadem est.

Sic



Sit Motus Decimus quartus, *Motus Configurationis*, aut *Situs*; per quem corpora appetere videntur, non coitionem, aut Separationem aliquam; sed Situm, & Collocationem & *Configurationem* cum aliis. Est autem iste Motus valde abstrusus, nec bene inquisitus. Atque in quibusdam videtur quasi incausabilis; licet revera (ut existimamus) non ita sit. Etenim si quærat, cur potius Cœlum volvatur ab Oriente in Occidentem, quam ab Occidente in Orientem: aut cur vertatur circa Polos positos juxta Urfas, potius quam circa Orionem, aut ex alia aliqua parte Cœlis; videtur ista Quæstio tanquam quædam Extasis; cum ista potius ab Experientia, & ut Positiva recipi debeant. At in Natura profecto sunt quædam ultima & incausabilia; verum hoc ex illis non esse videtur. Etenim hoc fieri existimamus ex quadam Harmonia & consensu Mundi, qui adhuc non venit in observationem. Quod si recipiatur Motus Terræ ab Occidente in Orientem; eadem manent Quæstiones. Nam & ipsa super aliquos Polos movetur. Atque cur tandem debeant isti Poli collocari ubi sunt, quam alibi? Item Verticitas, & Directio, & Declinatio Magnetis, ad hunc Motum referun-

feruntur. Etiam inveniuntur in corporibus tam Naturalibus quam Artificialibus, præsertim consistentibus, & non Fluidis, collocatio quædam & Positura partium, & tanquam Villi & Fibræ, quæ diligenter investigandæ sunt; utpote sine quarum inventione corpora illa commode tractari aut regi non possunt. At circulationes illas in Liquidis, per quas illa dum pressa sint, antequam se liberare possunt, se invicem relevant, ut compressionem illam ex æquo tolerant, Motui *Libertatis* verius assignamus.

Sit Motus Decimus quintus, *Motus Pertransitionis*, sive *Motus secundum Meatus*; per quem Virtutes corporum magis aut minus impediuntur, aut provehuntur à Mediis ipsorum, pro Natura corporum & Virtutum Operantium, atque etiam Medii. Aliud enim Medium Luci convenit, aliud Sono, aliud calori & frigori, aliud Virtutibus Magneticis, nec non aliis nonnullis respectivè.

Sit Motus Decimus sextus, *Motus Regius*, (ita enim eum appellamus) sive *Politicus*; per quem partes in corpore aliquo Prædominantes & Imperantes, reliquas partes frænant, domant, subigunt, ordinant, & cogunt eas adunari, separari, con-

K

sistere,

sistere, moveri, collocari, non ex desideriis suis, sed prout in Ordine sit, & conducatur, ad bene esse Partis illius Imperantis; adeo ut sit quasi *Régimen & Politia* quædam, quam exercet Pars Regens, in partes Subditas. Eminent autem hic Motus præcipue in Spiritibus Animalium, qui Motus omnes partium reliquarum, quamdiu ipse in vigore est, contemperat. Invenitur autem in aliis Corporibus in gradu quodam inferiore; quemadmodum dictum est de Sanguine & Urinis, quæ non solvuntur, donec Spiritus qui partes earum commiscebat & cohibebat, emissus fuerit aut suffocatus. Neque iste Motus omnino Spiritibus proprius est, licet in plerisque Corporibus Spiritus dominantur ob Motum celerem, & penetrationem. Veruntamen in Corporibus magis condensatis, nec Spiritu vivido & vigente (qualis inest Argento vivo & Vitriolo) repletis, dominantur potius Partes crassiores; adeo ut nisi frænum & jugum hoc arte aliqua excutiat, de nova aliqua hujusmodi Corporum transformatione ne minimum sperandum sit.

Sit Motus Decimus septimus, *Motus Rotationis spontaneus*; per quem Corpora Motu gaudentia, & bene collocata, Natura



tura sua fruuntur; atque seipsa sequuntur, non aliud; & tanquam proprios petunt amplexus. Etenim videntur Corpora aut movere sine Termino; aut plane quiescere; aut ferri ad Terminum, ubi pro Natura sua aut rotent, aut quiescant. Atque quæ bene collocata sunt, si Motu gaudeant; movent per Circulum: Motu scilicet æterno, & infinito. Quæ bene collocata sunt, & motum exhorrent, prorsus quiescunt. Quæ non bene collocata sunt; movent in linea recta (tanquam tramite brevissimo) ad consortia suorum Connaturalium. Recipit autem Motus iste *Rotationis* Differentias novem. Primam, Centri sui, circa quod Corpora movent: Secundam, Polorum suorum, supra quos movent: Tertiam, Circumferentiæ sive Ambitus sui, prout distant à Centro: Quartam, Incitationis suæ, prout celerius aut tardius rotant: Quintam, Consequutionis Motus sui, veluti ab Oriente in Occidentem, aut ab Occidente in Orientem: Sextam, Declinationis à Circulo perfecto per Spiras longius aut propius distantes à Centro suo: Septimam, Declinationis à Circulo perfecto per spiras longius aut propius distantes à Polis suis: Octavam, Distantiæ propioris aut lon-

K 2      gioris

gioris Spirarum suarum ad invicem : Notam & ultimam , Variationis ipsorum Polorum , si sint mobiles : quæ ipsa ad Rotationem non pertinet , nisi fiat circulariter . Atque iste Motus communi & inveterata opinione habetur pro proprio Cœlestium . Atamen gravis de illo Motu Lis est inter nonnullos tam ex Antiquis quam Modernis , qui *Rotationem* Terræ attribuerunt . At multo fortassè justior movetur Controversia ( si modo res non sit omnino extra Controversiam ) an Motus videlicet iste ( concessò quod Terra stet ) Cœli finibus contineatur , an potius descendat , & communicetur Aëri , & Aquis . Motum autem *Rotationis* in Missilibus : ut in Spiculis , Sagittis , Pilis Sclopetorum , & similibus ; omnino ad Motum *Libertatis* rejicimus .

Sit Motus Decimus octavus , *Motus Trepidationis* , cui ( ut ab Astronomis intelligitur ) non multum fidei adhibemus . Nobis autem Corporum Naturalium Appetitus ubique serio perscrutantibus , occurrit iste Motus ; & constitui debere videtur in speciem . Est autem hic Motus veluti æternæ cujusdam Captivitatis . Videlicet , ubi Corpora non omnino pro Natura sua bene locata , & tamen non  
 pror-

prorsus male se habentia, perpetuo trepidant, & irrequiete se agunt, nec statu suo contenta, nec ulterius ausa progredi. Talis invenitur Motus in Corde & Pulsibus Animalium; & necesse est ut sit in omnibus Corporibus, quæ statu ancipiti ita degunt, inter Commoda & Incommoda, ut distracta liberare se tentent, & de novo repulsam patiantur, & tamen perpetuo experiantur.

Sit Motus Decimus nonus & postremus, Motus ille cui vix nomen Motus competit, & tamen est plane Motus. Quem Motum, *Motum Decubitus*, sive *Motum Exhorrentie Motus* vocare licet. Per hunc Motum Terra stat mole sua, moventibus se Extremis suis in Medium; non ad Centrum Imaginativum, sed ad Unionem. Per hunc etiam Appetitum Omnia majorem in modum Condensata Motum exhorrent; atque illis pro omni Appetitu est non moveri; & licet infinitis modis vellicentur & provocentur ad Motum, tamen Naturam suam (quoad possunt) tuentur. Quod si ad Motum compellantur, tamen hoc agere semper videntur, ut quietem & statum recuperent, neque amplius moveant. Arque circa hoc certe se agilia præbent, & satis perneciter & rapide (ut

K 3

per-



pertusa & impatientia omnis Moræ ) contendunt. Hujus autem Appetitus Imago ex parte tantum cerni potest; quia hic apud Nos, ex subactione & Concoctione Cœlestium, omne Tangibile non tantum non Condensatum est ad Ultimitatem, sed etiam cum Spiritu nonnullo miscetur.

Proposuimus itaque jam Species, sive Elementa simplicia Motuum, Appetituum, & Virtutum Activarum, quæ sunt in Natura maxime Catholica. Neque patum Scientiæ Naturalis sub illis adumbratum est. Non negamus tamen & alias Species fortasse addi posse; atque istas ipsas Divisiones secundum veriores rerum venas transferri; denique in minorem numerum posse redigi. Neque tamen hoc de Divisionibus aliquibus abstractis intelligimus: Veluti, si quis dicat; Corpora appetere vel Conservationem, vel Exaltationem, vel Propagationem, vel Fruitionem Naturæ suæ; Aut si quis dicat, Motus rerum tendere ad Conservationem & Bonum, vel Universi, ut *Antitypiam & Nexum*; vel Universitatum magnarum, ut *Motus Congregationis Majoris; Rotationis, & Exhorrentia Motus*; vel Formarum specialium, ut reliquos. Licet enim hæc vera sint, tamen nisi terminentur in Materia

teria & Fabrica, secundum veras lineas; speculativa sunt, & minus utilia. Interim sufficient, & boni erunt usus ad pensandas *Prædominantias* Virtutum, & exquirendas *Instantias* *Luctæ*.

Etenim ex his quos proposuimus Motibus, Alii prorsus sunt Invincibiles; Alii aliis sunt fortiores, & illos ligant, frænant, disponunt; Alii aliis longius jaculantur; Alii alios tempore & celeritate prævertunt; Alii alios fovent, roborant, ampliant, accelerant.

Motus *Antitypia* omnino est Adamantinus & Invincibilis. Utrum vero Motus *Nexus* sit Invincibilis, adhuc hæremus. Neque enim pro certo affirmaverimus, utrum detur Vacuum, sive Coacervatum, sive Permistum. At de illo nobis constat; Rationem illam, propter quam introductum est Vacuum à *Leucippo*, & *Democrito* (videlicet quod absque eo non possent eadem Corpora complecti & implere majora & minora spatia) falsam esse. Est enim plane *Plica Materia* complicantis & replicantis se per spatia, inter certos fines, absque interpositione Vacui: Neque est in Aëre, ex Vacuo, bis millies (tantum enim esse oportet) plus quam in Auro. Id quod ex potentissimis Corporum Pneumatico-

rum Virtutibus ( quæ aliter tanquam pulveres minuti natarent in Vacuo ) & multis aliis Demonstrationibus, nobis satis liquet, Reliqui vero Motus regunt & reguntur invicem, pro rationibus Vigoris, Quanti, Incitationis, Ejaculationis, nec non tum Auxiliorum, tum Impedimentorum quæ occurrunt.

Exempli gratia; Magnes armatus nonnullus detinet & suspendit Ferrum, ad Sexagecuplum pondus ipsius; Eo usque dominatur Motus *Congregationis Minoris*, super Motum *Congregationis Majoris*: Quod si majus fuerit Pondus, succumbit. Vectis tanti roboris sublevabit tantum pondus; Eo usque dominatur Motus *Libertatis*, super Motum *Congregationis Majoris*; Sin majus fuerit Pondus, succumbit. Corium tensum ad Tensuram talem non rumpitur; Eo usque dominatur Motus *Continuationis*, super Motum Tensuræ; Quod si ulterior fuerit Tensura, rumpitur Corium & succumbit Motus *Continuationis*. Aqua per Rimam perforationis talis effluit; Eo usque dominatur Motus *Congregationis Majoris*, super Motum *Continuationis*; Quod si minor fuerit Rimma, succumbit; & vincit Motus *Continuationis*. In pulvere Sulphuris solius immisi



missi in Sclopetum cum Pila, & admoto igne, non emittitur Pila; In eo Motus *Congregationis Majoris* vincit Motum *Hyles*. At in Pulvere Pyrio immisso vincit Motus *Hyles* in Sulphure; adjutus Motibus *Hyles* & *Fuga* in Nitro. Et sic de cæteris. Etenim *Instantia Lucta* (quæ indicant *Prædominantiam* Virtutum, & secundum quas rationes & calculos prædominentur & succumbant) acri & sedula diligentia undique sunt conquirendæ.

• Etiam Modi & Rationes ipsius Succumbentis Motuum, diligenter sunt introspicendi. Nempe, an omnino cessent, vel potius usque nitantur, sed ligentur. Etenim in Corporibus hic apud nos, nulla vera est *Quies*, nec in Integris, nec in Partibus; sed tantum secundum apparentiam. *Quies* autem ista apparens, causatur aut per *Æquilibrium*; aut per absolutam *Prædominantiam* Motuum. Per *Æquilibrium*, ut in Bilancibus, quæ stant si æqua sint pondera. Per *Prædominantiam*, ut in Hydriis perforatis, ubi quiescit Aqua, & detinetur à decaflu, per *Prædominantiam* Motus *Nexus*. Notandum tamen est (ut diximus) quatenus nitantur Motus illi Succumbentes. Etenim si quis per lactam detineatur extensus in terra bra-

chiis & tibiis vinctis, aut aliter detentis; atque ille tamen totis viribus resurgere nitatur; non est minor Nixus, licet non proficiat. Hujus autem rei conditio (scilicet utrum per *Pradominantiam*, Motus Succumbens quasi annihiletur; an potius continuetur Nixus, licet non conspiciatur) quæ latet in Conflictibus, apparebit fortasse in Concurrentiis. Exempli gratia; Fiat Experimentum in Sclopetis, utrum Sclopetus, pro tanto spatio quod emittat Pilam in linea directa, sive (ut vulgo loquuntur) in Puncto Blanco, debiliorem edat percussione ejaculando in supra, ubi Motus Ictus est simplex; quam desuper, ubi Motus Gravitatis concurrat cum Ictu.

Etiam Canones *Pradominantiarum* qui occurrunt, colligendi sunt. Veluti, quod quo Communius est Bonum quod appetitur, eo Motus est fortior: ut Motus *Nexus* qui respicit Communionem Universi; fortior est Motu Gravitatis qui respicit Communionem Denforum. Etiam, quod Appetitus qui sunt Boni Privati, non prævalent plerunque contra Appetitus Boni magis Publici; nisi in parvis Quantis. Quæ utinam obtinerent in Civilibus.

*Ratio*

*Ratio Inveniendi causas Fluxus  
& Refluxus Maris.*

**N**ecesse prorsus est, ut iste Motus efficiatur, vel ab Aquarum Progressu & Regressu, in modum Aquæ in pelvi agitatæ, quæ quando latus unum pelvis alluit, deserit alterum; vel à Sublatione & subsidencia Aquarum è profundo, in modum Aquæ ebullientis, & rursus subfidentis. Utri vero Causæ Fluxus & Refluxus ille assignari debeat, oritur dubitatio. Quod si recipiatur prior Assertio, necesse est ut cum sit Fluxus in Mari ex una parte, fiat sub idem tempus alicubi in Mari Refluxus ex alia. Itaque ad hoc reducitur Inquisitio. Atqui observavit *Acosta*, cum aliis nonnullis (diligenti facta Inquisitione) quod ad litora Floridæ, & ad litora adversa Hispaniæ & Africæ, fiant Fluxus Maris ad eadem tempora, & Refluxus itidem ad eadem tempora, non contra, quod cum Fluxus sit ad litora Floridæ, fiat Refluxus ad littora Hispaniæ & Africæ. Attamen adhuc diligentius attendenti, non per hoc evincitur Motus Atrollens, & abnegatur Motus in progressu. Fieri enim potest, quod sit Motus Aquarum in progressu,



gressu, & nihilominus inundet adversa littora ejusdem Alvei simul. Si Aquæ scilicet illæ contrudantur & compellantur aliunde; quemadmodum fit in Fluviis, qui fluunt & refluant ad utrumque littus, horis iisdem, cum tamen iste Morus liquido sit Motus in Progressu, nempe Aquarum ingredientium ostia Fluminum ex Mari. Itaque simili modo fieri potest, ut Aquæ venientes magna mole ab Oceano Orientali Indico, compellantur & tradantur in Alveum Maris Atlantici, & propterea inundent utrumque latus simul. Quærendum itaque est, an sit alius Alveus, per quem Aquæ possint iisdem temporibus minui & refluere. Atque præsto est Mare Australe, Mari Atlantico neutiquam minus; sed potius magis latum & extensum, quod ad hoc sufficere possit.

Itaque jam tandem perventum est ad *Instantiam Crucis* circa hoc subjectum: translato vocabulo à *Crucibus*, quæ erectæ in Biviis, indicant & signant viarum separationes. Has etiam *Instantias Decisorias*, & *Indiciales*, & in Casibus nonnullis *Instantias Oraculi*, & *Mandati*, appellare consuevimus. Earum ratio talis est. Cum in Inquisitione Naturæ alicujus, intellectus ponitur tanquam in *Æquilibrio*, ut  
incer-

incertus sit, utri Naturarum è duabus, vel quandoque pluribus, Causa Naturæ Inquisitæ attribui aut assignari debeat, propter complurium Naturarum concursum frequentem & ordinarium; *Instantiæ Crucis* ostendunt consortium unius ex Naturis ( quoad Naturam Inquisitam ) fidum & indissolubile, alterius autem varium & separabile; unde terminatur quæstio, & recipitur Natura illa prior pro Causa, missa altera & repudiata. Ea talis est: Si pro certa inveniatur, quod cum sit Fluxus ad litora adversa tam Floridæ, quam Hispaniæ, in Mari Atlantico; fiat simul Fluxus ad litora Peruvix, & juxta dorsum Chinæ in Mari Australi; Tum certe per hanc *Instantiam Decisoriæ* abjudicanda est Assertio, quod Fluxus & Refluxus Maris de quo inquiritur, fiat per Motum Progressivum: Neque enim relinquitur aliud Mare, aut locus ubi possit ad eadem tempora fieri Regressus, aut Refluxus. Commodissime autem hoc sciri possit, si inquiratur ab Incolis Panamæ, & Limæ ( ubi uterque Oceanus, Atlanticus & Australis, per parvum Isthmum separantur ) utrum ad contrarias Isthmi partes fiat simul Fluxus & Refluxus Maris, an è contra. Verum hæc Decisio,  
five

sive Abjudicatio certa videtur, posito quod Terra stet immobilis. Quod si Terra rotet, fieri fortasse potest, ut ex inæquali rotatione ( quatenus ad celeritatem sive incitationem ) Terræ, & Aquarum Maris, sequatur Compulsio violenta Aquarum in Cumulum sursum, quæ sit Fluxus; & Relaxatio earundem, (postquam amplius cumulari non sustinuerint) in deorsum, quæ sit Refluxus. Verum de hoc facienda est Inquisitio separatim. Attamen etiam hoc supposito, illud æque manet fixum, quod necesse sit fieri alicubi Refluxum Maris ad eadem tempora, quibus fiunt Fluxus in aliis partibus.

Similiter, sit Natura Inquisita, posterior ille Motus ex duobus quos supposuimus; videlicet Motus Maris se Attollens, & rursus Subsicens; si forte ita acciderit, ut ( diligenti facto examine ) rejiciatur Motus alter, de quo diximus, Progressivus. Tum vero erit Trivium circa hanc Naturam tale. Necesse est, ut Motus iste, per quem Aquæ in Fluxibus & Refluxibus se attollunt, & rursus relabuntur, absque aliqua accessione Aquarum aliarum quæ advolvuntur, fiat per unum ex his tribus modis; vel quod ista Aquarum Copia emanet ex interioribus Terræ, &  
rursus



rursus in illa se recipiat; vel quod non sit aliqua amplior Moles Aquarum, sed quod eadem Aquæ (non aucto Quanto suo) extendantur, sive rarefiant, ita ut majorem locum & dimensionem occupent, & rursus se contrahant; vel quod nec Copia accedat major, nec Extensio amplior, sed eadem Aquæ (prout sunt tam Copia, quam Densitate aut Raritate) per vim aliquam Magneticam desuper eas attrahentem, & evocantem, & per Consensum, se attollant, & deinde se remittant. Itaque reducatur (si placet) jam Inquisitio (missis duobus illis Moribus prioribus) ad hunc ultimum; & inquiratur si fiat aliqua talis Sublatio per Consensum, sive vim Magneticam. Atqui primo manifestum est universas Aquas, prout ponuntur in Fossa, sive Cavo Maris, non posse simul attolli, quia defuerit quod succedat in fundo; adeo ut si foret in Aquis aliquis hujusmodi appetitus se attollendi, ille ipse tamen à Nexu rerum, sive (ut vulgo loquuntur) ne detur Vacuum, fractus foret & cohibitus. Relinquitur, ut attollantur Aquæ ex aliqua parte, & per hoc minuantur & cedant ex alia. Enimvero rursus necessario sequetur, ut vis illa Magnetica, cum super Totum operari non possit,

circa


circa Medium operetur intensissime, ita ut Aquas in Medio attollat; illæ vero sublatae, latera per successionem deferant & destituant.

Itaque jam tandem perventum est ad *Instantiam Crucis* hoc subjectum. Et talis est: Si inveniatur quod in Reflexibus Maris, Aquarum superficies in Mari sit arcuata magis & rotunda, attollentibus se scilicet Aquis in medio Maris, & deficientibus circa latera, quæ sunt litora; & in Fluxibus eadem superficies sit magis plana & æqua, redeuntibus scilicet Aquis ad priorem suam positionem; tum certe per hanc *Instantiam Decisoriâ* potest recipi Sublatio per vim Magneticam, aliter prorsus abjudicanda est. Hoc vero in Fretis per lineas nauticas non difficile est experiri: videlicet utrum in Reflexibus versus Medium Maris, Mare non sit magis altum sive profundum, quam in Fluxibus. Notandum autem est, si hoc ita sit, fieri (contra ac creditur) ut attollant se Aquæ in Reflexibus, demittant se tantum in Fluxibus, ita ut littora vestiant & inundent.

F I N I S.

# INDEX RERUM MAXI- ME MEMORABILIVM.

*Numerus Paginam indicat.*

- in*  *ber Barry* *Ætas serena Autum-*  
*sub ter-* *num ventosum præ-*  
*ra in cli-* *monstrat. 98*  
*vo quo-* *Ætna flāmas evomit. 41*  
*dam murmur flatuum* *qua Agros impingunt,*  
*auditur. 40* *dispositionem ad calo-*  
*rem habent. 153*  
*Accidentales generatio-* *Amnes quandoque in sic-*  
*nes ventorum. 46* *co ponunt venti. 36*  
*Acetum in occursum tur-* *Andes inter Peruviam &*  
*binis injectum à Pli-* *Chilem. 60, 134*  
*nio. 112* *Animalia perpetuo per*  
*Acida in membro, ubi* *interiora calida sunt.*  
*non est Epidermis, dolo-* *147*  
*rem cient, non multum* *in Animalibus mortuis*  
*discrepantem ab eo, qui* *nihil calidum ad ta-*  
*sentitur ex Calido. 132,* *ctum humanum senti-*  
*139* *tur. 155*  
*Acosta reprehenditur. 24.* *Anniversarii venti. 18*  
*ejus Observatio de Pla-* *Antenna quid. 74*  
*ta & Potosa. 40. de* *Approximatio ad Corpus*  
*fluxu & refluxu ma-* *calidum auget calorem.*  
*ru. 227* *161*  
*in Adibus refrigeratoria* *Aqua & aër sunt corpora*  
*per ventos punit. 47* *valde homogenea. 52.*  
*Æoli regnum. 38* *Balneorum naturalium*  
*Aër conclusus in caver-* *a fontibus suis excepta*  
*nis, ut calidus fiat. 142.* *deserveſcit. 140. Cali-*  
*erumpere compellitur.* *da per accidens caleſce-*  
*41* *ri videtur. 151. Mari-*  
*Motus magis infri-*  
*gida: quā caleſcit. 145*



# INDEX RERUM

- na noctu interdum remis fortiter percussa coruscat. 139. Regis aurum solvit. 148. fortis argentum solvit, aurum non item. ibid.
- Aquilones anniversarii circa exortum Canicula existimantur venire à mari glaciali. 57
- Aranea ante ventum laborant sedulo. 101
- Arbores in regionibus frigidis magis aliquando sunt inflammabiles. 138
- Arcturi ortum tempestates sequuntur. 53. 94
- Ardea de ventis praesagium. 100, 102
- Argentum parum excitat caloris. 146, 147
- Argenti vivi mortificatio. 209
- in Argento vivo spiritus flatuosus latet. 105
- Aromata & herba Calida ad linguam parum masticata adurunt. 132, 149
- Afelli, stella. 94
- Affecula venti qui. 21.
- Continents & Maris diversi sunt. 23
- Athos mons. 60
- Attrita corpora calefcunt. 144
- Aviarii venti unde dicti. 20
- Aves in arboribus habitantes tempestates ut pramonstrent. 101. aquaticae quando ventos praedicant. 100. terrestres quando. ibid.
- Aura continua circa maria spirat. 45
- Auster & Zephyrus non generant vapores. 28. fiat plerumque solitarius. 30. frequentius oritur & fortius spirat. ibid. cum oritur aut desistit fiunt fero mutationes tempestatum. 29. lenior saepe serenus est. ibid. marinus saluberrimus. ibid. à continenti magis morbidus. ibid. notis affecula. 231. pluviosus Anglis & pestilens. 27, 28. Africa vero serenus ac salubris. ibid. Vagus est & liber. ibid. humilis & lateralis. ibid.
- Autumnus serenus ventosam hiemem praemonstrat. 89
- B. Bal-

MEMORABILIVM.

B.

Balnea calida. 140

Bellus quid. 49

Boreas celsior est & spirans ex alto. 28. diei affecla est. 23. a mari suspectus, a terra serenus. 29. nocet phthisicis. 32

Boreas oritur saepe Cacia & Coro flantibus. 30, 31. priore tempestate manente. 29. Si noctu oritur non ultra triduum manet. 30

Brixa Ventus. 14. inter Tropicos luculenter spirat. 16. extra Tropicos quasi inperceptibiliter. ibid. non Euris integer est, sed Euroaquilo. 17

Burdegalarum supplex libellus ad Regem Anglia quis? 57

C.

Celi apertio praeannuntiat Ventos. 42. de Ventis prognostica 94. 95.

aliud Calidum est, aliud

Calefactivum. 177  
in Calidi natura instantia convenientes. 125.  
& seqq.

Calor est motus expansivus, per quem corpus nititur ad dilatationem sui 178. ascendendo sursum. 180. per particulas minores Corporis. 181. nonnihil rapidus. 183. Coelestium tribus modis augetur. 157. Coelestium etiam aridissima non comburit. 155. in Cerebro qualis. ibid. fortissimus in quibus reperitur. 158.

Caloris definitio. 184. definitio Peripatetica videtur. 202. divisio. 186. gradus primus tactilis videtur esse in animalibus 154. gradus in inanimatis, quatenus ad tactum nullus est. 152. sensitiva corpora post aerem quamnam. 169

Calx. 152. viva aqua conspersa concipit calorem. 146

Campanarum sonitus ante pluviam auditur magis ex longinquo. 101.

# INDEX RERUM

101. existimatur toni-  
trua dissipare. 59
- Carbones quando ventum  
significent. 99
- Cardinales Venti qui. 11
- Caruella naves quæ. 81
- Castor, Pollux & Hele-  
na quid nautis præsa-  
giant. 96. eorum Calor  
qualis. 139
- Chimistarum principia.  
119
- Circuli circa planetas aut  
stellas, ventos præmon-  
strant. 95. circa Lunam  
præsagiant ventos, ex  
parte qua ruperint. 43,  
93
- Cæciæ nubes ad se tra-  
hit. 32. ei seneratores  
comparantur. ibid.
- Cænaculorum æstiuorum  
refrigeria. 103
- Columbus in oris Lusita-  
niæ per ventos statos  
iudicium fecit de Con-  
tinue in America.  
19, 69
- Cometarum manifestus ef-  
fectus in augendu ardo-  
ribus anni non depre-  
henditur. 137
- Concameratio Cænaculo-  
rum plurimum facit ad  
auras. 47
- Confucientia ad Ventos.  
50
- Conflictus ventorum. 80,  
70, 71. fortes gignunt  
Ventos vehementes. 58
- Coniunctiones planetarum  
(sole excepto) sequun-  
tur venti. 94
- de Constantio mira. 154
- Coruscationes quadam lu-  
men præbent, sed non  
urunt. 138
- Corvi ventos præmon-  
strant. 100
- Currentes in mari. 18
- D.
- Delphinorum de tem-  
pestate præsagium.  
101
- in Denbigh comitatu Bri-  
tanniæ vehementes sunt  
Ventorum eruptiones.  
40
- Densi & rari Historia.  
113. & seqq.
- Directionis motus Ven-  
torum causa. 65, 66
- Divinatio naturalis ali-  
quando certior, ali-  
quando magis lubrica.  
88
- Durationes Ventorum.  
62



MEMORABILIMUM.

E.

**E**clipses Luna, venti  
semper quasi comi-  
tantur, Solis vero  
serenitates. 93  
Ecnephia quibus ventis  
fiant. 33  
Electrica operatio Gilber-  
ti. 199  
Elucescentia quid aucto-  
ri. 175  
Etesia venti inter causas  
inundationis Nili ad-  
scripti sunt. 88  
coram Equitantibus in-  
terdum turbines lu-  
dunt. 61  
circa Equum in itinere  
sudantem coruscatio  
quandoque apparet.  
139  
Eurus siccus mordax. 32.  
in Britannia pro male-  
fico habetur. 27. in Eu-  
ropa ventus desiccans.  
15  
Excitationis motus in  
ventis causaque. 65  
Excrementa animalium  
recentia calorem ha-  
bent. 131, 148  
Experimentum venti in  
turri occlusa. 53, 65

F.

**F**ebriticantes qualem  
calorem habeant. 154  
Ferrum cum primo dissol-  
vitur per aquas fortes  
absque ulla ignis ad-  
motione, calorem con-  
cipit. 131  
Fervores magni post Sol-  
stitium aestivale desi-  
nunt plerumque in to-  
nitru. 95  
Fimius equinus. 152  
Flabella ad faciendum  
ventum. 103  
Flamma circa caput pue-  
rorum visa nullo modo  
comas adurebat. 139  
Flamma & ignitorum  
plurimi sunt gradus in  
fortitudine. 157, 158  
Flatus in microcosmo cum  
Ventis in mundo ma-  
jore optime conveniunt.  
104. repentini semper  
nubilo caelo fiunt. 48  
Fœneratores Cacia com-  
parantur. 32  
Fluxus & refluxus maris  
investigandi ratio. 227.  
& seqq.  
Focus sancti Ermi. 139  
Folia ex arboribus citius  
deci-

# INDEX RERUM

decidunt à parte Au-  
stri. 31. & palea lu-  
dentes sine aura Ven-  
tum adesse nunciant.  
100  
Folles Æoli utres sunt.  
103  
Fomites Ventorum, sunt  
loca ubi magna copia  
Vaporum. 66  
Formarum inquisitio ut  
procedat. 29  
Forma rei ipsissima res  
est. 150. non minus  
abesse debet, ubi natura  
data abest, quemad-  
esse, ubi adest. 132,  
133  
per Formas quid autor in-  
telligat. 169  
Fracastorii inventum de  
Sartagine. 188  
Frigora inducunt sensum  
quendam ustionis. 132,  
150  
Fulgura quid de Ventis  
prasagiant. 195  
Fulmina raro hyeme eve-  
niunt. 137

## G.

Generatio simplex quæ  
dicta? 209  
Generationes accidentales

ventorum. 3  
Generationum & Corru-  
ptionum causa princi-  
palis quæ. 187  
Gilbertus reprehenditur.  
117, 199  
Gravis & Levis historia.  
117  
de Gremiali puella cujus-  
dam historia. 139  
Groenlandia. 138

## H.

Herba virides contusa  
sæpe concipiunt flā-  
mam. 131, 216  
de Humore radicali me-  
dicorum seductiones.  
123, 124  
Hyades & Pleiades quid  
circa ventos possint.  
52, 53  
Hyems ventosa ver Plu-  
viosum præmonstrat.  
98

## I.

Ignis fatuus non multum  
habet caloris. 138.  
Græcus quid? 159  
Ignis excitandi mos apud  
Indos Occidentales. 131.  
Notio plebeia est. 177  
Ignium

# MEMORABILIVM.

Ignium in focus prae-  
gium de ventis. 98

Ignitum ita ut vertatur  
in ruborem igneum,  
etiam sine flamma per-  
petuo calidum est. 140

in Ignitis diversi caloris  
gradus. 159. & seqq.

Imitamenta ventorum.  
10, 102

Incendia quae vento forti  
flante fiunt majores  
progressus faciunt ad-  
versus ventum, quam  
secundum. 160, 161

Incus per malleum calefit.  
161

Inductionis vera opus  
primum. 167

Instantia crucis quid au-  
tori. 228

Instantiae Convenientes in  
naturae calidae. 129. &  
seqq.

Iris cartata solvitur in  
ventos. 45

Irritatio per frigidum  
ambiens augeat Calo-  
rem. 162

Islandia. 138

L.

**L**igatio motus congre-  
gationis majoris &

minoris. 203, 204

Lignum putre noctu splen-  
det. 140

Limites ventorum. 6

Liquida ferventia. 140

Liquores acres exequuntur  
opera caloris in divul-  
sione corporum. 149

Littora ut ventos prae-  
monstrent. 99

de Longitudine Vento-  
rum. 68, 69

Luciola quid. 140

Luna post Solem pluri-  
mum potest. §1. quinta  
suspecta est nautis. 91,  
92. recta semper mi-  
nax & infesta est. 92.  
rubicundior in Ortus  
quarto praedicat ven-  
tos. 43

Luna praesagia de ventis,  
pluviis & imbris.  
92. & seqq. stellarum  
& Cometarum radii  
non inveniuntur calidi  
ad tactum. 133

ante Luna eclipsin exci-  
tantur venti magni. §1

M.

**M**agia naturalis qua-  
nam. 118

Malacia in mari. 25

Malus



# INDEX RERUM

- Malus Princeps*, Prora, Puppis, rostri. 73
- Mare spirante Austro* fit cœruleum, Borea atrius. 30. quando ventum præmonstret. 99
- in Mari* inveniuntur quædam loca, quæ nullis flatibus tumescunt. 39, 73
- in Maribus Europa* cœlo sudo percipitur aura quædam lenis ab Oriente. 14
- Marini venti* sunt terrestribus humidiores. 25. & vehementiores. ibidem. & 61. suntque vel tepidi vel gelidi. 25
- Martii* longe magis desiccant quam æstivi. 34
- Materia ventorum*. 109
- Mediani venti* qui. 11. majores. ibid. minores. 12. prioris semicardinis disponuntur ad serenitatem, posterioris ad Tempestates. 33
- Mergi* ante ventum pennas rostro purgant. 100
- Meteora* ignita sæpius temporibus hybernis quam æstivis adparent. 137
- Mezentii tormentum*. 124
- Milvi in sublimi* volantes serenitatem significant. 100
- Molendinorum* ad ventum motus. 85. vela. 78
- Montes & Rupes* cavernosi sunt. 40. glaciales quid gignant. 57. pileati conspecti præmonstrant tempestates imminentes. 97
- Mortis naturalis* vera via. 125
- Motus excitatio & directio* in ventis inquirenda. 64 primus est Antitypia materia. 191. Secundus est motus nexus. 192. Tertius motus libertatis. ibid. Quartus est motus Hyles. 195. Quintus est motus continuationis. 196. Sextus est motus ad Lucrum sive motus indigentia. 197. Septimus est motus Congregationis majoris. 199. Octavus est motus Congregationis minoris. 200. differtque à motu indigentia. 200, 201. ligatur tribus modis. 201. & seqq. Nonus est

# MEMORABIL IUM.

est motus magneticus. 206. Decimus est motus fuga. 207. Undecimus est motus a simulatione. 209. Duodecimus est motus excitationis. 212. Decimus tertius est motus Impressionis. 213. Decimus quartus est motus Configurationis aut Situs. 216. Decimus quintus est Motus per transitionis. 217. Decimus sextus, est motus Regius. ibid. Decimus septimus est motus rotationis spontaneus. 218. Decimus octavus est motus Trepidationis. 220. Decimus nonus est Motus Exhorrentia. 221. Motus naturalis quis veteribus. 116. plaga quis Democrito. 195. Motus Ventorum diversi. 7, 64. in machinis humanis. 85. Motus Ventorum in navibus fons primus. 81. & seqq. fons secundus. 83. fons tertius. 84. in hoc Motu spectatur cum Impulsio, tum Dire-

ctio. 79. Motus ventorum in velis navium. 73. habet impulsionis tria praeipue capita. 81. qua magis accedit ad rostrum navis, eo fortior est. 77. Murmur in montibus, caelique prodigiosum ad ventos spectat. 99. N.

**N**aves minores longe praestant celeritate majoribus. 76. Navium progressus quantus esse solet. 80, 81. in Navibus Britannicis majoribus, quatuor sunt mali, aliquando quinque. 73. Nebula quid circa ventos portendant. 98. Nivales venti veniunt à Septemtrione. 33. Nives interdum integrae deficiuntur per ventos à montibus, ut subjacentem planitiem sepeliant. 35. Nivium solutio circa mare glaciale excitat Aquilones in Italia. 69. Noctuae quandoque tempestates praemonstrant. 100, 101.

L

No-

# INDEX RERUM

- Novilunia dispositionum* tres. *ibid.*  
*aëris sunt significati-*  
*va.* 91  
*Nova Zembla.* 135  
*Noctes in Europa sunt*  
*astuosiores.* 53  
*Nubes altiores aliquando*  
*cernuntur supervolare*  
*humiliores.* 71. *plerum-*  
*que sublimiores ferun-*  
*tur ab Oriente in Oc-*  
*cid. etiam vento diver-*  
*so.* 14  
*Nubium de ventis præs-*  
*gium.* 94. & seqq.  
  
O.  
  
**O**leum Origani, Sul  
phuris, & Vitrioli  
exequitur opera  
caloris. 131, 148  
*Olympus mons.* 60, 134.  
*quid ibi.* *ibid.*  
*Optativa cum proximis*  
*circa ventos.* 110. &  
*seqq.*  
*apud Orientales invenitur*  
*textile quoddam ex a-*  
*vium plumagine fa-*  
*ctum, quod vi innata*  
*butyrum solvat.* 153  
*Origines locales vento-*  
*rum.* 31. *eas nosse ar-*  
*duum.* 37. *Suntque*  
  
*sub Orionis exortum ple-*  
*rumque venti surgunt.*  
52, 94  
*Ova per calorem ignis a-*  
*liquando excluduntur.*  
185  
  
P.  
  
**P**almites vitium à  
parte Austri erum-  
punt. 31  
*Papilionum resuscitatio.*  
188  
*Paracelsus refutatur.* 210  
*Paracelsi schola Euro lo-*  
*cum non reperit.* 27  
*Pastoribus videndum ut*  
*greges ovium contra*  
*Austrum pascant.* 31  
*Permissio intellectus quid*  
*auctori.* 175  
*in Peruvia venti quam*  
*maxime in pleniluniis*  
*flant.* 52  
*Phenomena obliqua quæ.*  
16  
*Phthificis nocet Boreas.*  
37  
*Picus de Tenariph.* 60, 134  
*Pinnacula etiam in ma-*  
*ximis tranquillitati-*  
*bus perpetuo versus oc-*  
*cidentem stant.* 15  
  
Pisces



MEMORABILIVM.

- Pisces per interiora minus calidi sunt.* 155  
*Piscium squama putrescentes splendent noctu.* 140  
*in Piscibus notatur magis gradus caloris quam privatio.* 147  
*circa Planetarum conjunctiones flant venti majores.* 52  
*Pleiadum & Hyadum exortum sequuntur imbres.* 94  
*Plenilunia quoad colores & halones eadem forte denotant, quæ ortus quartus 93. præsegiunt magis quam aies aliqui ab ipsis.* 91  
*Plinius reprehensus.* 63  
*Pluma in aquis innantes ventos adesse nunciant.* 100  
*Pluvia quando fiat.* 30  
*Pocæ singunt tempore diluvii Boream in carcere conclusam, Austrum cum amplissimis mandatis emissum.* 27  
*Potestates ventorum.* 9  
*in Pratis cumuli feni quæ adeoque in altum fiunt, absque aliquo majore venti in-*  
*petu.* 49  
*Præster est tanquam fulgur cacum.* 50  
*Procella quæ cum nebula sunt, dira sunt navigantibus.* 49  
*Prognostica Ventorum.* 88  
*in Promontiorum flexibus mutationes ventorum reperiuntur.* 48  
*Proportiones malorum & velorum variant.* 76  
*post Pruinas atque Nives non alius fere ventus quam Auster spirat.* 30  
*Pulmo marinus quid Hispanis.* 139  
*Pulvis pyrius.* 104  
*Putei quidam sunt in Dalmatia, & Regione Cyrenaica, in quibus dejecto lapide tempestates oriuntur.* 41, 112  
*omnis Putrefactio in se calorem exilem habet.* 153. *in congregatione homogeneorum fundatur.* 204  
*Pyxis nautica in plagas xxxiii. distribuitur.* 79

# INDEX RERUM

*spersione aceti compe-*  
*scitur.* 59  
*Turbines exigui frequen-*  
*ter fiunt.* 49. *inter-*  
*dum etiam sereno. ibi-*  
*dem.*  
*Typhones majores raro*  
*fiunt.* 49

## V.

**V**acuum cur à Leu-  
cippo & Demo-  
crito introductum.  
223

*Vapor fervidus.* 141  
*Vaporum copia patria*  
*ventorum est.* 66  
*in Vaporibus & copia &*  
*qualitas spectanda.* 56  
*Vasa in quibus esculenta*  
*reponuntur interdum*  
*tempestates prænun-*  
*ciant.* 102  
*Vbiquetarii venti.* 70  
*inter Vegetabilia non in-*  
*venitur aliqua planta*  
*qua ad tactum huma-*  
*num calida sit.* 152,  
147  
*Vela quomodo extenden-*  
*da.* 83. *flante vento*  
*lateralì, rigidius in*  
*adversum venti exten-*  
*duntur.* 79. *decem im-*

*pendent navibus Bri-*  
*tannicis.* 73. & seqq.  
*Velorū dispositio in vento*  
*recto quanam felicissi-*  
*ma?* 78. *longitudo in*  
*molendinis etiam facit*  
*ad motum.* 87  
*in Velis ab infra longe*  
*major est tumor quam*  
*in ceteris.* 76  
*Ventus nihil est aliud,*  
*nisi ipse aer motus.*  
106. *quomodo à nube*  
*prodeat.* 43  
*Venti anni versarii.* 1. *af-*  
*secta.* 2, 21. *Cardi-*  
*nales.* 11. *semicardi-*  
*nales non tam procel-*  
*losi quam mediani.* 33.  
*extraordinarii.* 4. *Ge-*  
*nerales.* 1, 14. *liberi.* 2.  
*liberi magis afficte*  
*hyemis sunt, quam æ-*  
*statis, maxime autem*  
*autumni & veris.* 22.  
*Magni sunt inundatio-*  
*nes aeris.* 105. *Medi-*  
*ani.* 11. *Mediani mayo-*  
*res.* 11. *Mediani mi-*  
*nores.* 12. *ab Occidente*  
*spirantes sunt vehe-*  
*mentiores, quam qui*  
*ab Oriente.* 32. *pome-*  
*ridiano parcius flant.*  
15. *Ornithii sive avia-*  
*rii*

# MEMORABILIVM.

rii qui. 20. procelloſi  
non extenduntur per  
larga ſpatia. 61. Se-  
micardinales 11. Sta-  
ti. 1, 18 ſtaticum aſſe-  
clis non confundendi.  
25. Tropæi. 26. Vapo-  
rarij. 54. eorum cauſa  
efficiens. 55. & alti-  
tudo. 60. Vehementes  
ſunt tanquam inunda-  
tiones. 35

Venti omnis generis æ-  
rem purgant. 34. in  
inferiore aere ut gene-  
rentur. 44 mille modis  
ſiunt. 36. tanquam  
mercatores vaporum  
ſunt. 37. naturas ſuas  
quinque modis nanciſ-  
cuntur. 34. ex Nitro  
facti. 104. ex reſolu-  
tionibus nivium qua-  
les. 56. tribus tempo-  
ribus frumento & ſe-  
geribus nocent. 31. ſe-  
dantur quinque modis.  
58, 108. ſpirant ex  
parte fomitus ſuorum.  
109 complures in ortu  
ſuo ſpirant exigui, dein  
progreſſu invaleſcunt.  
39. ex Vaporibus ma-  
rinis facilius abeunt  
retro in pluviam. 57

Ventorum conſlictus. 8.  
differentia radicales.  
28. generationes acci-  
dentales. 3. imitamen-  
ta 10. qui per immi-  
ſſionem vaporum ſiunt  
cauſa. 107. limites. 6.  
particularum matri-  
ces unde petendæ. 37.  
motus diverſi. 7. no-  
mina. 1, 11. origines  
locales. 3. poteſtates. 9.  
prognostica. 10. quali-  
tates diverſæ. 2. præ-  
ciſus reditus non inven-  
nitur. 21. ſucceſſiones.  
7. Undulatio, Sulca-  
tio. 8

ad Ventos conſacientia,  
& excitantia, & ſe-  
dantia. 4, 5  
Ver pluvioſum aſtatem  
ſerenam præmonſtrat.  
98

Verticitas ventorum un-  
de. 66. & ſeqq.

Villoſa habent non nihil  
teporis. 130, 143

Virgilius non omnino  
Phyſices imperitus fuit.

72

Vita & mortis hiſtoria.  
122. & ſeqq.

ramus Vitæ intra do-  
mum citius matureſcit  
quam



# INDEX RER. MEMOR.

<i>quam foras.</i>	186	<i>undulatione aquarum.</i>	
<i>Vitrum. Calendare sive</i>		70	
<i>graduum.</i>	148		
<i>Vitri Calendaris confe-</i>		Z.	
<i>ctio. 163. in eo aer di-</i>			
<i>latatus inflat vesicam.</i>		<b>Z</b> ephyrus comes perpe-	
53		tui veris. 27. in	
<i>in Vitro pileato aer dila-</i>		Europa ventus hume-	
<i>tatus inflat vesicam.</i>		ctans. 15	
<i>ibid.</i>		Zephyri sunt affecla ho-	
<i>Vndulatio ventorū quid?</i>		rarum pomeridiana-	
2. aeris differt ab		rum. 23	

F I N I S.





